

清代傳記叢刊·綜錄類 ⑦
周 駿 富 輯

國朝耆獻類徵初編 (五)

卷四二七至
卷四三二

(清) 李 桓 輯



明文書局印行

19/11/2021

國朝書獻類徵初編卷四百二十七目錄

文藝五

吳兆騫

吳兆騫

楊名正

張鑿

劉齊

邵緒廣

張篤慶

張然

葉兆冷梅

褚篆

劉榛

黃虞稷

馮宗儀

陳守愚

錢曾

鮑夔生

胡奇

周篔

王翊朱彝鑿

范路褚標

王坊周篔

沈進屠廷楫

李麟友

--	--	--	--	--	--	--	--	--

國朝耆獻類徵初編卷四百二十七

通奉大夫前署江西巡撫江西布政使司布政使湘陰李桓輯

文藝五

吳兆燾

余讀史記鄒陽上梁孝王書曰女無美惡入宮見妒士無賢不肖入朝見嫉不禁掩卷嘆息以爲千古若出一轍也及觀有明盧柎之爲人以跡弛使酒至罹重法械繫黎陽著幽鞠放招賦以自廣東郡謝榛見長安諸貴人絮而泣曰生有一盧柎視其死而不救乃從往古哀湘而弔沅乎諸貴人憐之卒出柎於獄而柎終無所遇益落魄縱酒以歿未嘗不深悲之若余友漢槎吳君者豈非其

人哉漢槎姓吳氏諱兆騫字漢槎世爲吳江人明刑部尙書立齋
吳公七世孫也父燕勒公諱晉陽舉庚辰進士授永州府推官漢
槎垂髫隨至任所過潯陽大別由洞庭泛衡湘攬其山川形勝景
物氣象爲詩賦驚其長老未幾流寇張獻忠蹂躪楚地漢槎奉母
歸燕勒公亦解組旋里值我朝定鼎江南漢槎年方英妙才名
大起相隨諸兄爲雞壇牛耳之盟馳騫聲譽與今長洲相國文恪
朱公家司寇司農玉峯兩徐公暨諸名賢角逐藝苑談論風生酒
闌燭跋揮豪落紙如雲煙世咸以才子目之丁酉登賢書會科場
事起下刑部獄羈囚請室慷慨賦詩隨蒙世祖章皇帝寬宥遣
戍甯古塔荷戈絕域極目慘沮太倉吳祭酒梅村爲悲歌行以贈

之有山非山兮水非水生非生兮死非死之句送吏無不嗚咽而
漢槎獨賃牛車載所攜書揮手以去在甯古塔垂二十餘年白草
黃沙冰天雪窖較之李陵蘇武猶覺顛連困阨也無錫顧梁汾舍
人與漢槎爲髻屣交時在東閣日誦漢槎平日所著詩賦於納臘
侍衛性君所如謝榛之於盧柟者性君固心異之思有以謀歸漢
槎矣會 今皇帝御極二十有一載 詔遣侍臣致祭長白山長
白山者東方之喬嶽也地與甯古塔相連漢槎爲長白山賦數千
言詞極瑰麗藉使臣歸獻 天子 天子亦動容咨詢有尼之者
不果召還而納臘侍衛因與司農司寇暨文恪相國醵金以輸少
府佐匠作遂得循例放歸然在絕域已二十三年矣時余方官京

師亦曾與漢槎一效奔走其歸也抱頭執手爲悲喜交集者久之其母固無恙而諸兄已相繼云亡遂爲經師館於東閣者又期年歸而與太夫人上觴稱壽宗黨戚里咸聚以爲相見夢寐也乃未及一年復至都門竟卒於旅舍嗟嗟豈非其命之窮也哉初漢槎爲人性簡傲不諧於俗以故鄉里嫉之者眾及漂流困阨於絕塞者垂二十餘年一旦受朋友脫驂之贈頭白還鄉其感恩流涕固無待言而投身側足之所猶甚潦倒不自修飾君子於是嘆其遇之窮而益痛其志之可悲也已余爲吳氏壻余亡妻與漢槎爲兄妹行且幼同學也余故知之獨深漢槎以前辛未十一月某日生其卒以康熙二十三年十月某日年五十四配葛氏前庚午舉人

葛瑞調諱彌之女子男一人振臣太學生女四人俱葛氏出振臣以康熙二十七年十一月十五日舉柩葬於吳縣寶華山之麓卽燕勒公墓傍也以狀涕泣而請余銘余固不忍辭遂爲之銘曰
吁嗟乎吳季子幼而學經并學史萬里投荒幾至死絕域生還豈易耳胡爲泯泯止於此吁嗟乎吳季子

右墓誌銘徐欽撰

吳兆騫字漢槎江南吳江人順治丁酉舉人以科場事成塞外後赦歸旋卒著有秋笈集漢槎傲岸自負嘗顧同輩述袁淑語曰江東無我卿當獨秀其不顧世眼驚可知也乃無辜被累戍甯古塔比於蘇武窮荒十九年矣然緣此詩歌悲壯令讀者如相遇於丁

國朝詩別裁集小傳沈德潛撰
零絕塞之間則嘗人世之奇窮非正使之爲傳人耶

右 國朝詩別裁集小傳沈德潛撰

吳漢槎名兆騫吳江人少工樂府詩歌與無錫顧梁汾舍人齊名漢槎耽書然短於視每鼻端有墨則是日讀書必數寸矣同學以此驗其勤否性簡貴不諧俗嘗與長洲江茗文及同輩數人出吳江東門意氣岸然不屑中路忽率爾顧茗文述袁淑語曰江東無我卿當獨秀旁人爲之側目順治丁酉舉於鄉尋以科場事謫甯古塔太傅明珠子侍衛成容若夙知漢槎之才而與顧梁汾善梁汾爲漢槎求援於侍衛未卽許乃作金縷曲二闕寄漢槎侍御見之泣曰山陽思舊之作都尉河梁之什並此而三矣此事三千六

百日中弟當以身任之梁汾曰人壽幾何請以五載爲期侍衛告之太傅漢槎遂以康熙辛酉入關所著有秋笈集

右聞見錄吳德旋撰

按容若名成德卽前誌性德更名

吳兆騫字漢槎吳江縣學生順治丁酉以科場事謫戍甯古塔性傲岸不爲同里所喜其友規之吳大言曰焉有名士而不簡貴者少在塾中見人所脫巾冠輒溺之其師記名捶楚之後見所作臆賦乃嗟賞曰此子異時有盛名然當不免於禍矣吳青壇曰孝廉嘗與子輩同出吳江東門意氣岸然不屑中路忽率爾顧予述袁淑語曰江東無我卿當獨秀旁人爲之側目時有江左三鳳凰之目華亭彭師度陳其年兆騫也旣謫吳偉業有悲歌贈吳季子云

人生千里與萬里黯然銷魂別而已君獨何爲至於此山非山兮
水非水生非生兮死非死十三學經並學史生在江南長執綺詞
賦翩翩眾莫比白壁青蠅見排詆一朝束縛去上書難自理絕塞
千山斷行李送吏淚不止流人復何倚彼尙愁不歸我行定已矣
八月龍沙雪花起橐駝腰垂馬沒耳白骨皚皚經戰壘黑河無船
渡者幾前憂猛虎後蒼兕土穴偷生若螻蟻大魚如山不見尾張
髻爲風沫爲雨日月倒行入海底白晝相逢半人鬼噫嘻乎悲哉
生男聰明慎勿喜倉頡夜哭良有以受患祇從讀書始君不見吳
季子居塞上廿年侘傺不自聊一發之於詩鎮守巴將軍甚重之
每贈裘禦寒善駢體文其序孫赤岸詩云蓋聞纏絲湘吹以去故

而增悽慄慨燕歌由送離而結歎是以舊山既遠促管流音異國
無歸繁絃紫臆房陵一去君王有山木之謳軍府長羈伶官有土
風之操執珪懷越高藉悲吟公子留秦亦傳哀唱由來志士遭此
窮途未有不憑柔翰以消憂託長歌而中恨者也況乎金河轉徙
銀碛羈孤水千里而斷腸塞萬重而絕脈陳子公戍邊不返空望
長安移中監還漢何年傷心遙海慨其嘆矣能不漣而赤岸弱年
擢秀盛齒知名才爲談士之宗人擅藝林之俊江東二陸共識清
河鄴下雙丁先推敬禮乃以拾塵之惑遽從棲火之嗟靈璫難陳
遐取遂謫飄零阜帽遼海空來襦褌素衣吳關長謝士思迢遞託
黃鶴以俱飛客夢徘徊指白狼而難越然而蘭山箭盡篇什偏工

桃館尊空風流未沫劉越石棲皇於河朔詩體清剛庾子山畱滯
於關中賦才宏麗雖丁年坐老而子夜堪歌於是娛志縹緲寄情
嘯詠登高擄藻攬物揚葩紫雲亭埃興乘障之悲思白雪關山激
從軍之壯志寒鴉歸野夕雁橫天怨起衣單魂銷筋脆氣沈雄而
莫展心侘傺以誰知及夫臺上瞻鄉山頭送遠鶴廓不見鷺酌徒
傾睠花月於曩游愴風霜於今別莫不播之淒響緯以妍辭發言
而瓊樹相華命調而銀箏並咽捲蘆清吹諧爲蔡女之文截竹哀
音綴成邱仲之曲豈徒伯鸞南遊惟聞五噫中郎北遷願成十志
也哉僕舊託攀嵇近同遷賈黃墟游燕久限山河紫塞軍僑更分
鄉縣攬淚痕於河上空訴篴篥鬱愁氣於車前難消杯酒北部之

貧已甚南第之會徒乖永念生平彌嗟弦括卻題短引爰寄沈悲
嗚呼蘭忌當門痛煩冤之何已蓬悲出塞憐飄寄之安窮西氣驚
商將聽君詩而隕涕北風干呂誰披余製而傷神乎後其友顧貞
觀力商於明太傅子成德徐健庵時爲宮贊爲納餒遂於康熙辛
酉贖還王阮亭有和健庵喜漢槎入關之作云丁零絕塞鬢毛斑
雪窖招魂再入關萬古窮荒生馬角幾人樂府唱刀環天邊魑魅
愁遷客江上蓴鱸話故山太息梅村今宿草不畱老眼待君還有
秋笳集四卷其湘水曲云佳期渺何許日暮湘山岑翠華千載沒
江流空至今蘭芳楚皋綠雲起洞庭陰欲識相思苦瑤琴有哀音
又山空春雨白江迴暮潮青羌笛關山千里暮江雲鴻雁萬家秋

九江湖落飛龍艦萬騎風高戲馬臺雁飛白草年年雪人老黃榆
夜夜霜皆天分特高風格迥上

右文獻徵存錄錢林撰

漢槎驚才絕豔數奇淪落萬里投荒嘗託名金陵女子王倩娘題
詩驛壁以自寓哀怨

右徐鉉續本事詩張維屏錄

吳兆騫

世之論古者每以諸葛武侯不阻伐吳于忠肅公不諫易儲爲惜
余謂世遠年湮簡編缺佚庸知二公當日之不諫阻者況陳志明
載武侯言法孝直若在必能止主上此行是武侯曾經言之特不
能止之耳至明史于忠肅本傳亦不詳公諫易儲事後世遂以爲
疑天台齊次風侍郎召南未第時曾夢于公來謁與之抗禮謂曰
昔英廟易儲某實有疏諫畱中不發君他日幸物色之後侍郎預
修明紀入皇史宬徧檢三日而不得曾作詩記其事然人猶以夢
寐之事爲未足憑比邵二雲學士檢得通政使檔冊有于謙一本
爲易儲事而公免乃得白究恨未見公之諫疏也茲閱海甯吳槎

客兆騫拜經樓詩話所載鄉前輩張待軒先生跋仁和阮泰元氏讀于公旌功錄志感詩序斯錄在壬午夏嘉靖元年先祖檜屏公永訣時手授泰元云予供事實錄獲睹諫易儲一疏憲宗簡及為之流涕又有請復儲二疏英宗未及簡發為人臣者當以肅愍為法云云按阮氏所云三疏人鮮知者獨惜阮泰元當時既有此本不即以刊入公集中致久而遺佚為可痛恨也然公之事於此益明故亟志之

右筆記陳其元撰

按內吳先生一字漢槎一字槎客其籍異其著述亦異槎客未悉何時人姑次

於此
待考

楊名正

自科目制行曲謝期集題名關試規儀振耀人至詫爲一品白衫而拔解等第其薪序名者亦滋眾於是讀倜鋌標暨諸精切輩多幸得之而高才而訖不遇唐有干隱宋有洵廌明有文長元長君烈勒占若夫晞前詰之風尙勵志尤篤至專若勤瘁而踐舉場以歿如歛郡梧峰楊君此其可重慨者也君名名正字實先世家休甯西板橋梧山之麓故自號梧峰當宋建隆初同州刺史受避地松蘿天保山尋徙板橋至淳熙時王宮教授偉起家進士偕徽國朱文公闡明理學六傳而至琢明初以學行徵本邑教諭著道園天藻集心遠樓文集今彙刊存橐行世又四傳而至奎博學文尤

高嘗序貢於廷肅宗大署其卷曰楊奎第一後任潯州府推官以卒著舍藏寓存彙七卷奎生通儒通儒生士顯胥縣邑學生籍國子監君曾祖祖也士顯生祀年鄉飲大賓君父也君幼篤孝事大賓公暨母汪安人謹甚後事繼母胡安人罔敢少懈胡卒哀毀符禮友昆弟季弟早卒撫弟之子尤有恩誨掖罔少缺遇宗黨恂恂而義有宜抗辨者率無所挫縮楊氏鉅族有思齊會以課子弟有親仁會以講理學少輟輒力倡復之而君之嗜學尤勤甚君性沈敏經籍不事朗誦緝閱訖率整容坐大賓時詣學舍問對輒盡數十紙罔少稽滯旁觀者胥驚歎曰安世默記賈逵罔誦蔑以尙茲矣叔明經光溪君尤器之曰昌吾宗者此子也君文法先正詞必

表理養氣以輔理紆度以節氣而不尙艱棘纖詭之習雅嗜漢陽
熊學士撫楷尙輟歲丙午補郡博士弟子不決暮而飯於庠自是
試輒前其曹伍而大賓以齒寔高又潯州公芳溪書院有步雲橋
愛日亭且楊氏世產之雅標傳賢也尤重薪之當庚癸後文日振
少司農涵齋汪公學博敏齋汪君胥以文名於歙郡時偕君課業
輒歎曰且當讓楊君者鞭乙卯學博中副車丁巳己未少司農聯
旣君薪酬大賓望簡鍊揣摩其於唐宰相常袞所判通宵絕筆恨
卽有餘者胥覃精融洗之甲子讀書白嶽至廢嬾寢者累月泊抵
金陵而神業憊強入試七藝甫脫憊而力不克少支遂以疾出逾
月竟歿於秦淮之寓舍嗚呼昔唐羅隱詩曰日開十二門自此無

歸計唐人弔賈島曰片月已能臨勝黑遙天何益抱墳青至明雲
間人士哭周太學勒貞則曰縱使不堪朱紫貴何妨白髮老書生
才請沈蹟曠古同慨君懷昭諫歸計之艱絕聞仙抱墳之鑿而不
屑偕白髮諸生伍又楊氏世業芳溪環山數十里土厚材茂其勢
可以從業而不屑它徙以薪少酬大賓公暨芳溪公步雲躍龍傳
賢聚英之望而遂訖以試事殉此所謂勵志尤篤者也當是時君
仲兄松溪君聞君歿夜疾走詣金陵不三日而鬢畢白時年裁四
十有奇見者胥驚異焉初君娶於商山之吳早卒繼娶於金城之
汪親迎訖會胡安人病劇夕不入內寢喪闋始講合昏禮而汪宜
人潔蘋繁治禮菹內政秩如故君益得以肆力於學洎君歿子仲

祖恭五歲倏二歲宜人年二十有九慟絕始蘇屏漿水蘄殉身暨
宗黨背曲喻撫孤義乃截髮毀容以杖喪次焉嗚呼昔唐公乘億
久不第人傳其死妻縗服走二千里迎喪會億送客過之不旬日
而登第明沈君烈七試不遇卒無子妻薄少君斌截句數十悼之
亦旋卒科目顛舛菑遠閨幃而宜人幸育二藐孤孤又幸克成立
勤誨罔少怠舅羞且疾瞻養襄殯將樂廖侍郎嘗宰休甯書坤正
垂裕海甯許尙書督學政書士行昭然扁以旌之洎伸祖中式倏
序貢癸巳 恩詔舉節孝閩庠暨鄉約保呈報縣府司覈詳制撫
赫公梁公學政胡公合題請旌表壬辰禮部疏給銀三十兩聽其
建坊獲 俞旨繇是烏頭綽楔標揭門閭都邑紳士以至邨氓里

婦環觀者千餘人胥泣數行下伸祖族旋僉闔衛又獲遇 覃恩
誥贈君暨贈封二宜人如今甲倏舉孝廉司鐸畱城將卜葬涵山
之陽而走予邑乞誌銘予雅嘉君畜學潛德汪宜人苦節於史法
宜書且重有慨於科目之制所以羅才而司衡者不可不少加之
意也爰誌其略曰楊君徽州府學廩膳生 誥贈武德將軍生於
前癸未十月十有一日卒於康熙甲子十月三日年四十有二娶
吳氏 誥贈宜人繼汪氏恭遇 覃恩給銀建坊崇祀節孝祠 誥
封宜人卒於康熙戊戌十月二十五日年六十有三子伸祖壬午
武科舉於鄉山東東昌衛都司僉書倏歲貢生舉孝廉方正科第
一制撫首徵 召對特授沛縣教諭孫籍於庠及籍北雍者共十

三人曾元孫共百人其合葬君暨汪宜人於涵山之阡也以乾隆八年十月初九日銘曰

昔關西楊氏繇漢歷唐七百年而世居閩鄉嗣是而繇宋建隆迄今近八百年而聚族環居者爰有海陽蟠桃谷之楊猗與楊君清才標舉而金城宜人寶克以苦節配之其於北華山而南肥水也宗姓有望譜牒有光爰迺龍綸完軸焜燿涵山遠且燭天梯齊雲而邇則俯石堯瞰雁山以交輝互翥於芳溪涯北之鳳凰猗與鬱鬱乎洋洋乎尙其固藏而永昌

右墓誌銘儲大文撰

傳者傳也其體昉於史遷所以連綴其人之行實而傳之後世也

石則無傳傳亦不遠然孝子之心莫不欲論譏其先世之倫而明著之後世又不欲以自爲也必求有道而能文者以致其重焉蓋古之乞銘乞傳者類如此然有道而能文者代不數人有之則或矜慎其言而不輕作作者又或非其人而傳之不足以傳信於天下也久矣癸巳余來京師新安楊子仲祖以其父文學公事狀來謁距其卒已三十年欲余爲之立傳嗟乎余之文末矣抑不足以稱有道楊子何取焉顧壬午之役余同事棘闈楊子來執禮甚恭而本房郭生夢履又堅爲之請乃不獲辭按文學諱名正字寶先別自號梧峯世居休甯之芳溪蓋自行密王於吳其裔孫諱偉公者始遷此地登淳熙乙未進士歷任南康軍王宮教授自是世有

清德九傳至文學生而穎悟入塾親師便異羣兒稍長涉獵經史
愈益博綜弱冠遂補弟子員未幾高等食餼士林之中所推爲旌
旄者也其事二親以孝聞早失恃哀慟幾絕事繼妣如事所生承
歡色養未嘗有幾微憾於伯叔父事之惟謹人無閒言族故有講
學會謂曰親仁久廢不舉文學毅然興之謂吾自高曾以上皆以
正學相傳而歷代所與遊者如朱考亭陳定宇倪道川諸公皆當
世大儒則砥礪可知今可以弗念厥紹乎一時族人靡然從之又
倡舉思齊文會時與同志研究於文章而尤刻苦攻於舉子之學
冀以尊親揚名素所志願然也甲子歲讀書白嶽山遂以積勞成
疾然猶炎歆走白下力疾入闈志未酬而身先殞矣文學性恭謹

謙和動中矩矱自姻戚以逮羣下僉稱其賢其孝友睦嫺之實至
今猶有能言之者文學生於崇禎癸未卒於康熙甲子年四十有
二子二曰伸祖儲祖伸祖壬午科武舉人需次衛守備儲祖歲貢
生需次州佐孫八人

贊曰程子言科舉之文不足以得士然士之爭務爲此者非獨爲
其身之貴也抑以榮其親焉然自古及今齎此志以歿者爲不少
矣豈非天耶乃若文學則猶有繼其志者文學爲不死矣古稱讀
書學道而未有厚報不於其身必於其後人信夫

右傳陳鵬年撰

張整

嗚呼此吾襄詩人太阿先生之墓也曩順治己巳邑令江南余二
聞罷官寓吾家西園倡立詩社延邑中能詩者太阿與其弟雯及
黃甲雲方坦吾兄弟宗洙恩廣輩相唱和而太阿獨敏於才一題
落手眾方苦思而橐已就社中推爲詩豪每花晨月夜賦詩飲酒
歡呼角逐相上下固極一時之盛也未幾三閭買舟南旋余兩兄
以喪母嘔血物故而黃甲雲方坦輩亦相繼凋喪獨吾三人尙在
時時過從相慰藉今又奪吾太阿去雖無其子之請固不忍無言
況其請之懇懇也遂揮淚而爲之詞曰太阿字也諱整姓張氏其
先晉之洪洞人明初有諱公遠者徙襄城因家焉數傳至大父甯

明萬曆壬辰進士仕至四川按察司副使忤魏璫有大節父永祺
中明天啟辛酉鄉試督師汪喬年討李自成於襄率邑人出迎官
軍事詳明史太阿性嗜古於書無所不讀而尤喜爲詩徧及羣體
久之卓然自成一家有明末造流寇破襄城先生奉父母渡大河
而北夜值寇警纜斷漂流仰天祝曰甯失我舟無溺父母俄而舟
若有所憑逆溯抵岸則父母橫舟以俟固無恙也走溫縣旋失澤
州頃之渡淮抵金陵至 國朝乙酉始旋里焉其間流離患難跋
涉道路滄桑之變家國身世之感慷慨悲歌一寓於詩遭父喪哀
毀骨立廬苦啜粥者三年其喪母也則又一如其喪父者康熙丙
辰舉明經不就 廷試或有以謁選諷者則曰吾年幾六十老矣

甯貧一官令五柳笑人耶絕意仕進日事著作於故宅西構一室
題曰龍雷館徜徉其中吟詠之暇輒濡筆爲張顛草書以故四方
句詩與書者踵相接也太阿生於萬厯丁巳卒於康熙乙丑得年
六十有九配侯氏有賢行先卒以某年月日合葬於令武山之陽
子四本治本沅本綱本演皆名諸生以文行世其家而本沅孝友
尤著太阿爲人淡然寡營田廬之美者盡讓諸弟家徒四壁糟糠
不厭一日有客至日向午才舉火而披褐捫蝨嘯歌自適其甘貧
樂道如此生平爲詩無虛日所作萬餘首多不收拾今所存青霞
閣集僅五千餘篇方太阿之在金陵也孟津王鏗一見其詩日子
當以詩名世其後鐸過襄城復索觀其詩曰是殆學杜甫者更擊

節嘆賞以爲不可及云

右墓表劉宗泗撰

劉齊邵緒廣

劉齊字言潔無錫人康熙丙寅以選貢入太學方是時崑山徐尙書乾學方以收召後進爲己任而爲祭酒司業者多出其門海內之士有爲尙書所可者其名輒重於太學有爲太學所推者則舉京兆進於禮部猶歷階而升鮮有不至者惟齊與其友三數人閉門修業孤立行己意蹟而不悔其後石門吳涵爲司業重其學延致於家聲譽赫然公卿聞太學嘗取高第教習官學生齊與焉期滿例錄敘於吏部授縣令者十之八爲正途授州佐者十之二爲冗雜且底滯無選期自徐尙書罷歸公卿多欲以收召後進爲名者而某爲少宰自謂起荒陬至大僚尤欲擅風雅之譽使人禮先

於齊曰吾久知君可來見必爲選首齊謝不往某銜之繫籍州佐某由是叢詬訕而齊望益高或曰將飛者縮翼君自是舉京兆升禮部益可必矣齊聞卽日趣裝歸歸數年竟卒年四十有七齊性沈毅與人居終日溫溫而退皆嚴憚之偃臥一室天下士常想望其風采旣卒數年江東十郡之士上言督學使者士有無爵與年而學行可爲表儀者二人宜祀於鄉其一齊其一余亡兄百川也始徐尙書執權藉以收召天下士士爭湊之惟齊與其友數人執節不移久之此數人爲清議所從出土之蹇拙自負而務立名義者皆宗之雖布衣其重若與公卿相踦自齊歸其友亦次第歸太學生雖有潔己自好者而氣槩不足動人清議遂由是消委云

右傳方苞撰

劉齊字言潔江蘇無錫人明光祿寺少卿元珍曾孫性耿介以縣學生貢入太學名聲壓其儕輩應試順天有欲援而進之者齊作閨女詞五章謝之教習官學生期滿敘於吏部以十之八授縣令爲正途下則授州佐爲冗雜且底滯無選期是時某少宰遣人禮先於齊曰君來見必爲選首齊笑曰吾不以一刺易科第肯以此易縣令耶卒不往某銜之繫籍州佐或勸納粟爲教官齊與邵義書書謂教官雖微當爲諸生分別義利之辨奈何己先以納粟進卒卻之歸數年卒年四十七桐城方苞大書其墓道曰狷者劉言潔先生之墓義書字經農篤學好古於六經子史靡不窮究著書

國朝通志卷之二十一
三
甚具人品峻潔與齊相埒

右傳秦瀛撰

邵緒廣

吾邑有讀書學古之士二人一日邵經農一日劉言潔前年言潔
亡今年經農又亡二人者年未衰學未可量其所至皆不幸以死
自二人死而吾邑少善讀書者矣豈不惜哉經農名緒廣一字義
書祖名世明天啓中進士官山東右布政使有清望父儒炳母張
戶部尙書有譽女也尙書博通百氏之書與布政俱老壽經農稍
長及受兩家之教故學有原委不沾沾經生家言年二十餘與言
潔同補博士弟子員才名相亞自此與言潔砥礪名行考質文藝

務以古人爲師言潔氣高岸不可一世而經農循循謹飭言動不欲先人言潔文沈雄經農澹折格不同而原本經術則一經農所交皆天下知名士而心折者言潔一人而已經農雖世家子家故貧敝衣糲食恬然無所介於懷喪婦不更娶獨處者終其身性愛書授徒所入脩脯盡以易書晝夜校讐所居一小室凝塵不埽圖書縱橫藥鑪茗椀餽餽果食與筆硯雜陳於六經子史旁及佛老之言莫不精研淹貫晚益潛心宋五子書著四書扶微若干卷餘所著南華經注經學雜纂字學源流等書數十卷經農少工制舉業年四十後專肆力於古文辭文近南宋諸家不事摹倣而有其風格詩不多作善論古人詩而獨拙於書法點畫簡率塗乙錯互

文成惟一二人能辨之他人不能辨也方言潔病革經農往視言
潔口誦平日所讀書不輟經農曰心不可有一物於書不能忘亦
病也言潔瞿然起坐曰如君言又嘗與言潔論學言潔曰志不高
者學不達氣不盛者才不肆立吾志養吾氣庶幾追古人而從之
經農曰言不根於理則其言邪理不本諸躬行則其言僞蓋二人
志趣高遠其不同流俗如此言潔名齊嘗以選貢入太學時崑山
尙書方收召後進士欲致言潔門下言潔作閨女詞五章謝焉旣
而某少宰更欲致言潔亦不往余故爲經農傳牽連書之而深以
二人之亡爲可惜也

右傳秦松齡撰

張篤慶

張篤慶字歷友淄川人拔貢生有崑崙山房集鄧艾廟云奇兵未
掘一丸泥棉竹懸軍萬仞梯奄忽當塗更典午翻嫌多事鄧征西
自古奇功未可居螳螂蟬雀竟何如縱然制勝陰平道衛瓘誰知
擁傳車浯溪磨崖碑四十韻云莫言括地象請罷考異郵零陵之
碑大唐頌湘中名蹟良悠悠漁陽鞞鼓起阿榮天子下殿奔金牛
監國中興起靈武雙懸日月歸雍州皇家再造功掩罪鑿輿反正
天南陬聖德神謨亦略見物論何苦相鐫求磨崖紀勝久照耀至
今絕壁垂琳球水部文章尙書字有如南嶽傳岫巉煌煌魯公鼎
彝氣大書深刻神爲謀屢屢參天數千仞湘江萬古東西流吉甫

作誦史籀篆力摹石鼓追成周此石要自壯南紀青崖鐵綫凝懸
旒我生螻屈寄溟海志在金石山之幽前年扁舟下襄漢南過荆
鄧真豪遊遙望瀟湘隔衡永浯溪淼淼嗟方洲當時引領向天末
足所未到生繁憂漁洋先生示此本令我神氣爲移游字大於掌
幅徑丈堂中跼躄猶盤穆對茲狂叫發長喟便似躡足登崑邱左
把道州右光祿天風汗漫湘雲秋莊如王會輯萬玉垂紳搢珽朝
羣侯雄如將軍建大旆長戈利戟森兜鍪奇偉丈夫古冠劍乾坤
大筆來神樓墨光黯黹黑雲立石氣崩剝三蒼畱東京梁鵠及皇
象法書一一難爲倚下逮李北海遜此鐵畫兼銀鈎亦粵柳誠懸
河東筋骨相匹休願爲伏靈芝拂拭苔蘚重雕鏤琳琅金齷迴在

眼坐見懸崖山鬼鳴啾啾王漁洋亟賞之憶舊云落花無語歸春
水弱絮多情上酒船詠落葉云南浦半林隨逝水西風一夜滿長
安

右文獻徵存錄錢林撰

按張先生康熙二十
五年丙寅拔貢生

182-042

182 - 042

張然 葉洮 冷梅

張然工詩畫康熙己巳供奉 內廷三十餘載 恩寵甚渥賜
宸翰聯額頗多父璉子元偉並醇恪高雅海內名流俱樂與之交
嘉興府志

右 國朝畫識馮金伯錄

葉洮

葉洮字金城青浦人善山水喜作大斧劈康熙中祇候 內廷
詔作暢春園圖進呈稱 旨卽 命監造既成以病 賜金乘傳
歸尋復 召入以勞卒於途 畫徵錄

右 國朝畫識馮金伯錄

冷梅

冷梅字吉臣膠州人師欽天監五官正濟甯焦秉貞秉貞祗候

內廷奉 詔作耕織圖四十六幅村落風景田家作苦曲盡其致

深契 聖衷錫賚甚厚旋鏤版印 賜臣工梅尤工士女康熙五

十年與畫 萬壽盛典圖總裁則王原祁也又 避暑山莊圖三

十六幅內務府司庫沈喻畫與盛典圖皆開雕喻不知何許人觀

山莊圖似摹法董巨者 畫徵續錄

右 國朝畫識馮金伯錄

褚篆

褚篆字蒼書江南長洲人邑諸生蒼書天爵自尊淬礪古學韓文
懿公以父執敬禮之康熙己巳 聖祖南巡 召見見於行在所
命書箋二幅 御書海鶴風姿 賜之時已九十六矣越歲卒

右 國朝詩別裁集小傳沈德潛撰

國朝詩林卷之四十一

三

--	--	--	--	--	--	--	--	--	--

劉榛

康熙庚午商邱劉君山蔚卒其孤不忱卜葬於壬申之臘月二十
二日謁余請君壙中銘山蔚幼失怙頻遭禍亂終能岸然自異身
成而名達其與人也樂道其善卽有過反覆開發不忍有所容隱
經君推獎切劘者成就尤多亦可謂矯矯離羣士矣年僅五十六
以諸生死爲可痛悼乃世論猶延延未絕懼其行無以大白於來
世略述所見俾刊諸石而藏焉他日陵谷雖移山蔚之眞不可沒
也山蔚姓劉氏諱榛系出桐柏七世祖誠始隸歸德尺籍曾祖經
祖思敬父浩是爲廣庵公廣庵公娶光祿卿侯公執躬太常卿侯
公執蒲從妹無子副室張氏晚乃生君君生七歲而廣庵公沒踰

年爲崇禎壬午城陷侯孺人罵賊死獨君與其母在旁人危其不立君乃拔起孤童高自標致舞象時已儼然參名輩坐席十七補學官弟子意益廣講詩於鄭君介夫而今中丞宋公就與論交君性冲穆落落不大與人親卽意所最向比巷而居亦不數過其家人閒訪之庭戶寂然披其帷山蔚未嘗不在也呼之起相對不少款曲一二習君者安焉他固不能無望於君也於是眾口嗷嗷百怪交作山蔚幾死於構慮無以塞羣怒遂賃廡於侯氏之別業旣蹙蹙靡騁所愛子復天幽鬱困瘁生理幾絕然君氣彌厲每以古人自處而大肆力於學名由是日起遂受知於當代之偉人如吾師徐邇黃先生頗許爲知學潛庵湯尙書每贊雪園有志之士於

孫夏峰必首君文筆秀潔合法多得之徐孝廉恭士填詞則津筏於陳檢討其年而登白石後村之岸者也向之翕訛譁張轉而推君爲典型事必咨而後行矣四方以文字來請無虛日慕悅而願爲執鞭者殆徧海內也君方收拾前輩之遺文傳之隨所問荅以啟牖後進而一病三日死矣嗚呼痛哉頓覺中州千里爲之寥落蓋不止爲一人惜也君初娶沈氏繼楊氏子二女二惟不歷爲側室李氏出餘俱沈氏出原右生平寡言笑治己嚴靜用財有方而慎以取友尤加意貧交如余與李華海張玉標輩皆終身弗替於禮苟拂君意雖甚富貴卒不得以勢利拘也君果於以義自予而不恤人言遇輕豪年少輒抗行輩以臨之遂以速謗信信至不忍

聞然遇君廣坐中未嘗不斂容屏息粥粥然仍以丈人行下君也
嗚呼君誠賢矣其行視伊川晦翁文視昌黎詩視樂天不逮明白
彼猶不免此又奚尤哉君所著諸書具在其得失類有目皆可辨
而已變亂如此況隱微疑似之介易以誤人而顧須與之爭乎爰
爲之銘銘曰

心乎愛矣夫之貌可美於徐公方茂爾惡娶孤女乃云笙婦翁亦
可畏也民心罔中哀今之人胡不昭而葬埋斯文於幽宮庶幾俟
於百世使知言君子讀之而有所取衷嗚呼

右墓誌銘用蘭芳撰

自明季世人談雪苑文學之善者必以吳侯徐劉爲稱首然率以

辭賦名家而劉特工於制藝專言名理所謂劉千之者也亂後張
匏客徐邇黃始倡正學之宗而眾猶信疑相半唯董園公英年崛起
輒抗首而爲之繼董園公名榛字山蔚於千之蓋族父行也年
最幼不及與千之相切劘七歲而孤逾年流賊李自成陷歸德嫡
母侯孺人罵賊死生母張氏提公走河朔久之乃歸家遂中落公
拔起孤童高自標舉時方舞象已儼然參名輩坐席矣年十七補
博士弟子志益廣氣益厲恆以古人自處而益肆力於學名日起
夏峯孫徵君潛庵湯尙書皆亟稱之而與今中丞宋公論交尤密
故於詩賦源流頗得與聞梗槩焉文筆秀潔則出於徐孝廉恭士
填詞則津筏於陳檢討其年而制舉之文則沐浴於千之而手自

京鍊者也於是四方之郵筒日以數十而以文字來請者幾無虛
晷睢州則田贊山商邱則董園公東西並峙凡有事於雪苑者莫
不登堂申縞紵之好焉公性至孝嘗以不及事其父廣庵公爲憾
因自號曰事庵旣長張孺人教之極嚴稍不可輒立諸堂下而數
之甚則予杖公拱手俯受婉謝而退無愠容少旋卽萊舞於側以
爲常嘗從張晴峯學使游兩浙浙中山水甲天下蠟屐藜筇入其
中者率樂而忘老公一旦望白雲而遽言返棹張數四攀挽而歸
思益切遂屬疾同游諸子如吳門潘雙南廣平雷健初豫章毛季
連咸爲感動賦詩贈別迄今讀之猶聞蓼莪陟岵之聲焉公文學
行誼可自名家自成童以來造詣凡數變蚤年學詞賦喜徵逐卒

乃粹然一出於正儻使天假以年其學必更進擴而充之以幾於
篤實光輝豈非斯文之厚幸哉忽而疾作財兩日竟卒年五十六
所著有虛直堂文集女史韻統諸書行於世

柳下野人曰余於公爲卑屬幼共研席年雖差長相見則不覺瞿
然下也公好學深思雅異於眾人讀史至董仲舒下帷三年不窺
園歎曰有是哉因自謂董園公世之學者不敢斥言其名字遂以
董園公號焉平生有至性不妄交游意所不可輒望望去之不復
顧其所心折者如李華海田簣山則終身敬禮之弗衰余之視公
猶夫海上神山時在若遠若近之間焉然嘗與公及簣山約生爲
傳死爲誌銘如宋范蘇司馬公之義嗚呼二君皆歿矣余旣後死

忍自食其言哉乃括其生平而爲傳

右傳鄭廉撰

劉山蔚先生諱榛河南商邱人質聰穎嗜古人挹其文采風雅因號爲文學士云山蔚七歲而孤十七補博士弟子卒得肆力於學以文章鳴諸世其所刻虛直堂文集參考制作之興廢剖晰經傳之異同皆粹然儒者之言非復談天雕龍之說山蔚之文有關世道類此其爲人性至孝嘗以不及事其父廣庵公爲終天遺恨因自名其廬曰事庵其母侯孺人死於難逮事生母張孺人不難倣古人杖泣舞紵故事以爲常蚤年遭時弗順內訌外侮交作於喪亂流離之秋豪奴裂其家貲而致之危地人有憤懣弗能甘焉者

山蔚獨鎮靜安之不爲害中歲歷齊魯吳越之邦與當世之賢士大夫交遊往往賢人君子過其地者必造其廬相與盱衡古今得失人物臧否上下數千百年間出其博考廣覽之所得一一瞭然如指諸掌胸次灑灑人不能測其所至也山蔚學益深其懷益退焉不自足嘗與田贊山先生往復論辨義必求其可安衷未恆雖數復不厭語具載文集中晚益舍己從人欲公所得於世會予建朱陽書院屢訂學旨山蔚報書亦不以擁皋比爲辭方將具束帛以聘而山蔚死矣卒年五十有六嗣君不忱屬予作傳且以贊山書來今春始得讀鄭介夫所撰行狀因傳其梗槩以告世之稱山蔚文學者勿徒略行誼而以辭章士目山蔚則山蔚傳也

論曰學之於人大矣哉方山蔚之始學辭賦也喜微逐交貴少而
蜚語鬼訟之禍起迨遭家難而後其所爲詩賦古文辭率得之躬
行閱歷之實學斯變矣至與徐邈黃湯潛庵田簣山宋牧仲諸先
生遊道義切劘斐然一文行並茂之君子也非學而能有是乎儻
天假之年更充以養其所造安可量雖然始終植立於孝而於人
世震撼非常之遭淡焉若忘曾不以之動於中嗚呼山蔚之自得
其度越於人遠矣

右傳寶克勤撰

黃虞稷

黃虞稷字俞邵泉州晉江人父居中明季爲南京國子監丞遂家江甯兄虞龍字俞言少有逸才早卒虞稷七歲能詩號神童十六入縣學兩世藏書至八萬餘卷與江左諸名士爲經史會以資流覽困諸生三十餘載康熙十七年舉博學鴻儒遭母喪不與試旣左都御史徐元文薦修明史 召入史館食七品俸分纂列傳及藝文志轍下士大夫率就之借書無虛日二十三年充一統志館纂修二十八年總裁官徐元文請假歸 特詔攜志藁於家編輯元文奏言虞稷學問淵博健文筆乞隨相助 許之虞稷至包山書局刻苦披討逾年力疾竣事竟以勞卒年六十有三虞稷篤內

行持已矜廉而勇於義王士禎毛奇齡吳雯咸稱其詩有千頃堂
書目三十二卷又有蟬園雜誌我貴軒朝爽閣蟬窠諸集

右傅陳詩棋撰

馬瑤草士英罷鳳督時肆力爲畫黃俞邵題一絕云半間亭上草
離離尙有遺蹤寄黑池猶勝當年林甫輩弄麤貽笑誤書時

右聽松廬詩話張維屏撰

馮宗儀

元恭以庚午年十二月某日卒去年余南歸其孤用潛稽顙而謁於余曰吾父之卒前數日自整比其詩文數十卷已命其從牀側盡讀所爲詩某篇宜存集中某篇宜去或口易數字而後存者讀既命復之某曰夫子之病亟矣願少息則遺誠喪事宜一遵家禮斂以深衣巾履不得隨俗作佛事凡故人所親厚者各口占書與之訣又曰下窆宜有銘以請於執友姜君吾平生其所知也初余與君交時纔弱冠居相鄰也始用詩詞相倡酬已應諸生舉去爲時文俱不意得則學爲古文每晨坐談論至忘寢食巷中兒爭笑以爲癡及余中歲負笈遊四方爲衣食計又數從鄉舉未能卒業

斯事而君獨家居能日致甘毳侍養太夫人以其暇溫習經史汎
濫百家屢從方外人游究其宗旨性又通悟洞解樂律旁曉青烏
遁甲家言時時爲人說之城北郊故有宋楊文元公慈湖書院於
是又與里中耆宿朔望詣爲講學之會雖應舉業亦不數作故三
四十年閒元恭之文日與道偕進而余爲文至老不能自名其家
至於性命之學槩乎未有聞焉凡此者余之所以有愧於元恭顧
元恭有勝余無不及也猶憶往時聞里人有暴死者余曰是不知
怖死亦省諸苦元恭曰不然夫臨時須了了彼神識昏憤如何離
得生死及觀君彌留之際若真能談笑於去來閒者然後知向者
慈湖之會君蓋實有得力至此而始驗也君嘗獨處一室垂簾靜

坐其中晚益不喜以學道爲門戶雖講學之會亦不復舉務在躬行而已而近來標榜爲名高者競牽挽之使人竟掉頭不一顧君豈固以求異爲哉夫亦誠有所見於中不可奪也自君沒而余之道益孤講求亦日益廢其將終其身以訖於無所成也故於志君之事有餘痛焉君諱宗儀姓馮氏元恭其字別號魯庵曾祖光祿寺丞諱某祖贈刑部員外郎諱某父諱文偉明崇禎丁丑科進士歷官揚州知府以文章爲名太守母楊氏封恭人娶通山令周某女生三子長用潛邑諸生文與行足世其家聲者次用準次用潤女二適太學生王某諸生周某皆前卒所著有春秋三傳謹案三禮謹案律呂謹案文集詩集各如干卷君以丁卯年遊京師館於

天司寇徐公邠踰年病脾歸後再往病復作歸僅兩月而沒其歸也徐公資之行至腆其沒也許文表其墓而助之葬銘曰

尼而身亨而道年五十九不爲天羣挽推我無動一人同之可謂
眾生生不虛斃以正弗之有悔視治命葬三年如有待爲我助者
其東海

右墓誌銘姜宸英撰

陳守愚

處士名守愚字睿思長樂人克一先生冢孫也少聰穎異於常見好嬉游不專心於塾塾師切責之終不可馴致一日者忽詣塾取脩輩所爲舉業文觀之謂師曰此易易耳烏用學爲師卽試之輒大驚亟許可然終不屑也嬉游如故旣長博學工詩詞高自標置視世俗之士無一當意者與羣少年狎縱酒歌呼使氣罵座人皆目爲狂人嘗登烏石山絕頂仰天大笑墜崖下幾死族戚亦多譏誚之處士自若也狂益甚性至孝幼孤家中落事母備極甘旨年二十餘嬉笑若小兒狀以悅母其事克一公亦如之居母喪哀毀骨立祖歿哭盡哀有哭母哭大父二詩多至百韻讀者皆爲感悼

又嘗與羣兒放紙鳶作放鳶詩三十餘首人以方之徐文長云生平寡許可獨與余善余詩文皆能口誦之每聚首必歡笑達旦或談詩書或論時事娓娓有原委余不見其狂也庚午秋余返閩中處士過從尤數將還吳道至洪江泣謂余曰吾與君此別永訣矣君其爲我作傳死且不朽余謾應之竊疑人以處士爲狂人殆不誣耶未幾果以其年冬死年甫四十也未聞訃時余夢處士容甚瘁促余傳甚急既兩月聞其卒噫亦異矣余與處士從表兄弟也知之諗故爲之傳

論曰孔孟皆惡鄉之愿人獨有取於不屑之士良以狂者識高意廣得聖賢者師之則可以裁其太過進於中行非若無非刺者之

見稱於流俗也若陳子者豈非通國皆稱狂人哉余與之處數十年見其事親孝識見高交游篤特以縱酒狂歌不自貴重所以見嫉於禮法之士夫鄉黨所亟稱者不過習舉業工利祿以傲青紫耳迹其所爲齷齪趑趄又出鄉愿者下其目陳子爲狂人宜已陳子大父克一先生君子人也陳子嘗侍側談經史終日不倦亦不以陳子爲狂人則是陳子者殆古狂非今狂也夫

右傳張遠撰

日本書紀卷之二十一

三

錢曾

讀書敏求記錢曾撰曾家富圖籍此書皆載其最佳之本述授受之源流究繕刻之同異

右 四庫提要張維屏錄

按錢先生字遵王江南常熟人有文蘆集刊春集並選有白香

譜詞

المعهد العربي للدراسات والبحوث
بجامعة القاهرة
القاهرة - مصر

1966

鮑夔生

嗚呼鮑君子韶予之世交君以父始與公與予早舊執通家誼終身無替記曰此孝子之行也僑贛西河數十年與過從相期許密邇又與更甲乙變亂中壘書曰與人以實雖疏必密與人以虛雖戚必疎故非特以義合而情有過焉者矣今將卜葬某山之原其嗣紹豈紹永以甯都曾遂五所次行狀來請銘遂五之狀有古法肖寫該詳故舉以誌而稍稍補綴其軼事亦古人銘誌各成之義也其狀曰先生姓鮑氏諱夔生字子韶號鐔齋又號咄齋江南歙縣棠樾邨人父叔裔以鄉進士知廣東始興縣事當明之末年遭亂去官辟地於江西贛縣因畱家焉自先生孩提時始與公志在

四方未嘗一日家食及聞在贛乃閒關來歸至不朞月而始與公卒時先生年十二已能居喪盡禮事母孺人竭力贛人稱其孝當是時寡母孤子熒熒客寄日以窘窮曾不得一日就外傳而問學焉顧其聰穎天授於諸書章句聞而誦誦而解贛之宿儒雖名爲淹雅莫不歎異之稍長竊摹擬爲詩詞出語時能驚人於是稍稍出交頴之賢達與四方行過茲土者卓然自立於頤沛之日人於是覘鮑氏之有子年三十一遭母喪哀毀骨立嘗游吳魯燕齊間一時吳魯燕齊知名士無不願交先生者遇甯都魏叔子於揚州相與談論梁日出語人曰魏先生真吾師遂執義於叔子之門東南亂起先生歸保其妻子於贛贛偏將軍李公延而致之幕下從

征贛諸縣負嶠之寇丁巳從蔡都督攻吉安戊午客宣義將軍幕
從破江西崖石砦又從破浙閩間諸賊壘先後以儒服運籌策軍
門十餘年所至能相與有成功救被難民婦全活者甚眾粵都人
士爲刻石紀先生德而將軍亦次先生功將請於朝先生辭焉其
後名日益盛志日益廣辛酉歸自燕朝之近臣達官咸相爲詩歌
以道其行戊辰冬客佟將軍幕辛未二月再游東粵三月而先生
以疾殂先生雄姿英采浮於面背聲琅琅如出金石生平以詣力
佐其敏悟爲詩詞清新儁雅矢口而談每當隙會不屑屑迂謹繩
矩所與游皆當世偉人艸莽里巷之夫或不敢仰視崛起困窮之
中掉臂軒眉名譟天下其意氣之壯可謂盛矣孰謂乃不獲效其

宏偉而徒困頓摧折之於河山道路之間彈琴寤歌之際以終其身可悲也夫距其生明崇禎庚辰月日爲年五十有二妻程碩人側室某氏子男三人紹昱太學生某出次紹永娶某程出次紹恢某出女子三人適某某所著有江上集紅螺詞江樓合選蕉桐引凡若干卷魏季子曰方予與始興公安甫廿餘歲而始與公年長將倍詩沾稱尊宿然予兄弟入郡則無日不相過從迭爲詩倡和君猶藏弄予少年往反書疏及所爲詩君與蕪湖劉毅可甯都會止山同盟好而兩家子弟雖壯立不少寬假焉其在揚州也見先叔兄於朋友規勵以義閩人詩文盡意無貌言君慨然曰人短魏叔子者妄甚乃北面稱弟子後十年先兄始有辟舉事先兄旣下

世則引其子世侃爲兄弟君子年長世侃者亦令循行輩執禮無
失甯都賴子弦曾周士酷貧士也或經商或坐市肆賣藥君知其
賢交甚篤且使其子持謙下周士歿猶遠致賻唁顧問其妻子勿
衰然君雖游於達官要人亦嘗以語言氣岸扞忌諱及尙將軍以
危譴出關外君則走京師送之嗚呼其視熾趨於富貴充奮於貧
賤者殆未可同日語也銘曰

風生於地而鳴於天人生於天而反於原雖反於原名則有傳名
既克傳是生存焉存胡怛傷予情則然

右墓誌銘魏禮撰

同治十一年庚子年

三十一

胡奇

君姓胡氏諱奇字德常別號正庵系出安定世爲揚州之蜀岡人
四世祖梅南君明經篤行以經術教授弟子著錄者數百人至君
之祖星海君倣儻不羈重意氣已然諾生四子明末避仇挈其四
子至太倉遂占籍爲太倉人其季子明海君卽君之父也慷慨任
俠好施予累致數千金皆用以周恤親族家無所餘生二子君其
長也君生而警敏讀書不爲章句有文武大略旣屢試文場不收
益講求韜鈴之學善劍槊便騎射性闊達疏通好謀能斷時提督
少保西安梁公新平海寇有功開闢松江方求奇才異能之士羅
而致之幕下有以君姓名聞者梁公延見於署之西堂君風姿秀

國朝文獻通考卷之百一十一
三十一
偉占對詳明公改容加禮雷之幕府與諸子遊久之益器愛君欲
擢任軍職於秋九月都試之日命以己所乘駿馬授君觀其馳射
君迴策如縈便旋合度發矢輒破的公又命射百步之鵠君從容
持滿三發三中鼓聲雷動一軍叫譟稱善公大喜親以金卮酌酒
賜之是時觀者堵立皆以君彬彬儒者耳及觀其攬轡調弓以汝
南之騎而兼陽元之射無不驚異非眾所儼也公雖欲擢用君然
例必先授營司小職以待序遷君恥爲營弁力辭不就公雅知其
志節亦不强也居數載梁公薨於位君與其仲子扶櫬西歸親視
窆多事畢南還秦中士大夫皆多其風義焉其後都督三韓楊公
移鎮江南聞君名召見驩甚語人曰此梁少保府中舊僚我今得

之矣由是以國士選君每軍中機密皆預籌畫多見納用會閩逆告變受命加公少保昇以至省水陸之任移節赴閩欲與君偕行適以父喪在殯力辭不赴約以葬畢請從及葬而往從楊公於行閒復海澄取廈門颶風驚浪之中躬犯石矢賈勇先登君之功爲多及功成之後復隨公還鎮江南先是公所題請隨征者多得顯職而君以赴閩稍後續疏題敘僅隨例以守備待君於是遂拂衣歸矣君性孝友自少出爲伯氏後事嗣父及本生父母能盡色養歿而殯葬如禮室江孺人賢孝知大體敬事尊嫜得其歡心君雖嫻於武略而通經學占能詩文工書法襍被出遊常往來九峯三泖之間性愛友朋一時勝流名士多樂與君交賦詩飲酒相得

至驩其在雲間帥幕也所尉薦裨伍小校往往至大官一日有解
逃兵至軍門俟主帥出將寘重法君心愍之乃佯謂曰汝坐法當
死柰八旬老母何其人心悟及主帥詰責其人以暫歸省老母對
責而遣之軍中有鞭責貫耳之刑多委君訊決君原其情罪多從
寬貸其委曲救濟多此類也君負經世才文通武達且受兩少保
之知僂力海疆其功能亦足以表見矣而竟以轉圜終豈所謂寔
命不猶者耶然君素恬澹亦不以爲憾也君之子瑗有俊才能自
力於學尤長於詩與余善

論曰唐人舉進士多從節鎮所辟爲參軍記室軍謀判官其後或
至將相如鄭餘慶賈耽杜黃裳高適溫造之流其卓卓也以正庵

之材受知兩帥而終不得展其志昔人言士絀於不知己而伸於
知己正庵旣遇知己矣卒之流落不偶淹蹇以沒然則士之懷材
抱術隄於時命而不得伸者可勝道哉

右傳唐孫華撰

Table with 11 columns and 1 row. The table is mostly blank, with some faint markings in the rightmost column.

--	--	--	--	--	--	--	--	--	--	--

周貧王胡 范路 王沆 沈進 李麟友 朱彝鑒 褚

君諱貧初字公貞更字青士又字簞谷先世居及山之麓千金圩
徙嘉興之梅會里曾祖考某祖考某考某皆不仕君幼治書年十
九喪父居憂讀喪祭禮鄉黨以孝稱遭亂乃棄舉子業不治就市
塵賣米府城初破有括故家遺書連船載以鬻於市者君買得一
船積樓下每日中交易箕筥斗斛權衡堆滿肆撥亂書糠粃中吟
誦不輟其為古今詩超超拔俗不輕襲前人片語時同里王胡范
路路弟子繆泳交賞君詩會予移居市南而海甯朱一是亦來僑
居里諸生沈進布衣李麟友皆與君倡和四方名士過者君輒留
飲或醵金會餐泊舟於門相接也君奉母孝膳必具酒肉與人交

文藝五

胸無柴棘人有匱乏傾肆中錢米給之有載丙鬻女於巨室及筭將以配僮僕君亟贖以金爲擇壻以嫁采石估載米八百斛得直千金貯君笥估獨往硤石中道溺死君具棺以斂手書呼其子至以笥還之歲潦率私錢散米以食餓者君旣急人難又交游漸廣有請必應兼治母喪爲弟婚遺女嫁由是生計日窘往來嘉善桐鄉以詩格投人每出少年子弟三五執詩卷隨之行援止者或數日畱畱或不辭去恆僦募不羈嘗歲除忽挈舟泊泉亭山訪僧靈章遂抵西湖又嘗元日挈子跋至武康銅井山尋禪人行杖轉入徑山時已昏暮去山二十里雪甚虎跡交於塗君循澀路前敗哭於後君不少顧遙見林中鈴修修就之則僧墨浪所居僧曰山多

虎居士遠來得不心動乎君曰吾行不失道心一動則飽虎口矣
僧方煨芋魁因啗君圍鑪話清淨理畱信宿乃躋山巔徧歷七十
二精舍還又嘗獨行魏塘見赤馬船縛布爲帆君問焉往船人以
入泖對君思就九峰訪故人請附載比及泖則已暝船人促君登
岸望見僧廬君闢入小沙彌見之駭強君出君周步琉璃鐙下觀
壁間所鈔詩牋有已作指示沙彌曰吾詩人爾非賊也沙彌以語
主僧煮白飯止君宿詰朝自泖達九峰抵華亭遂訪高士吳騏王
光承之居兼旬乃返歲在辛酉予典江南秋試榜旣發今戶部侍
郎德州田公雯爲予張燕君適造予道遇吏部郎曲阜顏君光敏
偕之來布衣紉屨眾賓皆矚眙顏君語曰此浙西詩人周青士也

諸公未之識乎田公肅君上坐懽飲而散自是燕子者輒及君有
漆人頭爲飲器者坐客莫敢視君滿引三杓湖州太守江都吳公
綺壯之賦樂章贈焉游攝山道見石辟邪立草中穹碑二丈餘將
仆人不敢近君騎驢徑詣其下讀之知是劉孝綽所製梁安成康
王秀碑也是日投山寺客皆倦君登絕頂賦詩於是上元鄭簠以
分書題名於崖常熟王翬爲繪作圖予滯京師君念予不置會太
僕卿色公聞君名具書幣屬有司延君敦促就道旣至畱二年率
在予寓居合計舍色公家不過五六旬也在都下未曾投貴人一
刺朝士願交君者一飯後君不復過其宅尙書崑山徐公乾學好
延攬海內士徐秀才善主其家君嘗就善同臥起徐公欲見終不

見宗人子所愛小妻周買自楚謂其主曰妾實禾人公客貧妾季父也宗人子以語君將令小妻出拜君曰貧農家子也聚族不及二十人未嘗有之楚游者拂衣出給事中某知君還削三緘贈行曰挾此可得百金荅曰貧不耐持竿牘伺候人卻不受乃與今監察御史錢塘龔君翔麟浮舟潞河將抵宿遷猶眠食無恙忽晨起挑頰水一笑而逝年六十有五龔君爲治喪還其柩以遺書付其子收君所撰有采山堂集二十四卷詞緯三十卷今詞綜十卷析津日記三卷投壺譜一卷君先娶李氏繼娶曹氏子四人長旼國子監生次某次某天次某女一人嫁某孫男一人女四人君之歸葬也殯于水月僧院後十年子旼等始克葬君於仙橋原伐石表

其墓予惟君視朋友同一身其後交游徧天下然氣類尤篤者里中諸子也因倣柳子厚獨孤申叔墓碣書故友姓名於後稍加詳焉

王胡字介人以布衣稱詩見賞於陳推官子龍爲之作序有秋槐堂集

范路字遵甫自蘭谿遷長水經亂賣藥於市有靈蘭館集

朱一是字近修崇禎壬午舉人兵後披緇衣授徒著爲可堂集

王沔字千明秀水學生有文行君與隔水居還往尤數舍山盜起晝劫梅會里沔被執家故貧勒贖不遂遇害

沈進字山子嘉興學生早年詩尙清麗與周君同調鄉人目之曰

周沈晚編所作爲藍村集歸於沖澹又輯文言會粹二卷行國錄一卷

李麟友字振公揚州學官自明次子史可法兵敗自明自縊學宮麟友求其父骨不得遂棄舉子業其詩慷慨奔放不屑裁翦字句朱彝鑿字千里予同懷弟也精篆法善畫兼工藝事嘗聽經師講詩小戎章誦其味於車制乃削木爲小戎市絹人馬御輪執轡欲觀者出示之詩長於送別有笏在堂遺橐

褚標字霞建詩饒風韻天卒

周篁字林於君從弟別字鷗塘以名其詩集

右墓表朱彝尊撰按朱先生一是見是編隱逸十七因不書附

周貧字青士初名筠嘉興人遭亂棄舉子業受塵市日中有括故
家遺書粥於市者買得一船筐筥斗斛權衡堆滿肆每讀之稊稂
中意甚得也與朱彝尊李良年鍾淵映善胸無柴棘視朋友如一
身晚年好與浮屠道士游嘗醉書五言云似士不游庠似農曾讀
書似工不操作似商謝奔趨立言頗突兀應事還狷疏飢凍不少
顧吟詩作歡娛彝尊讀之笑曰先生自寫其形影神也一日游嘉
善借柯氏園月夜吟詩意得至達旦適郡丞某以事至部與園鄰
攬吟聲不寐詰旦遣隸拘至撻而逐之王士頑聞之笑曰袁彥伯
不遇謝鎮西幾不免虎口爲詩不襲前人語春日皋亭訪靈章師
巢拘居云晨鐘發前嶺月落空寒煙又采蓴云細蔓柔柔弱輕舟

箇箇添參差方未已采摘定無嫌入箸銀絲滑行廚翠釜黏爲憐
滋味別更下水晶鹽

右文獻徵存錄錢林撰

王翊

王翊字介人嘉興人布衣有秋槐堂集翊初擅詞曲後研聲詩啟
禎之間大雅不作慨然以起衰自任平湖陸嗣端職方心賞之訪
之於長水值其洗研河頭挾之登舟家人不知也徧游茗雪乃返
旣而入越謁推官陳子龍方置酒送客翊詩有前路夕陽外行人
芳草中之句子龍詫曰此今之高三十五也爲其詩作序遭亂所
居不戒於火惟餘小屋二間一供婦爨一吟詠其中有故人官府

僚造之不肖見與郡司李嚴正矩善嚴以其無子贈一婢婢固有
夫遭兵驅散後蹤至胡所胡竟還之族弟庭守嶺南胡將詣之舟
次贛州夜遇盜赴水僅免所攜詩集雜著並小說詩餘盡失之抵
羊城官舍終夜擁被呬唔默念其所著述晨起鈔錄終什不得一
也歸泊船京口無疾而卒卒後朱彝尊有選鈔一帙王庭序而梓
之名曰二槐詩存其長干曲云揚帆下長江日落秋雲起夜半聞
鄉音知是長千里江皋曲云爲愛新妝好東皋出采蘋春江千里
色解佩不逢人客中九日云細雨成陰近夕陽湖邊飛閣照寒塘
黃花應笑關山客每歲登高在異鄉漂母祠云一飯當年報所知
王孫今日竟何之平生自歎無知己千里來尋漂母祠五言如江

湖長至日風雪上方山驛路通秦遠峰陰入晉多楓林依水盡雲
物近秋多一二故人在飄零清訊稀江山雄白下人物近黃初山
雪行人少江梅臘月多七言如夜月旌旗五馬渡秋風草木八公
山周道秋風行黍稷漢宮春雨長蒲桃西蜀諭通司馬檄中山謗
滿樂羊書三月晴風高戰鼓九江春水下樓船鑿語高華方虛谷
所云律髓也其詞曲有樞中怨詞苑春秋博浪沙諸傳奇頗慷慨
自喜遺橐多逸僅存百一而已周貧日崇禎之季詩歸盛行人沿
竟陵流派介人崛起禾中惟唐音是尙惜知己寥寥阨窮以歿伯
道無兒若敖不祀良可慨也

右文獻徵存錄錢林撰

國朝詩集卷之三十一
秋槐老人家故業染一手挾書一手數錢與布販菜傭相應苔好
製詞曲作統扇記忌者誣以詆毀里紳訟之官家計日落然詩日
益有名

右樵里詩繫張維屏錄

沈進

沈山子名進嘉興人少與秀水朱錫鬯同治詩日相唱和鄉人目
曰朱沈後結同里周青士賦古今詩合成一帙鄉人復以周沈目
之青士好周人急獨山子一介弗取惟招之飲不拒平居不憂貧
見青士貧則憂之語人曰谷風之詩忘我大德思我小怨夫人受
恩於人本無可怨思之思之而怨生焉祇見其小而已晚歲自號

知退叟所居藍村力闢屋三楹主人毀其一力不能補因日曰半
巢居教子異讀書其中陶然自樂也所著有文言會粹行國錄東
國詩藍村彙半巢居彙退叟行吟力圃蕭間詞袁溪文彙共三十
餘卷卒年六十四異居喪盡哀甘露降於室廬藤蓐者三人稱其
孝

石圃見錄吳德旋撰

沈進字山子又字藍村初名馭秀少人諸生既補學官弟子更今
名平居不憂貧性狷狹一介不取有詠燕詩細雨春江泛白沙東
風雙燕隊飛花金窗繡戶知何限不是王家是謝家嘗遊京師爲
譚侍御左羽客錢塘陸圻過彝尊書屋遇進問何人彝尊曰山子

也圻大聲曰得非梅花高館發春草斷垣生之沈山子耶相與飲
盡歡而散晚適桐鄉館於汪氏方飲酒席間杯入手一笑而逝年
六十四所著文言會粹行國錄東園詩藍村稟半巢居稟退叟行
吟力圃蕭閒詞袁溪文彙共三十餘卷

右文獻徵存錄錢林撰

屠廷楫

屠東蒙嘉興人少補諸生兵後棄去躬耕於郊野自食其力口不
言貧漢魏塘之交有寺曰白蓮其東偏曰橋鶴樓暇則鼓柁而至
曳杖登焉青士恆與期於此而方外大鐙亦能詩三人相與往來
靡閒大鐙年老而聾則相對書紙詩成撫掌或爾連信病而後去

青士既客死東蒙愴况不自釋未幾以疾卒又數年大銓亦死東
蒙名廷楫大銓字同岑

右聞見錄吳德旋撰

日本書紀卷之六

六

國朝耆獻類徵初編卷四百二十八目錄

文藝六

聶侃

毛晉 方士庶 謝淞洲

朱垞臣

吳嘉紀 陶季

費密 子錫琮

錫璜

雷士俊 陸廷掄 宗元豫

王巖

楊炤

鍾淵映

何之杰

范荃

車萬期

李長年 子國洪 孫人龍

陳梧 陶之采 譚元泰

廖元度 劉定基 常在

劉自旻

徐昌夏 弟昌支

易宗洛 謝天城 龍德懋

尹士枚

余懷

許友

藍漣

王時敏 王鑑

國朝詩林卷之五

俞時篤

柏古
許宗渾

陳脩

馮肇杞

邢昉

潘高

王武

湯光啓
黑壽

吳嘉枚

邵點

顧昉

張宏

沈卷

張潛

戴思望

國朝耆獻類徵初編卷四百二十八

通奉大夫前署江西巡撫江西布政使司布政使湘陰李桓輯

文藝六

聶侃

余歸田久課諸子孫誦讀之次間及當世人才足以起敝扶衰他日能爲民生緩急者長見文遠好言其同年生聶君與直云與直才量敏達爲人深身立德從無過舉丰儀秀整一望之爲貴人輒心識之辛未文遠公車還復言與直來聽選都下再一月當遂得官不意一疾遂不起言旣歎息不絕口鉛刀利割莫鄒塵埋天下事不如人意料者豈少哉歲且替其弟允功孝廉介其子大燿大

煊以狀來請銘情文凌厲言促而志傷大異世俗之所爲向固得
與直爲人今讀其事狀甚幸與直有子又益知其家學之有自矣
與直彞姓名侃世爲永安縣之貢川人曾大父諱文潭仕清河縣
主簿大父諱乾嶽父諱昇生二子次孝廉倣而君爲長少入郡庠
爲名諸生康熙壬子奉 上旨拔郡邑才俊讀書太學而君首膺
貢選在太學行輩推讓不敢與君齒伍大司成特器君用以教習
入旗子弟事竣吏部試高等得授縣令三十一年部牒趣君就選
又七月之十三日遂以病卒於京師時君弟試罷先期出都門同
年羅君南星及子兒文遠爲之親視含飯惟謹再月戒使者遂以
其喪歸按狀君父厲志家修抗言古昔疾時文科舉之弊以爲陋

劣破碎無益於時日以經史傳注之學用相指授君少卽解大意
長益博極羣書爲文嫻雅醇潔性孝謹十三失恃哭無時去三十
年久每言及淚承睫不能忍尤恥言貨利舉止進退一要於禮復
擅臨池雅有師法生平不爲崖岸斬絕之行爲人敬愛親疏遠邇
無異詞藉使君不死得領一邑行政設施必有可觀曾不獲一試
其用而又僅止中年此朋友之心旣宿草而猶有餘悲況其家之
子弟乎君娶嚴氏子二大燿大煊俱庠生能文章有名於世女一
配夏長嗣孫一峯孫女二俱幼君生於順治某年月日其葬也以
某年月日地在某山之原銘曰
謂天無親視德行胡不俾君壽而昌故豐所賦嗇所償蹴芝焚桂

國朝文獻通考卷之二
二
鋤蘭芳見久習便若蹈常或前者沈後者揚有宋眉山擅名場明
允遇薄嗟遺良南豐奮筆成哀章序述二子相期翔我當執辭銘
君藏卽以是語旌雲鄉

右墓誌銘黎士宏撰

毛晉 方士庶 謝淞洲

毛晉元名鳳苞字子晉常熟人家有汲古閣多儲藏祕冊自羣經十七史以及詩詞曲本唐宋金元別集稗官小說靡不發雕公諸海內有功於藝苑甚鉅所撰有今文苑毛詩名物考明詩紀事汲古閣珍藏書目刻書目方士庶字洵遠一字循遠號環山又號小師道人新安籍江都人善畫山水王司農後推一作手工詩有環山詩鈔謝淞洲字滄湄號林村長洲人布衣工書畫精於鑒古世宗特召以內府所藏命其鑒別

右傳王廷詔撰

182-104

182-104

朱垞臣

崑山朱恬野先生以經學爲人師東南學者從之遊多以儒顯由是古學大興先生子而琦舉康熙壬戌進士解褐需次里居而先生卒踰三年聽除輦下以狀屬德嘉誌其墓嗚呼年壽有時盡而教澤之在人心則無窮東海先賢有后蒼衛宏者皆以注經講學傳後世若恬野何多讓焉德嘉與而琦齊年知先生家世爲悉誼不可以固陋辭按狀朱故中州甲姓唐宰相敬則是爲始祖其後有官於宋者扈高宗蹕南渡居崑山中洛涇遂隸籍爲崑山人數傳至諱維新者生熙洽明萬厯癸酉鄉舉甲戌進士知潛江縣有善政累官貴州按察使司副使晉階亞中大夫崇祀名宦鄉賢

貴州公生萊太學生萊生日鏐萬麻王子舉人累官福建布政使
司右參政管延平府事崇祀鄉賢福建公生三子伯陞臣以貢知
富川縣仲堦臣縣諸生先生居季母譚恭人原諱璧臣更諱塚臣
字子通一字恬野先生早慧甫十齡悉通四子五經大義十五屬
文有奇氣福建公教授中都會江西章大力署天長諭見先生文
大獎賞當是時江西陳艾章羅四子論文多彈駁而大力獨逢人
籍籍崑山朱公子先生由是知名尋受知會稽倪公補郡學諸生
婁東張受先采負盛名先生執經其門文益雅馴福建公官京師
則從之京師崇禎十一年秋福建公奉差臨清在圍城中且累月
先生聞之憂思廢寢食明年福建公以工部曹郎事下詔獄譚恭

人在京而先生里居蒼黃附漁舟渡江風浪惡漂落金山洞泆舟
垂覆矣幸而濟是時齊魯間白晝多剽劫先生賴兩豪士掖以行
至京灑泣拜譚恭人塵沙蒙面不及盥漱走請室先生哽咽酸楚
而福建公故慰藉之同繫傅司馬宗龍賀弱庵鼎黃石齋道周咸
稱其孝石齋於是以道學節義相期許先生敬諾職藁體定省凡
十有八月有詔原出獄先生奉福建公譚恭人南歸會旱荒且疫
僵尸載道土寇李青山焚掠淮北日經行瓦礫村墟中夜則枕戈
待曙十七年南都立國福建公復補冬曹郎筦節慎庫捐例開庫
金出納皆先生手劄記精晰無纖毫繆誤福建公奉璽書之閩取
道崑山會游兵道梗宵行晝伏先生出奇計脫於難又六年兩尊

人相繼下世先生事兩兄及諸姊皆極友愛於宗黨咸惇睦盡禮從父涵之歿五十年族伯叔兄弟歿遠者二三十年近者數年皆不克葬先生次第經營葬之少時稟家訓貫穿經史時時從外舅朝水問業博聞強記游京師於政刑理亂人材消長朋黨顛末邊疆要害宦豎竊柄緣起歷歷可指數令通籍服官當大有所建豎以顯名天下遭時齟齬絕意仕進竟以布衣諸生老矣先生故家子然食貧家無長物與元配王孺人相敬至白首而課而琦兄弟最嚴授徒且數十年子壻李備五少孤先生教之迄於成王建伯李成九兄弟皆受經垂三十載而琦乘閒請曰大人春秋高矣乃辭李氏講席會王編修醇叔沈汰歸里固請先生課其子編修王

孺人從子也先生往講席程督語輒驚座雅好飲雖多不亂王編
修爲而琦言君尊人強固若此縱令躋伏生壽甯憂齒豁哉會如
廁失足歸當臥疾時猶追說往遊京師所歷搢紳先生及有明三
百年興衰倚伏聽者娓娓忘倦踰兩月而卒嗚呼衛敬仲作漢儀
四篇載西京雜事先生按討掌故不啻過之后氏曲臺記當西漢
立於學官至明世廟攷求古禮以近君爲禮之宗詔崇祀孔廟稱
先儒后子而先生質行禮讓皆可爲後世法先生賢矣哉先生生
某年某月某日卒某年某月某日葬某山之原子口人孫口人銘
曰

標紉峰震澤水氣鬱盤鍾於此吉人藏千萬禩簪筆銘柱下史

右墓誌銘金德嘉撰

右墓誌銘金德嘉撰

吳嘉紀 陶季

吳嘉紀江蘇泰州人布衣家安豐鹽場之東洵地濱海無交遊自名所居曰陋軒貧甚雖豐歲乏食獨喜吟詩晨夕嘯詠自適下交當世郡人汪楫孫枝蔚與友善時稱道之遂爲王士禎所知尤賞其五言清冷古淡雪夜酌酒爲之序馳使三百里致之嘉紀因買舟至揚州謁謝定交由是四方知名士爭與之倡和嘉紀工爲危苦嚴冷之詞嘗撰今樂府淒急幽奧能變通陳迹自爲一家所著陋軒集多散佚友人復哀集之爲四卷其詩風骨頗邁運思亦復剴刻特爲一時推重云陶季寶應人初名激字季深以字行復去深稱季人咸目爲陶季幼負異才潛心經史既棄舉子業專肆力

國朝老成類行不制 卷四十二
於詩古文詞與萊陽董樵同以布衣遊輦下樵字樵俱以一字爲
字遂賦詩定交稱莫逆焉時方 詔舉博學鴻儒公卿爭欲薦季
力辭不就性嗜遊北抵燕趙南浮湘沅西踰太行東歷海岱所著
詩多於舟車中得之因名舟車集王士禎刪定其客滇南閩中諸
詩以高岑龍標相况所著湖邊草堂集及舟車集二十卷才鋒踔
厲風發泉涌雖陶鍊未至而跌宕有餘洵能取法盛唐翛然自適
其性者

右 國史館本傳

處士名嘉紀字賓賢一字野人泰州人家州之安豐場地濱海斥
鹵居人煮鹽爲業性剽悍喜鬪遇凶歲或天下多故卽起爲盜平

居無事口舌憤怨輒殺人處士獨以溫然儒者居其鄉初學科舉後遂棄去閉門窮居蓬蒿土室名所居曰陋軒終日把一卷苦吟自娛晚年善病或并日一食不以告人里人不知也近海多暴風疾雨水涌數丈鹵地爲魚場人絕粒動稱凶年處士廬舍污窪每歲水至常及半扉井竈盡塌苦吟不輟其爲詩工爲嚴冷危苦之詞所撰今樂府尤淒急幽奧皆變通陳跡自爲一宗近代嚴棲之作鮮有過之者積既久稍稍流傳於時爲周櫟園王阮亭兩公所知兩公官省郡強致之力疾一出布衣草履低頭座上終日不出一語兩公善譚論每說詩樹議鉤致處士數語微中而已兩公雅重之卽送歸海濱處士生平不妄與人交所善惟三原孫豹人枝

蔚邵陽王幼華又旦休甯汪舟次楫歙縣郝羽吉士儀處士時飢寒不給舟次羽吉每緩急之其見知於周王兩公也則舟次延譽焉王公既得處士大悅戲謂舟次云野人固冷今因君熱矣處士篤於孝友其諸兄有死於鬪者竭力以殮其遺孤逋場稅爲州吏所撈掠處士匍匐營救州吏聞其名卽省釋處士生數子皆不學或春賃無以自資故處士閉門以窮老終年六十有八所爲陋軒詩若干卷版行於世處士既卒之明年幼華以都給事中典廣東鄉試返命紆道揚州哭之畱金其家時舟次亦以翰林奉使海外憂歸爲經紀其葬遠近義之余交處士稍晚嘗屬余序其詩至是余兄舟次命爲傳不獲辭處士素謂余知之也

論曰歷代處士亦紛紛矣或被徵不屈或拜爵還山若周黨伏而不謁樊英應對無奇而范升張楷之徒輒有異議不亦難乎惟終始巖穴束帛不加沒身而後挹其高風斯爲絕俗矣嗚呼延陵庶無譏焉

右傳汪懋麟撰

吳嘉紀字賓賢一字野人泰州人布衣屏處東海自名其居曰陋軒因以名集有陋軒詩集四卷家安豐鹽場地濱海無交遊獨喜爲詩王士禎爲揚州推官見其五言詩清冷古淡雪夜被酒爲其詩序馳使三百里致之嘉紀大喜過望買舟至廣陵謁謝遂定交後周亮工招之至遂與四方之士交遊倡和士禎笑謂人曰一箇

冰冷的吳野人被君輩弄做火熱自是不終其爲魏野楊樸而野
人詩格一變矣其自題陋軒云閉門二十載霜雪滿頭顱治亂從
當世箠瓢自老夫空階苔半掩頰壁樹全扶寥落無鄰舍乾坤此
室孤玉鉤斜云莫歎他鄉死君王也不歸年年野棠樹花片路旁
飛宿白末村云樹孤愁獨夜人老適他鄉訪道間上人云花落客
行少鐘殘門未開元日云東風今日至老態一番新寄吳介茲云
舊宅徧秋草寒蟬鳴落暉康山燕集送王黃湄遊豫章云登高花
刺眼勸酒淚霑巾登康山云木葉下淮甸冥鴻去不還俯仰何所
遇但有江南山落葉云年年怨搖落多事是春風又我昔詩效袁
景文云我昔兵過獨還家畦上觸骸多似瓜空村無聲雞犬靜籬

菊自放霜中花天南伯兄天北季驚魂棄絕鄉園地夜寒鬼語聚
稍稍細雨還聞九頭鳥吳介茲曰讀吳野人詩如入冰雪窖使人
冷畏沈德潛曰漁洋詩以學問勝運用典實而胸有鑪冶故多多
益善不見痕迹陋軒詩以性情勝不須典實而胸無渣滓故語語
真樸愈見空靈然終以無名位人予持此論而或不以爲然試平
心讀之近人中有此孤懷高寄者否確士之持論如此然野人詩
自可傳必謂可方駕阮亭毋乃爲過情之譽耶

右文獻徵存錄錢林撰

陶季

陶季字季深實應人以字行又去其複字止稱季四方識與不識

咸曰曰陶季陶季云季深早失怙恃崇禎末天下亂挈妻子避地
吳趨有運期德耀之風福王南渡後棄諸生不事而專肆力於詩
古文詞性耽遊覽嘗之燕之齊之晉之吳越涉八閩浮三湘七澤
遊屐所到聲名翕然其所著詩多於舟車中得之因名舟車集脩
然詠歌自適其性清厲忼爽無一恟怳蕉萃之音蘄州顧景星所
稱爲二百年來山林無此作者也嗟夫世之號逸民者大率先貞
後黷蒼黃反覆如北山移文所譏能終老蓬華矣或沒世而文采
不表見於後世槁項黃馘亦無取焉故必隱逸與文苑合傳一洗
終南捷徑之辱而逸致閒情實能與元真子甫里先生後先競爽
乃所謂難能而可貴也如季深者其庶幾焉

右小傳鄭方坤撰

江蘇人

11

This image shows a page from a document with a grid structure. The grid consists of 10 vertical columns and several rows. The columns are separated by thin vertical lines, and the entire page is framed by a thicker border. The page is mostly empty, with some faint marks and noise visible, particularly along the right edge. The overall appearance is that of a scan of a physical document.

182 - 120

費密 子錫琮 錫璜

費密字此度號燕峰新繁人著有鹿峰燕峰等集王漁洋池北偶談此度少遇獻賊之亂遁身西域已乃溯江漢遊吳越居淮南老焉嘗流寓秦州州守爲除徭役于曾見友人几上其首篇有句云大江流漢水孤艇接殘春問之乃密句也遂與訂交密跋一足後往蘇門謁孫鍾元先生稱弟子而學益純正云吾蜀詩人自楊升庵先生後古風凌替得費氏父子起而振之其詩以漢魏爲宗遂爲西蜀名家

右 國朝全蜀詩鈔小傳孫桐生撰

費密字此度成都人流寓秦州有朝天峽云一過朝天峽巴山斷

入秦大江流漢水孤艇接殘春暮色偏悲客風光易感人明年在
何處妻子共霑巾涇縣雜詩云權歌起清夜野服過秋城又云市
人羣鹿豕邨路出煙霄又翟村云更欲求佳處何能勝此山又平
居云雲移峯頂寺花落雨中邨又聽解二彈琴云谿澗潺湲春雪松
風出暮林又冬菊云寒枝當北牖野色耐霜天子錫琮錫璜皆工
詩錫琮登北固山云潮來徐福島山出寄奴城錫璜有子夜變歌
云東門楊柳枝早晚遭攀折今日是相逢明日是離別

右文獻徵存錄錢林撰

費錫琮

費錫琮字厚蕃四川新繁人著有白鶴樓詩厚蕃爲高人此度長

子克傳家學五言亦有大江流漢水孤艇接殘春之槩新城王尙書惜未見其詩

右 國朝詩別裁集小傳沈德潛撰

費錫璜

費錫璜字滋衡新繁人密次子著有掣鯨堂詩集別裁集滋衡熟古樂府蒼莽中時有古音生平豪放不羈嘗登之采投其詩於海中痛哭而還蓋自傷才之不遇而求交於天吳陽侯也其好奇如此古體直接漢魏近體追蹤盛唐雖生當亂離時露噍殺之音識者當悲其遇而惜其才矣

右 國朝全蜀詩鈔小傳孫桐生撰

--	--	--	--	--	--	--	--	--	--	--	--	--

雷士俊

陸廷掄

王巖

宗元豫

雷伯顛名士俊居江都之艾陵湖幼補諸生後棄去專力經史百家熟悉古今治亂得失之故辨別君子小人消長進退之機著有艾陵文集二十卷卒祀郡學鄉賢時興化陸懸圃亦篤志史學以能文知名與寶應王築夫往復辨難於邪正是非之際尤斷斷懸圃名廷掄著有酌酌堂文集築夫名巖初爲諸生名天祐及更今名遂絕意科舉學專治古文爲人端嚴動止進退語默皆中程度事母以孝聞所著有白田詩文四卷異香集二卷築夫於人少許可而獨盛推興化宗子發謂子發高節自好庶幾有古人之風子發著史論數十篇識解獨出雜文數十卷別有識小錄紀二十一

史中瑣事凡若干卷子發名元豫潮州府通判萬化子也萬化卒於潮行萬里扶櫬歸貧不克葬乃疏食不除服餘十年始得買地以葬自是遂不復應進士舉

右聞見錄吳德旋撰

宗元豫

君宗姓金陵上元人其先世爲宋忠簡公澤後因忠簡墓在京口遂自義烏徙家焉八世孫英烈公必大又自京口徙廣陵之興化已復遷上元隸籍焉故君爲上元人君幼清秀十五補博士弟子員時居舊京爲江南都會海內屬承平久祖繕部公父潮州司馬皆豪舉好客所與交悉一時名儁士君雖少時已駸駸名讓江國

爲王謝家佳公子矣未幾潮州公沒遭國變遂棄去諸生服避地
高郵湖西再徙昭陽土室中謝去一切惟日窮訂經史卽羹藜飯
藿時有不繼如是者垂二十年論著之暇顧獨喜從芑山張先生
游時芑山匿跡秣陵居草庵中亦惟君得相與往還不絕也故其
學問文章得之芑山者爲多君爲文出入經史立言必有根據無
矯激隳突矜奇弔詭之習溫醇典雅一程之矩度嗚呼明至神熹
後文散亂極矣誇囂軋茁纖靡吞剝剝襲之弊無所不有時卽有
一二才哲之士思起而振之而力未逮遂侵尋胥溺而迄於亡君
每竊以爲憂而遂有兩漢文古詩賦之刪旣而曰有原矣無委可
乎於是又取唐宋明十大家唐明詩諸家刪之吁嗟乎君貧士也

一布衣處草茅之下而欲以區區韋素之力挽頽風變積習其爲願也不已奢乎然而特守貞求志淬礪名檢考古證今博學強記推原於本末之際著論立說發矇開曠冀有功於世道何其偉也悲夫惜乎其未有遇也藉使君生當其會得時行志立於公卿之上主衡文之柄如韓文公之在元和歐陽文忠之於熙豐元祐時其爲起八代之衰變五季之習無難耳乃令其徒存草土重以貧困流離挫折結轡鬱抑遠廬之下而爲窮愁者之著書也哀哉余與君締交久意相得甚聚合時非登高憑遠卽商榷詩文正訂經史閒燒鐙夜坐燭跋漏沈至述往事話衷曲感遭逢則輒其低垂哽塞無一語如不能勝吁時蓋未嘗不徬徨累慨泣下霑衣也君

諱元豫字子發晚更號半石嘉靖中有學憲公諱臣與李攀龍王世貞相倡和世所稱七才子者君之族叔祖也以別駕公諱節者爲高祖秀水丞諱伊者爲曾大父繕部司諱世中者爲大父而潮州司馬諱萬化者則君考也初娶賀光祿丞寅所公女再娶蔡文學臣溥公女子男二長熙五歲殤賀出次勳年二十五未娶先君沒秦出子女一適學使徐公孫某賀出以康熙丙子十一月二十三日卒於京江之寓舍享年七十有三卽以是年十二月初七日葬於忠簡公墓之對隴其撰著則有兩漢文刪古詩賦刪臥游錄唐宋明十大家文刪唐二十家明二十家詩刪志小錄韓杜合刪焚餘彙文三卷詩三卷既葬余次君生平而爲之志如此嗟乎憶

國朝文獻通考卷之四百一十二
癸酉春余臥疾君來視余屬曰儻不起敢以墓志累君君曰無憂也自今吾二人交相訂君前吾爲志吾前君爲志死生之言各勿相負當是時吾病方劇故以志屬君者而孰意今吾竟爲君志也乎哉銘曰

歸依賢祖何必反乎故墳文章不朽安用有其後人卽二者已自足愬於君故得藉以銘之幽宮以慰君之魂

右墓誌銘冷士崑撰

楊炤

潛夫名炤字明遠世江右清江人也大父諱某賈於吳家焉今爲
吳之長洲人潛夫得入其學爲弟子員父諱某號古農以詩名於
天啓崇禎間挾策游兩京公卿無不屣履迎古農者潛夫在髫髻
能誦陶杜詩爲五言有警句父友上元顧與治高溇邢孟貞咸歎
異之甲申乙酉之際古農攜潛夫歸鄧尉山買田築室爲終隱計
潛夫遂棄其博士舉子業而專肆力於詩規模少陵字櫛句比不
失尺寸故其所得真率渾成絕去雕飾虞山錢宗伯故善古農見
潛夫詩益喜且高其志爲序而刻之有魯兩生漢四老之目時潛
夫年始三十也虞山沒婁東吳司成王奉常亦稱焉而尤爲甯都

曾燦益都孫寶侗萊陽宋琬所激賞故其詩益有聞於時大抵潛
夫既專摩少陵爲詩史之學五十年中市朝改易陵谷變遷苟可
以寓其感憤者皆於詩乎發之至二千餘首都爲五十卷可謂夥
矣而有爲之言爲多宜諸公之並稱之也性伉爽與人交一見如
舊相識抵掌傾吐無不盡非其意雖素親暱匿影搖手深閉而不
能見也居常早起汎埽堂宇竟日拄戶危坐家人無敢跛倚聲欬
其側者年七十預爲終制攷於禮經家禮而折衷焉曰吾將服以
見先人敢不謹乎每語諸子曰一旦不諱氣絕便殮殮畢便葬毋
擇時日毋訃親友毋延二氏作功德奠以菽水惟老人名心未淨
節衣食之餘以我友某某所選我詩如千首剞劂告成亦一快也

歲爲此言又七年而卒三子基堂在奉遺命唯謹同人歎潛夫爲有子云

贊曰潛夫之及先文靖公門也由貴陽楊少司馬先文靖公一見識之曰此古農子也時古農遊招遠而潛夫將就童子試先文靖公舍之二株園堂之西偏此潛夫與余兄弟締交之始也五十有七年矣茲其子述遺命具行狀羅縷數百言來乞傳余爲撰次之他弗著論其詩獨詳亦潛夫之志夫

右家傳徐柯撰

--	--	--	--	--	--	--	--	--

鍾淵映

嘉興鍾廣漢名淵映年二十餘所爲詩文已能度越流輩其居恆
遇人勝己者執禮法甚恭至不如己者或相對終日不與語以是
鄉曲之士嫉之如讎嘗與其友朱錫鬯期其注五代史記旣而錫
鬯游大同轉客太原廣漢遺其書數百言謂五代之主其三皆起
晉陽最後劉旻三世固守其地思覽其廢墟考其遺跡未幾游京
師出居庸關暴病卒錫鬯與譚舟石集廣漢古今詩二卷刻之廣
漢之至京師也囊所著書數千言謁長洲汪茗文因相與辨論六
經諸史之原流詩歌古文詞之利病夜漏逾四十刻猶不止茗文
深嘉許之故於其卒也爲詞以哀之詞曰文木雖美遇匠則斲植

梨果蒞實盛則剝是而所是非而所非氣壯且銳持此安歸故曰毋以物傷身毋以身殉名已乎廣漢其亦知之耶使其有知又將誰尤

右聞見錄吳德旋撰

何之杰

毅庵長於予二歲崇禎十年與予同入學爲諸生越七年明亡與予同哭學宮同被薦於監國魯王爲西陵軍監軍而予避南山君避之潘泉之濱各不應 王師渡江東予髡首爲頭陀而君病咯血又同爲隱居各不赴試當是時君年二十三與同邑徐君芳聲從游於劉忠端先生之門講理學於畱軒其於詩文泊如也予時薄理學以爲徒事論辨非躬行無益乃與仲兄錫齡同邑蔡仲光始甯徐咸清山陰張杉窮易詩尙書論語孟子及三禮春秋三傳而與同郡張梯徐緘沈肩范祁班孫姜廷梧縱橫爲詩古文詞旣已選越郡詩若干卷行世矣及見毅庵詩愛之大概其詩在崇禎

之季曾作贅壻於畱都京兆王盤峙公之幕與畱都知名士往來唱酬故有詩因出已所贖與徐緘與君合爲一集名越州三子實不知其詩之有避忌與否也毅庵故自負不善下物遇所好者雖百詆毀不爲動而意稍不合卽不少假顏色且喜於任事遇鄉里有公幹必身任不少卻當三藩弄兵凡東甌進剿者一切糗糧芻秣轉運軍前悉責之閩左而罷官解民力不堪值和碩康親王統王師南征毅庵叩馬訴其事且侃侃有論說親王聽之立飭改官解並切責州縣官州縣官皆恨之切齒邑有西江塘爲海潮所衝漂沒廬舍每修築不能起而近塘居民益復開窪洞以灌曠田毅庵爭於官民以多金餽毅庵毅庵拒之由是塘患息而怨者四起

有言毅庵作詩刺當官者州縣官得其詩無如何乃搜其舊橐深
文其詞字而指摘之謂犯國禁死罪係累之押以官兵渡江赴軍
門下杭紹二府會勘於吳山之城隍廟毅庵對簿無所詘有吏大
聲曰日重光何也曰頌禪代也東朝繼世與興王嗣國凡有光於
前代者當時皆頌曰重光虞書曰重華協于帝孟子曰於湯有光
是也此樂府題也何以曰紀遼東曰此亦樂府題也隋帝征遼東
而詩紀其功凡後儒之頌功德者皆得和之我太祖不嘗下遼
東乎夫遼東勝國之地而謂當諱之吾不解也明朝者何曰詰旦
也以詰旦而爲勝國則會朝清明不惟在明朝且在 本朝矣清
戎者何曰清軍也以戎兵而爲戎敵則整我六師以修我戎不惟

戎徐戎並戎周宣矣然則曷爲夷曰裔也舜東夷文王西夷也且夷與夏對今我有方夏煌煌中三祖蒞中國而撫四夷誰夷我者夷我者大逆當反坐曷爲虜曰攜也成爲王敗爲虜寇不敢以明爲虜以明本王也寇雖勝然亦未底於成也若我則成之者矣且我自敗寇以來南征北討其自中及外有何一非我所虜而反以虜我大逆當反坐詰者無以應乃曰評選汝詩者誰也曰一徐緘死矣一毛某見爲侍從官恐非此所能詰者況行文舊習評與選皆身爲之並未嘗出二人也時巡撫金君提督學院王君皆儒臣各言諸所詰不當入官無學術徒多事貽笑士類 聖天子儻聞此將以我輩爲何如人而按察使佟君直據嘉興錢氏例凡舊刻

文卷有國諱勿禁其清明夷虜等字則在史館奉 上諭無避忌者乃責紹興知府胡君蕭山縣劉君各紀過一次使自新而毅庵竟免先是康熙癸亥行省修通志聘毅庵入志館纂修人物其有不得者悉思於此際斲之至是散去會 上謁禹陵毅庵迎

駕望京門外獻南巡頌十章 上命收其帖及還京 特註毅庵名並書其頌 敕總督王君訪里居所在獎之乃屏跡東郊與同邑武進士張君道士蔣君講參同之學對坐蓄氣夜臥能見物然終不效年七十九卒所著文爲家人所燬同邑蔡仲光山陰張杉與予家所藏彙俱於是時里族相戒擲於爨鮮有存者毅庵諱之杰字伯興又字毅庵邑人其先三世入御史臺有名父鴻臚公好結

納家有園亭其在里曰百尺樓在郊曰梅花樓賓客至多游二樓
間今百尺樓改爲祠宇而梅花樓廢子三仍炎倬炎任炎皆文學
銘曰

人生亦何常兮搏丸撐壁徒比蜣蝨兮嗟嗟百年吾親見滄與桑
今有何恩怨到此應借忘兮其所難恃亦惟此文章兮與其埋石
室又何如藏火房兮君嘗夜坐見有光兮試觀寢室猶煌煌兮

右墓誌銘毛奇齡撰

范荃

江都范石湖名荃本名恆美字德一石湖其自號也博學多文不應有司試慕宋范文穆公詩詞故號其號年七十自撰盟鷗野老傳盟鷗亦文穆軒名也卒年七十三自書墓石曰今之石湖所著有讀史小識二卷竹隱居隨筆二卷范氏家乘作宦津梁若干卷文集四卷詩集五卷梅花詩一卷其詩餘有春雨詞一卷秋吟一卷秋花雜詠一卷柳塘寤語一卷今之石湖詞一卷石湖生北湖之濱隱居教授弟子著錄者甚眾而同里郭引年謝鉉玉最知名引年名嗣齡康熙中以進士授松江府學教授罷官歸而卒著有古文偶存集玉山詩集印山堂經義彙鉉玉名九成初名鼎後更

今名著有鶴墅詩鈔二卷樂府學步吟二卷湖上謝氏譜一卷以諸生終湖中學者治時文率宗王文恪而輔以歸震川胡思泉號爲有師法大抵皆郭謝二人之教而石湖實啓之石湖歿後百餘年湖中焦孝廉禮堂求其遺書不可得已而知在城南陳素村家乃訪之素村慨然以石湖遺書畀禮堂則皆石湖手跡尙完好也蓋其始石湖之女壻蘇節臣藏之以授子謙蘇氏微藏於蘇之戚簡氏家其後簡氏又微陳與簡氏有連故書歸陳陳又藏石湖遺像白鬢方面布巾繭袍坐竹牀牀上集書卷一几置花尊插秋花數枝一童子奉杖右一童子進杯茗左石湖詩集中稱張際五畫張際五者名志雲其先鄞人也父以材武得官防禦多善績獲罪

免官僑家揚州之北湖而浮海賈貨以舟溺蕭然無一物存恥見
妻子不肖歸際五少長棄家出尋父過中吳渡錢塘江歷天台雁
蕩間所攜止筆墨素紙到處見山水花樹鳥獸皆握筆摹其似漸
卽所見人貌之稍異者收之紙上自覺此技可通於神旣求得父
所在父曰吾老矣歸何以食際五日見筆可代耕也父疑之與徧
訪吳越間老畫師示以所作畫幅輒太息稱爲絕倫父乃肯從際
五歸際五後竟以畫名家亦能詩

右聞見錄吳德旋撰

日本書紀卷之六十四

甲

車萬期

車萬期字朋百邵陽人康熙時歲貢著有兩石齋彙

寶慶府志萬期性坦率胸無畛域而好吟詩家貧甚嘸飢號寒吟嘯自若

右湖南文徵羅汝懷錄

日本書紀卷之二十一

三

李長年

子國淇

孫人龍

李長年字而眉湖南桂陽州人有文名知州陳邦器大歎異之與訂交且刊行其集康熙中以貢生授訓導不就居家敦睦任卹爲時所稱子國淇有學行孫人龍字靈川九歲能文康熙丁酉舉於鄉性篤孝母病入山訪醫遇虎當路前祝之虎弭耳去母病尋愈以文名馳譽湖湘然卒不第晚得知縣未幾卒

右傳李元度撰

陳梧 陶之采 譚元泰

陳梧字鸞栖湖南攸縣人郡廩生嘗冬行遇老叟凍脫裘以贈三
藩初平武陵令李爲觀以軍政獲罪時大旱中丞丁思孔甫莅事
得澍雨梧作喜雨賦數千言李假以獻得釋李致謝梧笑曰故人
知君君不知故人耶同郡陶之采字庶常甯鄉人以諸生入太學
授州同知總督丁思孔試湖南以之采冠七郡桃源文志鯨次之
志鯨旋入史館語人曰吾爲南宮第二人無足喜喜爲諸生時見
知丁制府次陶先生後相與頡頏耳其推重如此譚元泰與私臣
茶陵歲貢生喜吟詠嗜學好古內翰劉賓門遺子師事之名流謙
舉鄒席賦鐵馬長律百韻坐客驚服著有長春韻語賓日樓文集

右傳李元度撰

廖元度

劉定基

劉自燧

常在

廖元度字大隱湖南長沙人諸生通經史工詩歷游名山大川所至傾倒值滇變覆巢毀卵子居僧寺八年晚築息機園因湖廣通志局遺藁編輯全楚詩起皇初迄明季名曰楚風補後又輯國朝詩名曰楚詩紀閱十年乃成乾隆中知府呂肅高爲梓行之元度性喜客而畏近要人當事慕之往往求一見不可得所著有雪蕉堂集嶽游草奧吟藁秋思百韻覆巢餘草息機園草諸集子樸謹厚質直克守父書同郡劉定基字子肇以湘潭籍餼於善化學幼有盛名工詩古文詞性澹泊不營家產放情山水間康熙甲寅吳逆脅以僞職辭不獲遂祝髮爲僧賊平反初服歲辛酉領鄉薦

劉自烜字媚若攸縣諸生學使黃仲霖於經義外試平沙落雁詩
奇其才特拔之巡道南陽彭而述延爲院長命其子師之康熙二
十三年知縣余三奇補修邑志公舉烜纂修志成郡守見其序事
詳覈復徵修府志著有螺溪草堂集又常在字雲石道州人博學
能文不求仕進嘗修州志稱善本詩歌高逸與同州魏希範何大
晉許魁有四才子之目

右傳李元度撰

徐昌夏 弟昌支

徐昌夏字鴻軒武陵人康熙朝貢生

耆舊傳鴻軒與弟昌支昌運昌口皆有詩名時稱四徐

右湖南文徵羅汝懷錄

徐昌支

徐昌支字崑流武陵人康熙四十四年舉人著有佷山草堂集

常德府志徐昌支累上公車輒報罷歷黔楚齊魯所至名公卿相
引重先後入提鎮高其位巡撫李發甲幕湖南北分闈之議昌支
實贊成之

右湖南文徵羅汝懷錄

--	--	--	--	--	--	--	--	--	--

182-156

易宗洛 謝天墀 尹士枚 龍德懋

易宗洛字公錫湘鄉人康熙時歲貢同邑謝天墀字帝颺號蕪泉亦康熙間貢生著有夢草亭集百卷

長沙府志宗洛好學植品縣令延修縣志第季自相師友子姪多以文名

右湖南文徵羅汝懷錄

尹士枚

尹士枚字如攻號懷園湘潭人康熙時貢生

耆舊傳懷園三十未知名自潘書原先生宗洛督學湖南拔置第一刊其文爲多士程式名遂大著

龍德懋

龍德懋字其人安化人康熙中歲貢生

長沙府志德懋與邑人郭洪起同修邑志家裕好施迄家窘無悔

右湖南文徵羅汝懷錄

余懷

余懷字澹心一字無懷號漫翁又號曼持老人興化莆田人僑居江甯懷生明季才情艷逸傷亂流離詞多悽麗嘗賦金陵懷古詩新城王士禎以爲不減唐劉禹錫贈之詩云千載秦淮水東流繞舊京江南戎馬後愁絕庾蘭成鍾阜蔣侯祠青溪江令宅傳得石城詩腸斷蕪城客太原閻若璩亦言父執余澹心詩今人不能到隱居吳門徜徉支硎靈巖間八十餘卒長洲尤侗輓之云贏得人呼魚肚白夜臺同看黨人碑魚肚白者金陵市語染名也懷與杜潛白夢龍齊名號余杜白故云有味外軒橐子賓碩以淹博聞

右傳陳壽祺撰

余懷宇潛心別號曼持老人莆田人流寓建康生於明之季年傷
亂流離詞多悽麗嘗賦金陵懷古詩孫楚酒樓云江城西畔酒樓
紅無數楊柳迎春風孫楚去後李白醉千年不見紫髯公勞勞亭
云蔓草離離朝送客驪駒愁唱新亭陌夜深苦竹嘯鷓鴣空牀獨
宿頭俱白尙書王士禎咨賞之以爲不減劉賓客謝公墩云高臥
東山四十年一堂絲竹敗符堅至今墩下瀟瀟雨猶唱當時奈何
許雨花臺云雨花臺上草青青落日猶銜木末亭一綫長江三里
寺千年鶴唳九秋螢朱雀航云紅旗曾挂大航西日暮蕭蕭疏鳥
嘯野火閒雲空滿地橋邊風雨夜淒淒撰板橋雜記三卷記狹邪
事哀感頑豔亦泗水潛夫記武陵舊事意也懷與杜濬白仲調齊

名號余杜白懷自松陵至樵李舟中雜詠云一河春水漲桃花小
艇隨風日未斜蝴蝶紛紛滿芳草獨憐遊子不歸家竟以客死徵
歌選曲有如少俊吳偉業贈詩云石子岡頭聞奏伎瓦官閣下看
盤烏

右文獻徵存錄錢林撰

按余先生又著有東
山談苑意主勸懲

許友

許友初名宰字有介一字甌香福州侯官人父彞明崇禎四年進士官浙江甯紹道提學副使友師事會稽倪元璐 大清康熙中以諸生終善書畫詩尤孤曠高迥秀水朱彝尊稱其篇章字句不屑蹈襲前人如俊鶻生駒未可施以鞴勒酷慕宋米芾構米友堂祀之有米友堂詩集子遇字不棄一字真意順治間歲貢生受詩於王士禎尤工絕句知陳畱縣調長洲卒官有紫藤花庵詩鈔孫鼎均皆能詩鼎字伯調雍正元年舉人有梅巖集均字叔調一字雪邨康熙五十七年進士選庶吉士改吏部主事嚴正勇任事擢禮部郎中以薦出稽江南虧空卒於揚州有玉琴書屋詩鈔族兄

魏字天玉明崇禎十二年舉人順治中官安定知縣善新城王士禎士禎作慈仁寺雙松歌贈之稱爲閩海奇人有鐵堂集許氏累世擅三絕閩房亦嫻翰墨風流文采蔚於海濱云

右傳陳壽祺撰

許友初名宰字有介侯官人父豸明名進士官浙江提學參議友少師事會稽倪元璐入本朝以諸生終友善畫工書詩尤孤曠高迥嘗有句云野航人遠雁聲低新城王士禎愛之采入詩話友又有作畫絕句靈谷皆梅放未曾石頭懷古不堪登無端傳就松鍼筆畫出青山是孝陵

右文獻徵存錄錢林撰

藍漣

藍漣字公漪侯官人康熙間布衣父鏞善篆隸漣工諸體詩及畫書有父風遨遊江湖在吳越與吳偉業毛奇齡交在嶺南善陳恭尹梁佩蘭詩磊落有奇氣百餘年以來閩越稱詩以張遠與許琬爲冠漣次之年八十餘卒有采飲集

右傳陳壽祺撰

西暦一八二一

三

王時敏 王鑑

王時敏字遜之崇禎初以蔭歷太常奉使楚閩餽遺一無所受入國朝杜門稽古益工詩文兼精隸書畫法爲海內所珍

江南通志

太原王時敏相國文肅公錫爵孫翰林衡子也資性穎異淹雅博物工詩文善書尤長八分而於畫有特慧家本富於收藏及遇名蹟不惜多金購之嘗擇古蹟之法備氣至者二十四幅爲縮本裝成巨冊載在行笥出入與俱以時模楷故凡布置設施鉤勒斫拂水暈墨彰悉有根柢以蔭官至奉常然淡於仕進優游筆墨嘯詠煙霞爲國朝畫苑領袖平生愛才若渴故四方工畫者踵接於門得其指授無不知名於時海虞王翬其首也卒年八十有九

畫

徵錄

右 國朝畫識馮金伯錄

王鑑

瑯琊王鑑精通畫理摹古尤長四朝名畫見輒臨撫務肖其神而後已故其筆法度越凡流直追古哲而於董巨尤爲深詣元照視太原煙客爲子姪，而事實相若互相砥礪竝臻其妙世之論六法者以兩先生有開繼之功焉知言哉 畫徵錄

吳偉業送王元照詩始興公子舊諸侯丹荔紅蕉嶺外遊席帽京塵渾忘却被人強喚作廉州朔風歸思滿蕭關筆墨荒寒點染間何似大癡三丈卷萬松殘雪富春山白注汪善書畫弁州先生孫

偶來京師舊廉州守也 吳梅村集

王文簡士禎題圖照小畫瑯琊家世鳳麟洲翰墨人間第一流松
勢高低疑鶴啄溪光參伍學蠶頭扶筇名岳雲峯細放鶴空亭雪
棧幽白首奉常今又死買絲重擬繡廉州 漁洋集

右 國朝畫識馮金伯錄

俞時篤 柏古 許宗渾

俞時篤字企延錢塘諸生與章士斐諸君砥礪爲古學同郡許光祚嚴調御皆工書時篤盡窮其妙請乞滿門至廢匕箸老而貧頗資之閒學畫遂與北苑南宮頡頏嘗自笑曰此中山水清絕僅供俞生飽粥耳詩亦婉麗有法度

錢塘縣志

俞時篤錢塘庠生字近蘇米兩家畫有石田餘意

國繪寶鑑續纂

右 國朝畫識馮金伯錄

柏古

柏古字斯民號雪耘浙江嘉善之白牛涇人篔簹屢空喜作山水遊寓西湖日雨秋微上北高峯頂曰此真米南宮高房山藍本也

時至珠街鎮寓圓津禪院每當賓客宴集輒袖其所作掀髯雜誦
旁若無人又嘗出遇耕牛揖之曰此真不愧素餐矣人以爲癡不
知其胷中介然也

青浦縣志

右 國朝畫識馮金伯錄

許宗渾

柏古父子之後有許宗渾者字箕山居白鶴江好吟詠工繪事與
任演交最深性情疎曠其所棲止往往在琳宮佛院閒與柏氏父
子名相埒焉

青浦縣志

右 國朝畫識馮金伯錄

陳脩

陳脩字擴潛廣東惠來人邑諸生家貧嗜學棲山巖刻苦自勵其學以程朱爲本又喜讀遷史莊子書舉子業規樞王唐不肯逐諛闕以從時好屢不得志於有司脩亦不以此爭得失抱負益豪一時文人執贄者爭先後有士弁者聞其名以百金聘卻弗受曰阿齡雖飢弗食陶粟吾豈與雁鶩爭哉晚歲文益古而道益窮嶽奇歷落竟不遇以卒年七十七

右傳藍鼎元撰

馮肇祀

馮幼將肇祀越之會稽人爲子總角交少時間作山水人物花鳥極奇秀每出人意料三十後遂棄去一切惟寫梅竹蘭石有求者輒應之取適己意初不計工拙也幼將竹宗湖州眉山派知之者絕少嘗爲友人畫徑丈壁盤礴揮毫頃刻就如身入茂林中清風拂拂又寫數枝於友人齋燕雀見之羣飛停宿至墜地友人捧長幅數丈乞爲寫蘭幼將潑墨甫就香氣滿室賓客以下無弗聞者性冲融深理解偶爲賞音標舉觸引不窮至眾賓雜坐誼闕紛還默如也爲詩文及詞曲雜文有當世知名之士不能望其階屺者而往往爲其所掩幼將亦不與之競書學南宮通內經素問家言

醫藥多奇驗

讀畫錄

右 國朝畫識馮金伯錄

邢昉

邢昉字孟貞一字石湖高淳人少日爲諸生有名明末社事大興
淮服江表之間孟貞實爲職志每酒壇詩社座以爲無車公不樂
同道爲朋流言不信聲氣廣乎翕然四應明社旣屋敦壘上履二
之節伏處湖濱謝去舉業不事泉明之柳當門仲蔚之蒿塞徑彈
琴賦詩蕭然有以自樂其於人世聲利之途蔑如也最工詩五言
清真古澹從韋柳門庭中來陳仲璣謂孟貞詩無一暢懷語如讀
孟郊東野集令人不權施愚山與相友善其沒也爲輯其遺詩以
傳王阮亭尤最所稱賞悵未及友其人官祭酒時鄉人李某注令
高淳特屬訪其後人李至問之則老妻穉孫煢煢孤寡餽粥恆苦

不給李脫贈三百金爲置腴田百畝俾免飢寒而其家竟不知誰爲爲之嗟夫羊舌下泣之仁邱成分宅之誼豈所望於素未識面者哉錄此用表古道且以誌文人身後之遭也

右小傳鄭方坤撰

邢孟貞者名昉高淳人少負遠志年十九爲諸生試輒高等一日爲衡文者署其卷曰太狂閱末藝曰更狂不之錄也孟貞曰士爲文得以狂名足矣何問其他遂謝去一意於詩歌古文出遊四方與海內名流相角逐詩愈工歸而築室石曰湖濱家貧取石曰水爲醇酒沽之以給食湖水清酒美高淳酒由此名所著有石曰前後兩集

右聞見錄吳德旋撰

潘高

潘高字孟升金壇人有南村集王士禎云孟升五言學韋柳余愛其清真古澹謂可與邢孟貞王言遠頡頏陳其年與余書曰有潘高者貧而工詩久別無可言者祇此一物奉獻有憶得一絕云寒鴉穀穀雨疏疏燕麥風輕上紫魚憶得往時寒食節全家上冢泊船初然高尤多婉麗之作春歸云江水悠悠送畫橈東風何處不魂銷春歸萬里無消息又過垂楊舊板橋竹枝詞云一種沙禽一種唳鷓鴣格格洞庭西行人早到黃陵泊莎草連天日又低雨窗同吉人象明作云細雨絲絲溼淺沙嬾竈池閣客分茶雙扉不上鳩鳴午落盡城南山杏花又雨後寄象明云芳草初晴路桃花帶

兩村寄梵川諸友云人隨春水遠鳥帶夕陽還金陵詩社諸名流賦秦淮曉渡詩多以長篇逞奇高曰我年老才竭只二十言也其詩云潮長波平岸鳥曉月過階一聲孤櫂響殘夢落清淮眾人見之為斂手

右文獻徵存錄錢林撰

王武 湯光啓 黑壽

王先生武字勤中明太傅文恪公六世孫也以諸生入太學少時風流伉爽不屑意舉子業自讀書賦詩外若投壺蹴鞠彈碁馬射技擊之術與夫莖花種樹參魚籠禽之方無不通究而尤長於畫素擅鑒賞嘗王氏家門鼎盛其先世所遺及平時購獲者率多宋元明諸大家名蹟往往心慕手追務得其遺法故其所寫花鳥動植信意渲染皆有生趣家本饒裕而王先生雅不事生產數爲徭賦所困又性好施予親故間或有負之者亦槩置不問計一歲所入輒緣手盡以是其家遂落甫壯乃屏絕諸好獨以高潔醞藉自持所居爲文恪公故第其菊怡老園有亭榭花木水石之勝恆與

賓從及諸昆弟具蔬果酒食觴詠其間值其空無時亦必清坐相對談笑移日不倦家既益落而所作畫益工諸好事者評王先生畫雖前輩陳山人道復陸處士叔平不能過也前太常王翁煙客亦善畫尤亟稱之曰近代寫生家多畫院氣獨吾勤中所作神韻生動當在妙品中於是其聲譽大譟四方士大夫走書幣造請者日夕相屬寸縑尺素流傳遠近莫不鄭重藏弄甚有作麝筆以售者京師貴人爭慕王先生名出兼金訪求其畫不能得內閣宋文恪公卽王先生姊婿也方貴顯於朝移書招王先生入京師先生笑而不應嘗語人曰古之善畫者莫一非高人傑士以文行著者也如有如文恪公諸客沈徵君唐解元文待詔之屬其人皆能爲畫

重不則畫豈能重人乎蓋晚而自號忘庵或徵其說王先生告之曰魚相忘於江湖人相忘於道術今予之補朝息機於此也世忘予乎予忘世乎兩相忘則去道也近矣其寓意超卓如此年僅五十有九卒於家爲人孝友愷悌與人交不設城府所遇無貴賤長少率委曲相款洽居平善病晚歲病屢發不復多作畫故人有貧乏者輒強之使作王先生欣然執筆曰願以佐吾子晨夕需族父年老有孫女不能嫁王先生復力疾爲作數幅俾鬻以治匱具客有以病諫者王先生曰吾財不足而力有餘敢自愛耶先是積藏諸名蹟及他玩好甚夥中歲斥以易薪粟幾罄矣疾旣革又命諸子盡山篋衍中所餘贈遺諸親故無復存者琬聞其訃爲之潸然

出涕曰此吾吳之老成典刑也自今以往吳中豈復有斯人比乎
蓋一時鉅公勝流俱推重王先生畫而琬獨愛慕其爲人以為王
先生素行匪特長者也蓋有古達人遺風焉故願爲之傳

前史官汪琬曰吾吳故多高隱之士前明自淵孝先生杜瓊石田
翁沈周顧祖辰子武陸治叔平之流莫不以善畫有聞流風餘韻
迄今爲吳人所稱說越百數十年而王先生始繼起王先生文章
詞翰雖視石田稍遜顧其風尚標置略與淵孝子武叔平相伯仲
惜乎享年不永而世之稱王先生者又以畫拚其名德予不勝爲
之太息云

右傳汪琬撰

湯光啓 黑壽

湯光啓字式九高士王武弟子也武爲明太傅整裔孫讀書避俗
寫花卉翎毛遠師趙昌邊鸞近法陳淳陸治而生平慷慨赴義家
中落卒爲清門光啟寫生盡得其傳而好義亦復相似遇友朋急
難幾欲忘身晚歲家蕩然藉筆墨餬其口幾於三旬九食亦略無
悔心也嘗誦寫生以生動有書卷者爲上工緻而乏天趣雖貴重
不脫匠氣深此藝者謹其言 長洲縣志

湯處士葯房精畫花鳥年七十九卒於黃埭

詠歸亭集

右 國朝畫識馮金伯錄

黑壽

滿洲黑壽高尚不仕樂與江浙文士遊人稱滿洲高士善畫山水
學董文敏

右 國朝畫徵錄張庚撰

吳嘉枚 邵點

吳嘉枚字个臣號介庵補錢塘弟子員文譽謙一時貢入太學名
駸駸日上卒落拓不偶乃益發藏書晨夕蒐討寄興吟詠君雅好
臨池兼工點染筆精墨妙居然米家書畫又善別古人款識絹素
尊彝羅列左右見者謂有雲林清閨之遺焉 良齋集

介庵先生生長西湖兩峯蒼雅之氣盤結於心胷手擊形諸吟詠
冲夷淡宕閒染煙墨亦復生趣盎然晚年慕延陵季子之風僦居
吳門濠上中構壺山草堂左圖右史嘯歌自得 釋宗渭紺池小草

右 國朝畫識馮金伯錄

邵點

邵點字蘭雪太學生爲浙江之餘姚人隨父遷蘇州少孤孝事其
母慕古人刻苦爲文工書得虞褚法畫似雲林嘗賣字畫以養母
入都遊太學見知於相國柏鄉魏公裔介由是合肥龔端毅宣城
施大參皆與之遊試京兆者五不售卒於京師有四可齋燕遊詩
三卷田鬣淵金俊明序之刻於家

吳縣新志

右 國朝畫識馮金伯錄

顧昉 張宏

顧昉字若周華亭人工山水師董巨及元四家骨氣清雋而高厚所謂有筆有墨者也洵爲畫學正宗嫡派嘗寫徐凝廬山詩意圖王石谷跋云若周畫道深入古人之室而筆無纖塵墨具五色別有逸致蓋自骨中帶來非學習功力可及此圖高古莽蒼氣韻溢於紙外尤近來不多見之傑作也可謂知言

白苧村桑者曰華亭自董文敏析筆墨之精微究宋元之同異六法周行實在於是其後士人爭慕之故華亭一派首推藝苑第其心目爲文敏所壓點擬拂規惟恐失之奚暇復求乎古由是襲其皮毛遺其精髓流而爲習氣矣蓋文敏之妙妙能師古晚年墨法

食古而化者也學者當求文敏之所以師古所以變化則不難獨
開生面而與文敏抗衡不當株守而自域文敏論畫云同能不如
獨詣至言也人皆閱而不察何哉若若周可謂獨詣矣

右 國朝畫徵錄張庚撰

張宏

張宏字君度號鶴澗吳人工山水蒼勁雅秀蕭疎淡遠吳中學者
都尊之余嘗見其滄浪漁笛圖松柏同春圖不讓元人妙品

右 國朝畫徵錄張庚撰

沈卷 張潛

沈卷字煥曾簡栖從子也善畫山水工寫照蕭然高寄以詩自娛
與簡栖有竹林大小阮之目 松陵詩徵小傳

右 國朝畫識馮金伯錄

張潛

張潛字子晉松江人畫宗董文敏具體而微筆瓢洒巷技以人傳
者也子孝昌能文善畫 今世說

潛諸生工翰墨能詩家貧狷介自守當歲除有貴人贈以脫粟不
受與同郡林貞父相友善聞有饋遺則受之曰林君固知我者畫
山水氣韻生動論者謂得北苑之神 婁縣志

國朝畫識馮金伯錄

右 國朝畫識馮金伯錄

戴思望

戴思望字懷古休甯人能詩詞工書法畫宗元人峯巒林壑清疏
澗澗秀逸骨潤寢入其室矣每一藝成輒自矜爲希世之寶性狷
介有潔癖妻死不再娶扁舟往來三吳兩浙間遇佳山水輒畱戀
不忍去聞畫家輒訪友之然不肯輕許可能鼓琴善諧笑或有時
旬日不語人謂癡絕類虎頭猝搆風疾而歿

白苧村桑者曰余見懷古所臨名蹟彙本如王廙詰峩嶠雪霽圖
王叔明修竹遠山圖江貫道秋林孤嶂圖每於山石林木閒必加
評語卽此足以見其好學亦足以規其癡癖矣

右 國朝畫徵錄張庚撰

周起辛贈戴懷古詩戴子起羣士丹青天下無山川開絕異草木
使榮枯詩律自應細書名慎作奴長安何日到好與辦時趨
倚玉
堂詩錄

右 國朝畫識馮金伯錄

國朝耆獻類徵初編卷四百二十九目錄

文藝七

楊長世

沈用濟

邱天民 賴鏡

華坡 華胥

馮班

徐蘭 徐夔

邵煥 從弟覺

屈大均

田錫田

諸君簡

孫祁雍 黃雲許表被

安璿

劉續邵 張鎮嶽

李桂品 冀璫 郭璽

王為瓌 弟為垣陳一揆

彭鳴霄

吳祖修

張忽

錢陸燦 族孫良擇

林佳蔭

蔣坎

文在茲

李琪

身月... 建... 一

周士彬

汪士雲

牛樞暉

國朝耆獻類徵初編卷四百二十九

通奉大夫前署江西巡撫江西布政使司布政使湘陰李桓輯

文藝七

楊長世

先生楊姓諱長世字延會庚號六逸贛州瑞金縣人生而聰穎五歲就外傳卽屹然如成人弱冠籍諸生楊固望姓其家維節進士文學汝基汝時皆有重名當世先生一出而前後並驅無敢軒輕崇禎間蔡忠襄公懋德視學江右拔先生第一江右人士經蔡公拔識者多半爲館閣方面大臣而先生屢試不一售康熙初乃需次庶明經歲薦步入長安赴廷對歸卽高隱不出選授得興安

縣學訓導亦辭不就官優游二十餘載得年八十有七終於家先生通才雅望蚤歲取富貴有餘遇合不時晚始除半職而先生心則倦遊久矣先生經濟文章不爲無用之學會平亭一邑賦役絕偏枯之害邑人至今守之其平生出人之險急人之難唯力是視不爲名高又熟識當世典故援據該博數千年事如指目前瑞金縣誌出先生手訂其所著有詩文若干卷行於世古人云天下無官者八九豈盡皆高士卽耄耋期頤亦人所時有若先生進退行藏不失其正殆昌黎氏所謂鄉先生歿而可祭於社者歟先生舊籍廬陵宋紹興中始遷瑞邑曾祖諱萬珂公祖諱春旦公考諱可炳公元配鄧孺人繼謝孺人生明萬曆丙午九月二十九日卒清

康熙壬申三月二十一日以康熙三十五年某月日葬於某山之
原首某趾某男子四人長以熊次以兼庚子舉人任河南彰德府
涉縣知縣次以介邑增生次以凌邑庠生以熊以凌先卒女子一
孫十一人女孫七人曾孫十二人嫁娶皆名族子託交先生者三
世與涉縣君又有婚姻之好也誼當銘銘曰
貢水以東關西著族豫章蔭塗下無凡木經訓蕃畚篤生博士踐
履孔姬檢括二氏冰雪聰明塵土圭組我望古人疇則耦伍三世
屬交知公爲最有道斯阡執辭無媿雲物所都山川縈帶翠柏蒼
松清風好在

右墓誌銘黎士宏撰

									UNIVERSITY OF TORONTO LIBRARY 130 St. George Street Toronto, Ontario M5S 1A5
--	--	--	--	--	--	--	--	--	---

182-202

沈用濟

沈用濟字方舟錢塘人國子生少喜吟誦及長出遊一至山東登岱岳又之楚之閩之粵東西與屈紹隆梁佩蘭友詩益大進又之邊塞留右北平一變爲燕趙聲一時名流幾莫與抗然以詩質同人或譏彈之登卽改定不自恡也居長安安和親王蘊端號紅蘭主人重之用濟婦朱柔則嘗以畫卷寄用濟主人題詩云柳下柴門傍水隈天桃樹樹又花開應憐夫婿無歸信翻畫家山遠寄來用濟卽日歸一時傳爲美談用濟詩若燕山云我行經燕山憑弔古戰場當時銳頭兒誓死事戎行功業未得成金鏃遺山岡阜鵬加車輪飛來立人旁黃雲散四野風沙浩茫茫驅馬行出關悲歌

西京雜記卷之四十四
三十一
慨以懷身著短後衣劍佩百鍊鋼扼吭度飛狐仰面看天狼生當
爲冠軍死當爲國殤大同道中云千嶺朝陰嶽三城控大同雲形
隨列嶂山響應瑯弓馬躡黃河雪鷹呼白草風飛狐那用塞天險
古來通又沙乾奔渴馬風急下飢鷹大行山云山作潼關險艱哉
勢獨雄千盤拔河內一折走遼東大壑雲雷伏陰崖日月通巍巍
天下谷元氣結鴻濛八達嶺云策馬出居庸盤迴上碧峯坐窺京
邑盡行繞塞垣雄夕照沈千帳寒聲折萬松回瞻陵寢地雲氣總
成龍潼關云重關踞天險三輔重神京繡嶺遙尊岳黃河曲抱城
一夫今保障羣盜苦縱橫星隕何年事常傷父老情自注謂孫
督師傳庭窺
關如在井立馬一峯高境失山河險徒誇汗血勞沙蟲迷白日陵

谷徙洪濤翻使黃巾笑橫行遇汝曹登建陵云鼓棹辭西粵開帆
趁北風水聲飛弩下山勢鬪雞雄雨歇秦關外秋深蜀道中稻梁
謀故拙吾愧信天翁行經將軍猛虎諸灘云高高灘十丈直下響
成雷舟擲波心去人穿石窟來虹蜺雙瀑挂菡萏小峯開濁酒酌
三老傾危仗汝才昭平道中云灘勢奔騰下舟行次第高瀑流爭
一石人力盡千篙壁峭奔雷雨林深聚羽毛江鄉歸未得夢寐亦
風濤花田云埋玉傳南漢花田今尙存雪中香不散煙外月無痕
芳草尋詩路青旗賣酒村漫將蝴蝶數一一美人魂望西岳云五
千仞削勢崔巍西鎮坤維玉作臺海日夜從金掌出蓮花春向石
盆開宮臨白帝三峯立城繞黃河九折來欲跨茅龍問酒母芝田

堪種乏仙才湘江道中云越客歸舟向洞庭心隨一雁入空冥煙
開沅水雙流合帆轉衡山九面青魂返江楓哀楚些曲終瑤瑟怨
湘靈振衣已出塵埃外漁父何因笑獨醒由麗江抵北流云頻年
鞍馬歷荒陬唐代羈縻是此州猺峒千蟠攀嶺怯鬼門一綫入天
愁朝昏吹角呼林鹿婦女張弓射野牛卻望伏波銅柱在飛鷲跼
跼海西頭題謝皆人詩後云紅桂飄香月露清玉完天上奏瑤笙
白頭弟子秋風裏來賦霓裳第一聲笥溝早發云北風獵獵水茫茫
茫多謝吳門鼓柁娘鐵鹿長檣四千里送人夫婿早還鄉黃河大
風行云黃河之水自天落我舟來向黃河泊遙看雲氣如飛龍知
有東南大風作大風一起天茫茫排山倒海不可當浪花捲起高

十丈虛擬沈牛截狂象危檣大觸撼不停霎時飄散同流星高岸
倒震體鼓裂怒濤亂捲蛟涎腥暝來打篷聲膈膊半爲雨點半冰
看夕陽欲下風更狂吹落孤帆天一角一舟重有萬鈞力墮入泥
沙脫不得一舟觸石摧鵲尾窺見青天在船底水面一舟飛鳥輕
無枝可棲心目驚其餘湏急難鼓柁客船十箇碎兩箇同泊尙餘
四五船船船相觸繩相聯長年當風立至曉我輩安得高枕眠近
見青齊成水府況聞中州少安堵皇天降災良有因汝曹定觸河
神怒不爾風濤何太苦男兒勿恃膽氣粗要知蹈險非良圖新河
安穩路徑直汝何不趨趨畏途豈惟黃河爲畏途波瀾平地無時
無下潮陽云似聞風雨作前有大灘來一氣雙江合孤城百粵開

龍身移島時蜃口出樓臺倚棹懷湘子橋成力大哉小泊云竹誼
歸鳥後村靜飼蠶時天啟德陵云內豎一朝祠宇徧爰書三案士
林空懷宗思陵云一劍割將公主愛九門報道寺人開有方舟集
杭堇浦言未刻在閩藩張廷枚家袁子才嘗以書詢沈歸愚欲刻
之江南終不得錄其全篇爲多歸愚云在張少弋家少弋廷枚宗
人也長安陶友蘭愛其詩臨卒命以方舟詩集置棺中亦一異人
母柴靜儀善詩有貽子用濟送行詩二首云吾子廉吏孫讀書味
生理三十未成名徒然還鄉里外侮旋復來內憂方未已忽然遠
行役披衣中夜起明星光在天河流正瀾瀾行雲有返期猶子靡
所止攬涕下高堂長途從此始野雀從南來翩翩思擇木感此主

人賢飛鳴集其屋才地非獨優處卑願亦足矧有嘉樹林朝昏託
栖宿鷹鷂過莫窺爵羅無由觸哀彼黃鳥詩長謠念邦族著有凝
香室詩鈔若干卷用濟室朱柔則寄遠曲云恨少垂楊柳殷勤繫
玉鞍夕陽鴉背暖春雪馬蹏寒入世逢迎拙依人去就難癡兒唬
向我昨夜夢長安

右文獻徵存錄錢林撰

方舟貧老無子依參議終身

參議張廷
枚三韓人

右榕城詩話張維屏錄

紅蘭主人諱岳端安親王子安節王弟也善詩詞崇德癸未時饒
餘王曾率兵伐明南略地至海州而返其邸中多文學之士蓋卽

國朝書目類傳卷之三十一
當時所延致者安王因命教其諸子弟故康熙間宗室文風以安
邸爲最盛主人喜爲西崑體嘗迎朱襄沈用濟等爲上賓方舟妻
某遲方舟久不歸作杭州圖以寄之當時傳爲佳話主人嘗選孟
郊賈島詩爲寒瘦集以行世以宗藩貴胄之尊而慕尙二子之詩
亦可謂高曠矣

右錄宗室昭榘撰

按紅蘭主人諱
蘊端初名岳端

邱天民 賴鏡

獨醒邱姓名天民曲江諸生工畫善翎毛枯木野仙人物皆用臃腫怪筆尤善畫虎嘗結屋深山中觀生虎形狀得其神蒼茫返舍取筆就粉壁圖之犬一見皆驚仆爲之遺矢一日訪友人於任所贈之金盡市奇書怪石以歸自是畫益進曲江以畫得名者莫不首推焉其弟半醒亦善畫予猶及見之又傳獨醒畫虎嘗鐙下伏地作虎跳躍狀取影圖之如活虎云

廖燕七十二松堂集

右 國朝畫識馮金伯錄

賴鏡

賴鏡字孟容城西人少讀書增城白水山亦號白水山人逃禪丁

壽寺性雅淡工點染山水筆力遒勁氣格高凝有沈石田風致一時聲譟五羊吳越人官粵者往往欲求其一箋一筆而不可得作詩清削幽異自成一家字近倣文衡山遠則蘇長公時共稱其三絕云

廣東通志

右 國朝畫識馮金伯錄

華坡 華胥

華坡字子山少與顧貞觀杜詔等爲詩社亦善畫晚隱居坊前之
鄒莊流水孤村柴門一曲興至則吟小詩或解衣盤礴終歲閒甚
除夜獨子子有事或問之曰古人祭詩吾兼祭畫取一歲所作詩
彙畫本享以乾脯酬以苦酒聚而焚之著詩集十二卷華氏文獻
集五卷 無錫縣志

右 國朝畫識馮金伯錄

華胥

華胥字羲逸無錫人工畫人物士女密緻而不傷於刻畫治而清
豔而逸古意猶存其水墨者直參龍眠之座 畫徵錄

華胥善畫人物與暉壽平花卉王翬山水並稱秀麗豔逸所畫老子出關圖最工

無錫縣志

右 國朝畫識馮金伯錄

馮班

馮班字定遠常山人論詩宗晚唐不取嚴羽妙悟之說嘗謂熟觀
義山詩可免江西粗俗槎枒之病王士禎曰班博雅善持論著鈍
吟雜錄嘗云朱子言禮稱鄭康成後儒不從也卻用陳澹註程子
極信詩小序後儒不從也卻從朱子又云祝字有去聲後人則作
咒詛字錢受之不知也訊諱是一字王弼州不知也作文字不可
不講字學論文多發前人所未發但斥滄浪不識一字太妄鈍吟
雜錄凡九種家識二卷正俗一卷讀古淺說一卷嚴氏糾繆一卷
日記一卷識字帖一卷遺言一卷通鑑綱目糾繆一卷將死之鳴
一卷班著述散佚其猶子武哀而成編非士禎所見本矣趙秋谷

一見欵爲至論至具朝服下拜嘗以私淑門人刺焚於定遠墓前
游仙詩云書邀女伴看桃花三鳥回時滿地霞記得明朝是丁卯
青童又台上東華玉洞桃花又爛開等閒相望隔塵埃劉郎也似
山中水一到人間使不回畫屏云時世梳妝色色新吳娃偏自小
腰身修蛾雲鬢能多少枉向楊林賦洛神無題云叢桂風多起夜
遲柔腸已到九迴時瑠璃窗外姮娥影喘殺吳牛自不知梅花云
長廊盡處是東牆柳絮風中見謝孃今日不堪簾外樹一枝和粉
弄斜陽臨桂伯墓下絕句云馬鬣悠悠宿草新賢人聞道作明神
昭君恨氣萋宏血帶露和煙又一春又摘句不知一夜前郵雨多
少春泥上燕巢是謂才人之筆風格在溫李小杜間有定遠集十

卷朱彝尊曰啓禎詩人善言風懷者莫若金沙王次回定遠稍後
出分鑣並驅次回以律勝定遠以絕句見長大都次回全學温李
而定遠多師其源出於才調集也

右文獻徵存錄錢枋撰

班論事多達物情論文皆究古法

右 四庫提要張維屏錄

徐蘭 徐夔

徐蘭字芬若一字芝仙常熟人學詩於王士禎又從安郡王走馬
出塞過廢城六單于蘇武雲內豐州殺虎土城祁連山中花十數
種皆豔絕不知名中土所未有嘗畫便面貽士禎土產有白草雛
鷹鼯鼠瑪瑙石酪酒瀚海距獨石口二千里有永樂御製碑五十
一字出塞後流寓北通州以終著有出塞詩長白描人物詩無一
語不奇如李長吉欲嘔心肝徐夔龍友見之幾於下拜歸化城雜
詠云髮離漢地根先白淚過秦山色變紅關山月云城頭一片秦
時月每到更深照黑河馬上萬人齊仰首不知鄉思是誰多出關
云憑山俯海古邊州旆影風翻見戍樓馬後桃花馬前雪出關爭

得不回頭燐火云土雨空濛著衣溼燐火如螢飛熠熠須臾散作
星滿天空際如聞眾聲泣有火獨明必鬼雄眾火吐燄無其紅約
束羣燐共明滅毋乃昔日爲元戎別有火光黑比漆埋伏山坳語
啾啾鬼馬一嘶風亂旋千百鎧從暗中出電光閃閃兩軍接狐鬼
草中皆震懾一派刀聲不見刀觸體墮地輕於葉血過千年色尙
新那知白骨化煙塵新鬼日添故鬼冷無復寒衣送遠人起輦谷
序云元世祖陵無封樹獵者或踐其地輒有風雷之異其詩曰聞
昔朱明修祀典曾命禮臣巡禹甸伏羲下逮宋理宗三十六陵皆
祭徧祁連因未入提封欲齋香帛無由從埽階席幄順天府春秋
送奠青芙蓉芙蓉青青亂雲宿中有三間老瓦屋征人遙望綠琉

璃知是元家起輦谷谷口番僧通漢字畱客招提話遺事自言歷

劫悟前身親見陰房築空翠巫媪纔牽靈馬來聖僧已渡流沙至

僧名朝爾吉

維時指點白豪光屢見君王顯神異天花鋪地化城紅夜

半山頭分舍利

元祖火化時得舍利甚多

東方日射雲窈冥背人入山埋寶瓶

地下有天黑如漆祕祝才宣入萬靈亂峯高下化機械俄頃萬壑
藏雷霆雪漬風吹不數日依舊滿天芳草青往年有客挾弓弩誤
入雲中蹋玉虎千雷萬霆出如飛百里人家苦淫雨至今鹿兔滿
巖阿馬蹏不敢驚黃土問余到處訪雲蘿中國名山想徧過聞道
長陵在天上此中靈異更如何

右文獻徵存錄錢林撰

徐夔

徐夔字龍友長洲人廩生有西堂集沈德潛曰少負才高俊讀書一二徧終身不忘與予結詩社時專學昌黎芒角四露至廣南後醉心義山謂以男女會合喻君臣事便得風騷宗旨格律又一變矣年五十歿於廣南詩散失有注李義山詩行於世秦淮雜詩云
半山堂外草萋萋安石墩前路易迷欲紀元豐天子聖天津橋外
杜鵑啼

右文獻徵存錄錢林撰

邵煥從弟覺

邵煥字振飛江蘇無錫人幼擅才名工辭賦困於諸生詩格近襄陽柳州其從弟覺字梁夫亦工詩煥與華龍翔陸慶元吳培源爲詩友稱四子慶元舉人官同知龍翔字丕光國子生工爲詩歌行長句出入韓蘇龍翔與潘果交善果詩亦長於七言古雍正元年進士任永順同知時士流初易相挺而起上官坐以激變罪下獄後釋歸培源學詩於杜詔後成進士詩格清整已刊行

右傳秦瀛撰

屈大均

屈大均初名紹隆字翁山又字介子番禺人少爲諸生遭亂棄去爲浮屠爲今種字一靈一字騷餘中年返初服更今名有九歌草堂集翁山詩外王士禎嘗語程可則曰東粵人才最盛正以僻在嶺海不爲中原江左習氣熏染故尙存古風耳金陵龔賢稱之曰龍章鳳姿輝映南海繆天白嘗曰詩有俚語經顧亭林筆輒典詩有庸語入屈今種手便超入越讀書祁氏寓山園不下樓者五月久之遊吳又數年忽冠服遊秦隴與秦中名士李因篤輩爲友作華嶽百韻詩固原守將某愛其才以甥妻之介子敦好述篤伉儷賦詩如同栖紅翠三花樹對寫丹青五嶽圖蓋少室作也自固原

攜妻至代州上谷走馬射生縱博飲酒甚儻不羈世俗嘲笑之不
顧也再遊京師下吳會自金陵還粵妻旋病死詩尤工於山林邊
塞一代才也攝山秋夕云秋林無靜樹葉落鳥頻驚一夜疑風雨
不知山月生松門開積翠潭水入空明漸覺天雞曉披衣念遠征
魯連臺云一笑無秦帝飄然向海東誰能排大難不屑計奇功古
戍三秋雁高臺萬木風從來天下士祇在布衣中送客云莫上高
樓望無窮是楚雲舊遊稀白髮獨往易斜曛木落諸峯見山空一
葉聞祇應盤石上閒坐對秋分湘中作云月出水天分微茫不見
雲蘆花千萬里如雪落紛紛似我愁心亂風吹不到君更憐沙上
雁野宿暮爲羣大同作云飲馬東連白道泉桑乾西接紫河煙何

年代邸淪秋草幾處秦城出遠天事去英雄着一劍時來游俠喜
三邊哀笳莫奏思鄉曲都尉臺前月正圓灘上吟云娟娟松枝挂
女蘿猿聲故向月中多征人一夕頭如雪三峽三瀧奈爾何客雁
門作云三年作客傍滹沱聽盡哀笳出塞歌白髮不愁明鏡滿秋
霜祇怨雁門多歸風詞云南越輕綃似碧雲裁爲飛燕御風裙中
流舞罷將仙去萬歲千秋復就君瀧中云一瀧煙雨一瀧晴瀧口
桃花夾岸迎風送猿聲滿城郭行人忽起故園情子夜歌云熒熒
桃李花薄命寄君掌河水雖東流河魚自西上又摘句山包甯武
戍河繞秀容樓天懸句注險水劃孟門開笙歌誼極浦風露滿孤
舟城臨湘水碧苑接嶽山青帆隨衡嶽轉雁背碧湘飛慷慨無衣

詩經卷之三

三

賦艱虞不世才馬躡三秋雪鷹吟萬里風

右文獻徵存錄錢林撰

田錫田

田錫田字青裴一字守田號堅瓠河南襄陽諸生松陽令起龍之孫性高騫不事生業僻處一室左右列圖史繞戶種橘數千頭手自灌溉暇則扃戶讀書旁考鐘鼎盤彝金石文字名苑書畫以及花草禽魚農圃醫卜之屬靡不究心工書法日取晉唐墨寶臨摹不輟皆得其宗旨然有意不如無意每用毛筆任意揮灑作擘窠大書縱橫超逸不減古人著書學偶錄若干卷始自倉頡捭制文字周禮保氏祖其意以六書教國子漢蕭何六體試學童列其名疏其義學書自漢蔡中郎得其祕於嵩山石室中遂爲書家之祖下迄有明詹孟舉輩遞相授受如禪家宗風相承各有主至章

續五十六種書法歐陽誦書法三十五則翰林密論用筆法二十四條林韞撥鐙法有四陸希聲有五李後主陳伯敷有七李華之二王逸少八法生化八十四法皆有援據言之歷歷書法源流云鍾繇掘韋誕墓得蔡氏法錫田按魏志謂鍾繇卒於太和四年韋誕卒於嘉平五年則鍾先韋死二十四年矣安得有發冢事想源流誤其他閒有駁證多此類劉太史芳草爲立傳載古汜城志

右傳張邦伸撰

諸君簡

杭之中稍東曰豐樂橋橋稍東曰古橋園故宋之橋苑也苑廢久
種橋已盡惟有古銀杏兩株盤輪扶疏疑爲宋苑物云園有主爲
諸君君簡君簡少好畫又學篆刻喜何震陳琮刀鐫時時見古法
然不甚自貴愛獨深受畫嘗自稱先君子博學游藝尤喜翰墨與
華亭董宗伯其昌趙文學左爲密交自其爲童子時旁侍觀兩公
用筆墨揮寫入妙蒼秀淡施董稱最工空濛瀟瑟趙爲之冠兩公
分閒互相放寫終不能自掩其真也君簡既好畫日取兩公畫及
諸家所作玩之久而融然化裁臻微予閒問君簡子此畫法誰氏
君簡笑曰吾且忘吾手安知誰法予聞而愴然不復知所問矣大

體得法於古人不必以甚似爲工蕭遠疎逸絕蹊逕矣君簡先世多顯官尊君伯茂公豪賢多貲至君簡而日貧君簡不知貧惟日弄筆墨自娛客過索畫君簡卽與畫然持錢來者甚少君簡亦恥役手爲金錢或持錢贈君簡君簡便受之午突無煙君簡得錢卽酤酒坐待所與密者過引壺斟酌醉而後已君簡交不濫不躡游好三四人周旋久之義亦彌篤室處委巷起居于于爾夫君簡身不習宦非逃者也畫不爲售非藝者也交不於上非爲名者也吾於君簡不知所以名之雖然豈其無得於中而能若是與歲旣暮銀杏葉方落矣不知近客來亦多遺錢否吾當過與君簡坐枯樹而飲

右畫記毛先舒撰

國朝書畫錄卷之二十九 文藝七

六

--	--	--	--	--	--	--	--	--	--

孫祁雍 黃澐 安塔 許表被

孫祁雍字季若江蘇無錫人年十二能文與高愈劉齊善祁雍爲諸生擅才名五十年遂甯張尙書廷樞以茂異薦有旨徵召謝病尋卒吳之枚王繩曾皆其高足弟子同邑黃澐字維觀詩工古體嘗效李東陽作擬古樂府百首雜之懷麓堂集中人莫能辨安璿字孟公好讀書工詩所至皆有畱題多識前朝遺事晚更研心理學所著書十數種亦善畫曾孫經傳諸生攻苦力學早歿子舉人吉刻其遺藁許表被字天章少爲諸生短小趨捷氣陵其曹偶研精詩禮春秋尤長於史學晚成一書曰諸史詠

右傳秦瀛撰

安璿

安璿字孟公希范孫廣居子坐臥罨畫樓藏書萬卷略皆穿穴詩
衝口贍逸所至皆有畱題旁工巖壑平遠

右 國朝畫識馮金伯錄

劉續邵 張鎮嶽 李桂品 冀璩 郭璽

閩人鄭方坤曰邯鄲本趙郡古稱多慷慨悲歌士閒從歷覽之餘見夫紫葛諸山扶輿蜿蜒從太行千里而來怪石盤陀可遠觀而不可褻玩而漳滏雙流淨不可唾如輪如帶作捉金夏玉之音人傑地靈固當以志節文章顯然自百十年來誌乘缺如一二先達貴人向籍籍在人口餘則稀矣以彼懷清履潔文彩爛然顧乃匿影銷聲終老牖下嘆天公之憤憤去白日之昭昭曾不如枯莖宿莽猶能畱根莖於人間嗚呼有賢不彰豈非官斯土者之責與不佞用是心惻故於百里內外凡所過村塾禪室必停車所遇筮叟醫翁必相延訪所見殘碑斷版以及投溷覆瓿之塵有存者必搜

別摩挲不忍釋手或因文以得其人或因人以徵其事有芳皆擷
無影不彰彼其所挾藝能固未必傾臻詣極然亦具有瀟灑出塵
之姿豪邁不羣之韻彼其我法自用雖未必粹然一軌於正然固
不掩其膠膠自喜之習與夫踽踽涼涼不屑不潔之槩傳曰人三
爲眾矧今又倍於以砭俗骨而振頹風顧不偉乎昔孫子荆有言
其山崔巍而嵯峨其水泔渫而揚波其人磊阿而英多竊援斯語
爲邯鄲表土風卽爲邯鄲人士作傳贊云

劉續邵字高風少補弟子員有文名性孤潔不可一世衣冠動作
迥與人殊每風日晴和輒出遊於市手一編且行且讀眾咸以狂
目之不顧也設帳於東明觀問字者履常滿說經鏗鏗尤熟於歷

代史抵掌談成敗如親見之間及忠孝節義事則色飛眉舞或泣下沾襟不自禁嘗游西韓巨室乃素所受業者念先生貧瀕行奉一篋金爲壽詰旦則招他弟子十數人至日與諸君別久矣未知所詣何如請試一文最佳者以此金贈有程姓者壓卷卽倒篋授之竟徒步歸門人張某嘗乘閒問曰人言師狂生不以爲然則笑曰人狂我我焉得而不狂也旣而歎曰命固然矣跡其行事殆古所謂欹崎歷落人耶

張鎮嶽字崧高弱歲能文下筆如兔起鶻落奇氣勃勃從十指閒出爲諸生試輒冠其曹熊鍾陵先生者以宿儒督學畿南視斯世文無一足當意卽所拔前茅士當廷謁頃擲試卷與讀輒嫚罵繼

之以扑諸學官弟子悉股栗顧獨咨賞鎮嶽文曰若張生者誠所謂鶩鳥累百不如一鶚者矣然鎮嶽殊落拓又耽酒每沈醉入棘闌遠納卷出宿醒猶未解以此輒報罷人或尤之笑曰非罪也命也易一命卽傳矣自是不復省試日棄產佐酒產盡則以書畫玩好之屬人酒家墟嘗客遊於永年武安因其文以取科名者蓋十數輩著作甚夥嬾不自收拾存者什一二耳後竟以酒病而卒

李桂品字蘭如邑諸生也博學善辨膽氣絕人明季館於武安方講業忽土寇至以刀擬之則大怒踞案叱曰若何爲者吾邯鄲李蘭如也俄而一錦衣怒馬者入曰聞李先生名久未辨真僞荅曰何僞也曰果真耶請爲數二十八將名則爲屈指數數已因掀髯

太息言曰此皆古烈丈夫奮其智勇際會風雲拯生民於塗炭紀
勳業於旂常視彼赤眉銅馬昧於逆順之機名污簡編而身膏斧
鑕者智愚賢不肖何如也寇大嘆服戒其黨卽遠去毋溷李先生
爲也後以連不得志鬱鬱成心疾閒月一發發則泣罷鼓歌莫能
自遏平生所最契者惟劉高風張崧高二人一日忽揭通衢以某
日於某所開講旣至寂不發一言或請之曰無解人旣劉高風至
乃言曰今人不但不知書理乃亦不識字義卽如子字應作了頭
兩點乃回頭顧母也高風大慟曰吾無母可顧矣柰何二人相抱
而哭竟日乃罷後以病卒無子

翼璉字長石按察使光祚之孫聰穎能文少卽工書法古帖臨摹

不下數千徧每搆一筆必凝精聚神而成之閱十餘年技益進出入於褚河南米襄陽之間而自爲一體家臨滏水之濱求書者趾相錯性願簡傲不受人偏促遇所欣適卽猥妓賣菜傭以敗素零款請者罔弗應其有不可卽富路貴人齎金帛來輒麾使去曰昔陶淵明不爲五斗米折腰後世稱之吾亦豈肯以阿堵物役吾擊耶其所作七言小詩最楚楚有致而僅三十二而卒長轡未騁而蘭玉早凋吁其可惜也夫

郭璽一名西字楚玉水村其別號志趣高潔有泥塗軒冕之風少卽棄去舉子業不事於先人墓田側築室數楹蒔花種菜蕭然有以自樂好讀書尤工爲有韻之言時曲周劉半舫先生主詩壇物

色之引而置諸騷雅之林於是三輔人士無不知有郭水村也者
其詠新月句云隔水森疎樹依山覺晚晴登山句云碧落含清景
鴻濛養翠微遊穴園句云隔屋邀山兼寺影閉簾選樹帶溪聲招
同社句云小窗細雨春如夢好友孤燈話卽詩讀其詩想見其爲
人冷韻遙情誠哉長江之別派而笠澤之橫枝也已

右小傳鄭方坤撰

廣東省立第一中學

四

王爲壤 弟爲垣 彭鳴霄 陳一揆

王爲壤字不石湖南龍陽人少慧能文於詩尤所獨嗜中康熙癸酉副榜挾所著臨沅集走京師先達爭器之薄遊吳越歸里一夕取舊刻盡削去投之江流己卯徒步走京師所造益深時楊超曾督陝西學政聘佐文衡嘗念岳有志而湖無志願乞一冷官買舟湖上勒成一編屬草未竟而卒陳養元爲梓其青原餘集弟爲垣字東注與爲壤並有文名時稱二王康熙甲午舉人雍正初應得補吏畏趨走卒不就年五十六卒一生剛直以齟齬終惟刻勵於詩文期昌其業曼衍澎湃已乃獨闢崖岸琢鏤完好一日寸裂其所著悉焚之曰知我者冥漠君也識者惜之同邑彭鳴霄字滄江

入歲解吟詩嘗建學舍植一槐垂蔭數畝榜曰聲槐堂集名流嘯
詠其中時邑人陳一揆纂修縣志與其考訂焉康熙丙子貢入成
均考授激浦教諭以疾辭不就晚好遊北走幽燕沙漠南遊禹穴
東臨泰嶽西入秦所至有詩紀其勝陳一揆字宅衡年十四縣府
道試冠軍旋由選貢入成均詩文膾炙人口中更離亂遂棄舉子
業闢墅城南以讀書論文爲事嘗參湖廣提鎮幕多所籌畫康熙
十年知縣蔡蔭聘修縣志初長沙廖大隱因奉檄修湖廣通志所
收大湖南北詩文大隱銳意纂刻而力不逮以屬一揆及武陵陳
應元應元前卒其子請一揆監修甫付梓爲大隱子所牽控巡撫
趙申喬爲白其事復給以遊資遂歷覽吳越所過名山水輒畱連

題詠磊落悲壯晚更歸於純粹其著述爲獨多

右傳李元度撰

按陳先生著有滄浪集
畝餘文集西津馭餘詩

王爲垣

歲辛亥季夏朔四日舅氏豐川王公卒於家將以某月日葬於某所秋九月鎮應舉入京師公配文孺人泣謂諸子曰陳甥知汝父銘之惟甥宜表兄載九奔走來告鎮大痛曰嗟乎鎮何能銘公也夫公一生以齟齬窮自刻厲於文詞期昌其業曼衍澎湃狎而遊之無有統極已乃懼其泛濫鉤心撻肺獨闢崖岸琢鏤完好特呈怪變旣與爲抹擬世亦駭而反走一日寸裂所著悉焚之曰知我者真漠君也蓋其中鬱積而發之激詭可哀也已少補弟子員食

廩餼性剛直簡略不能札腰矩步年四十八領鄉薦今上癸卯
釐別人才應得補吏畏趨走署冷曹非其好也卒不就年六十五
卒初疾革遺鎮書欲一面阿士託以後事予適亦臥疾背不往越
月走位哭文孺人曰若舅未易簣時自哀一帙戒曰焚餘得此天
或爲餘畱也以貽陳甥必能成我志鎮復痛曰嗟乎鎮何能成公
也夫公既坎壈厭仕進所著又盡燔棄疑若逃名者顧沾沾身後
慮然後知公之未始忘乎名也昔人謂詩人少達多窮如公卒窮
以死既無有氣力者獎拔使信於今又安必有與爲表章使傳於
後公顧拳拳於鎮如是意有自信必傳者固難爲淺識道也公諱
爲垣字東注不偶於俗惟與先君鹿山公交篤尹甯川時公往來

吳會鎮獲從遊竊其緒論故敢誌而銘之所著有浪山集六瀾集
家世能詩有隱德父諱道宏明經不第少與兄爲壤弟爲城兩公
齊名稱王氏三傑皆富著述亦以明經不得志卒公卒後湖南北
文士識與不識皆爲太息銘曰

嗟蚩蚩施倒持筐楮石柱摘髭公揭揭背以馳奇其數放厥詞彼
憤憤吠而噬後者知誰之司烏乎公冢在斯

右墓誌銘陳長鎮撰

按王先生六瀾堂集二
卷又著感秋集一卷

吳祖修

先生諱祖修字慎思姓吳氏宋宰相正憲公克之後世系詳先生所作松巖公行述中曾祖念陽公諱化祖延仲公諱嗣昌再世皆力學而不仕父松巖公諱朝中順治乙未進士歷知澄邁豐城漢川三縣事母沈孺人先生孝友之性著自孩幼九歲遭沈孺人喪卽哀毀如成人事松巖公怡怡色養兩從宦遊裴牀胡絹能曲成公之廉而襄其勞公以不肯迎合上官爲所中逋官錢甚多先生悉心經理并出所有館穀以償始得歸歸而家愈貧一味之甘必馨必潔迨公棄世先生年已五十而嘯如嬰兒子處聖室必杖而後起事長兄以敬撫羣弟以慈推而至於從兄弟亦恩義交盡一

門之內無閒言焉讀書尤有異質總角年賈誼治安策一夕而通其大旨屬文後下筆輒千百言不能休眾咸目爲驚才而孜孜力學未嘗斯須輟明季世父孝靖先生首倡復社四方名士日盈其座松巖公又師事天如張公臥子陳公維斗楊公得其指授故家學爲吳中冠先生胚胎前光原原本本而益加之以博洽在劍漢二川閒與胡悅之陳伯璣錢鑒濤查韜荒諸賢論詩文波瀾益壯關晚而交於朱愚庵用經術互相擊扣復以父執事汪堯峯折衷之而歸於正此先生學問之淵源也科舉文字滔滔莽莽自成一言不屑追逐世好世之人亦罕知之年二十七補博士弟子員歲科兩試猶連遭白眼山左劉公田公相繼來視學始待以國士

試必在第一嗣後江右李公浙西許公亦並加歎賞而試於鄉每不利自己酉至癸酉八入棘闈幾如艾東鄉所云始以成宏正嘉之體而主司目之爲老繼以韓蘇大家之筆而主司目之爲野終則點竄公穀採掇史漢而主司又漫不知爲何許語者嗚呼科舉之設逾三百年豈不欲得雄深俊偉之才而用之哉乃謬種流傳反出於唐人通榜之下者無他唐人通榜雖跡涉借交而士有名實並茂者必在諮訪之列今則藉口糊名易書以粉飾其所不知其不肖者暗中摸索各有所屬不暇精研文律其賢者亦元黃迷目高下徇心所得半出剽盜與傭雇高才縱不遇曰非吾責也故士苟自好徒沈淪於場屋而莫知所恤耳昔歸震川屢試禮部不

見收當路者指爲江南未了事然震川終獲一第以雪其憤懣如先生則席帽青衫蓋棺雌伏其得不爲之長太息矣乎願先生在日毫不以介意曰吾文之佳惡自有定論豈必決得失於一夫之自由是杜門卻埽脩然自足癸酉秋有書示學子曰榜發其人其文若此吾輩當以不與爲高嗚呼此可以觀先生之深矣龔章者松巖公庚子闈中所得士爲江南考官而先生被斥見先生有慙色因勸先生遊京師先生不忍拒之遂與偕行歷道路之險夷聞國論之同異賦詩數十章而返雖要津有物色先生欲致之門下者不願畱也蓋先生慨士習之靡人人樂得公卿大夫而師之故平居首以爲戒荅堯峯公書有云非公之學不足爲師但今人之

師在位不在德若亦以此待公是視公過卑而徒自喪其微尙也
其他介節類如此無錫秦去非官吳江訓導與教諭蔣君以化有
隙捏陰事揭於學使學使震怒先生挺身率諸生力辨其誣事始
白友人有所忤權貴而歸者有司齟齬之甚迫先生周旋其閒絕無
沮避權貴斥將復入都先生獨舉李燮姊勿以一言加於梁氏語
告之忠厚之意常藹然見於顏面而持論之嚴正是則是非則非
小子織人無不望而畏且遠一日行垂虹橋中遇密戚忽避去先
生語客曰吾爲人工夫可得一半客問其故先生曰此不善者之
惡也但恐善者不吾好柰何然一時善類卒未有不好先生而願
親之者也在邑與趙書年善在郡汪何顧張諸賢往來最密善相

獎過相規務充之以至誠諸賢因援潛溪環谷之例稱先生不以名字而以所居之柳塘至身後欲建思舊亭以俎豆先生不果猶有觀其遺詩而歔歔泣下者前後教授弟子數十人數以虚心實腹之說爲罔導謂非心之虛則腹何由實而腹苟不實雖求其虚心不可得也且曰人不可搦管卽有詩又不可搦管尙無詩蓋遠有詩則研鍊必不深而無所以爲詩則寄託必不遠絺章繪句可以謂之詩乎是二者俱本先生力學所得故言之尤親切而有味諸弟子服其教成名者甚眾初松巖公好談經濟先生幼卽耳濡目染凡河漕兵食農田水利諸務悉究其利害惜無一見之施行讀經史時有所獨見卽筆諸書而亦未刊定爲一編今所傳者止

詩集十二卷制義千餘篇而已先生容貌軒昂殺饌能兼數人不嗜酒而喜觀人飲常竟夕不知倦素無疾居松巖公喪始患痰涌亦屢作屢愈及攜學徒就試湖州爲小人所賣憤甚暴卒嗚呼哀哉先生生於辛巳八月二十一日卒於甲戌九月十五日得年五十有四配沈孺人生男子子三長度庚學成而夭娶張氏亦夭次大庚娶趙氏次長庚娶朱氏女子子一嫁王維祉而死先生之卒也家無十金之產大庚長庚勾貸以營葬未及具隧道之銘今將樹碣墓上以表先德乃俾某爲狀以乞於執友之有道而文者噫某棲遲潦倒老而無聞其辱先生之門實甚豈容覩顏炫文以李翱之狀韓公者自居哉獨是受業以來身侍几席者十有九年不

可謂不久矣竊嘗以爲先生秉穎敏之姿而勤於學殖守誠信之則而孚於友朋富貴非所慕貧賤非所戚未嘗以道學自標榜而砥礪束修無纖芥遺於內行未嘗以博辨自誇詡而考證經藝無幾微訕於人言雖不敢追論夫古聖賢若唐之陸魯望元之吳淵穎較長絜短未或多讓也是用摭其梗槩排續如右伏惟不棄謝劣賜以採擇庶潛德畢揚可爲 國史之傳文苑者張本焉

右行狀周龍撰

張惣

張南邨名惣字信持父與公先生琪以名宿教授里中多達材弟子南邨幼爲詩出語每不猶人父友紀竺遠一見其詩稱之曰氣清再則曰骨清曰神清已而目屬之曰子必將以詩名江左矣入應天學用才名交遊賢俊治古文辭專力於詩家世奉佛南邨胎性不納葷血初猶食蟹八歲父將攜之見博山禪師前一夕南邨方持蟹父見之驚曰兒將見博師可食此乎南邨聞言卽置不食自是齋脣悉斷除杖人在天界南邨親近最久東南古錐宿德禮謁殆徧以故生平多方外交齋盂粥鉢宛然頭陀蹤跡恆在僧寺中或經年累月不返少學易於中丞集生余公余公戍武林從之

武林西泠其所熟遊故吳越往來尤數而茗雪閒故人聞其至每爭延之癖好山水不憚險遠必往遊其遊有章程要領或獨遊或攜一童子塗遇樵人禪客卽爲伴侶窮幽造深飲泉摘果卽忘飢渴於五嶽則陟嵩岱猶以不能徧歷衡華爲恨若武夷匡廬九子黃山天台雁蕩諸山所至削木柿爲記采樹葉題詩以爲常南邨爲人坦夷近情不爲矯激之言不爲崖異之行取受從心否塞任運尤不以禮數恩義責望人與人處尤能寡怨忘隙乍見或輕忽之稍久必親而敬焉有屋數椽不蔽風雨家人恆至乏食垢衣敝襍遊士大夫間舉止迂野可愛形體短小雖老精神可敵壯夫遇良讌會能通夜不眠嘯詠達旦不擇地而處不擇食而食不擇榻

而寢投足之所卽甚湫隘羸雜他人埽除未竟視南邨已展卷矣
口腹之奉不過鹽豉菽乳就枕卽熟睡無輾轉不寐之時蓋胸無
機事不以美惡撓心能致然耳嘗遠遊遇舣篋者再中途幾不能
成歸人或怪其無恨色曰矢者償之義也又何問焉除夕自外返
去其家不遠止宿逆旅主人次日日脯始緩步而歸其性情安雅
如此羣居未嘗與人爭至論詩輒相持不下宋詩行雖貴卿巨子
前亦厲詞折之其論詩不逞才不使事不染叫號不涉怨誅其宗
旨也自以襄陽摩詰爲師於古歌行換韻大篇暨古體千數百言
鋪陳開闔局力宏富者乃不謂善白少至老主此論不變雖所見
未盡然亦可謂篤於自守者矣南邨稱詩五十年遠近之人亦以

詩歸之生鄉名人王穆如願與治之後與同時諸人並立可指數
終竟如紀叟之言歲甲戌年七十有六夏得脾疾治之尋愈至冬
復作遂不起子二元子筠正子澹元子亦受詩可不墜其聲予自
傲居郭南望衡密邇相得甚懽酒闌燈燼每有知己之言欲以身
後爲託今不可作矣世復安得和易素心風雅不倦如斯人者乎
贊曰策杖而出裹糧而遊遇少倦而且休至佳處而輒畱把酒而
歌執卷而吟悠悠乎王孟之音有形神而無古今不忤於世不矧
於天可獨可羣亦儒亦禪束身止一棺而遺文乃有千數百篇稱
之爲詩人奚愧焉

右傳先著撰

錢陸燦 族孫良擇

錢陸燦字湘靈常熟人家無錫籍補諸生爲聽社十七子之一踔厲風發才名甚著年四十餘始舉順治十四年鄉試以逋糧案註誤既而復選授通判職康熙甲戌上巳崑山徐尙書乾學修禊遂園爲耆年之會陸燦居首年已八十有四

右傳秦瀛撰

錢湘靈名陸燦別自號圓沙常熟舉人生明季爲諸生已有名於時湘靈治經長於言易每月筮一卦以六日主一爻占動靜休咎徵輒有驗爲詩古文時文皆工以其學教授出游揚州金陵常州晚而歸里弟子著錄者數百人率一時知名之士先曾祖百度府

君嘗從受業焉湘靈牧齋族孫也方牧齋存時絕不依附牧齋卒後湘靈答許青嶼侍御書論吳及正錢錄非是論者不以爲私先是湘靈友劉芳與妓顧橫波約爲夫婦橫波後背約而芳以情死湘靈爲經紀其喪蓋尙氣誼好立名節固其天性云所著有調運齋集

右聞見錄吳德族撰

康熙甲戌上巳崑山有耆年之會設宴於徐氏之遂園舉人錢陸燦年八十四御史盛符升八十檢討尤侗七十七贊善黃與堅七十五尙書王日藻七十二提學僉事何棟七十舉人孫陽六十九按察使許纘曾六十八尙書徐乾學六十四洗馬周金然六十四

中允徐秉義六十二諭德秦松齡五十八以齒序坐各賦七言二
首用蘭亭爲韻

右柳南隨筆張維屏錄

錢良擇

錢木庵名良擇湘靈族孫弱冠游京師卽負詩名爲諸公貴人所
賞時有大吏出使海外請木庵與偕往又同朝貴使塞外絕域足
迹幾徧天下然訖無所遇合木庵無幾微不自得讀書痛飲酒以
昌其詩先是木庵之大父嗣隆嘗偕湘靈問詩法於顧仲恭仲恭
曰詩從讀經史中出者上也從讀賦中出者次也從讀詩中出斯
下矣吾不能詩尤不能時人之詩詩有作之旨經所謂溫柔敦厚

者是已若時人之詩今在君家牧齋宮保之門當是時游牧齋之門依以揚聲者以天治爲溫柔以堆砌爲敦厚木庵少年才士不能無染於習尙後思顧仲恭語悟而求之韓杜更進而求之風騷漢魏陶謝更進而求之左國馬班涵泳濂洛關閩之學尤好南華楞嚴而悉以供其詩詩多至萬餘首每所見進輒取而焚之其存者僅百之一二曰樵雲集八十卷湘靈爲序而行之

右聞見錄吳德旋撰

林佳蔭

康熙甲戌 特旨令禮部取霸州廩生林佳蔭充官學漢教習因
諭廷臣曰是朕教書林師之孫其家甚貧也時 上御極已三十
餘年佳蔭方爲諸生林師何人而 聖祖惓惓乃爾錄此以諭熟
於國故者

右紀聞陳康祺撰

蔣瑛

蔣瑛字懋旃文河其別字其先宋溫國公之奇後世居吳郡西洞庭山南渡時簪纓甚盛入元不仕明復顯又十數傳至某公值本朝定鼎始遷楓江公從弟辰生諱繪中順治己亥進士授館職未幾歿憤惋延名師課諸子文河其第四子也少穎發貫通經史博綜諸子百家言詩學陸劍南范石湖書法髣髴趙董先達嗟異謂辰生可不哀也借兄某以弱冠補縣學生而文河每試必第一康熙乙丑受知今戶部尙書前學使李公振裕拔貢第一人時李公所拔皆一時名士文河尤偉標格清姿令骨飄飄如神仙中人公特暱愛旣抵京師就國子試刑部尙書翁公叔元方爲祭酒或

語文河是間天下才主者又具眼復得自雄如向在吳中不已而七試皆第一同館大諱既其見其文乃翕然以服時 朝廷文治日盛八旗子弟皆欲令知學擇貢士爲之師己巳授正藍旗教習文河才氣風流倜儻而性方直嚴毅教人有師法今旗籍中出政四方有循聲者多其所指授甲戌部試仍第一以縣令待用長安諸公貴人重其文行爭相延致畱無幾慮親老馳歸乙亥秋父病且篤不脫衣帶而養既不起水漿不入口長號失聲遂得肺疾踰半載卒年僅三十九蔣氏信多才胡不永乃爾悲夫其季弟琦與余善爲道其如此余曰才者天所愛必奪之以去此恆理也昔王文考賦靈光而伯喈爲之閣筆子安序滕閣而吳生無所炫其能

皆飛騰於弱冠之前而旋沒於弱冠之後若以二蔣君方二王未
爲不永也雖然文河以孝死固不獨以才自致恨矣文河始娶倪
氏早卒壬辰科進士中牟令吳公某欽其才以長女繼焉生一子
四女俱幼

右傳李紱撰

Vertical text or markings along the right edge of the document.

Vertical text or markings near the bottom right edge of the document.

182-272

文在茲

先生文姓名在茲字信予派出廬陵之富田十一世乃卜居會昌
遠祖爲贈工部郎中朝用四川布政司斷事西谷永康縣簿合川
某藩典禮景谷而太學泗濱廩生詣玄則先生之祖父也先生年
甫立而祖父見背兄亦蚤亡時王母母夫人在堂兩世藐孤如弱
草棲風家又素封旁睨者復四起賴先生蚤慧甫冠卽得補諸生
外侮稍息先生性倜儻幼孤固爲太夫人憐愛延師取友市書文
酒之費一聽所爲文乃漸恣及於徵歌召妓華燈縱博四方年少
輕俠多暱就先生住幸舍日繼梁肉客或飽颺去先生亦不問及
重來仍網魚酤酒卜夜爲歡過先生如過其家也甲申乙酉間唐

藩建號閩中時萬公元吉楊公廷麟扼守贛州先生雖少預參帷
幄知事無濟得先歸無何贛城破而會邑亦遭屠先生意殊不自
得求祝髮於同峯九一和尚爲先生至交堅執不許繼又欲罷諸
生亦爲同人諫止先生世席華廬又好讀古人奇麗之書見傾身
結客如朱家劇孟心竊好之越俗驚眾如王君夫袁彥道又心好
之見功名慷慨如祖士雅劉越石又心好之繼時事已非家亡國
破潛身改服如鄭思肖汪元量又悲歌扼塞而欲踵爲之所願旣
皆不遂家漸落客漸散先生亦年漸長乃大治有韻之言刻意腐
心以求必傳於世今所稱然疑集是也先生雖謝交遊其姓字久
在人口客往來過會昌者未有不停撓解轡爭問文先生先生雖

貧亦必藟蔬炊黍具賓主之禮而退故四方之譽益歸之而先生則已憊甚矣晚乃築一園斗大蒔花種竹攜幼孫日讀書飲酒其中然平生豪舉之性一旦寂寂間居是豈先生意哉予交先生四十餘年知先生爲最令予來請銘因直書其生平大槩納於幽宮不欲爲飾辭諛墓亦朋友之道當爾也先生生某年月日卒某年月日子二長楫邑廩生次峙副榜貢生皆能文立行有名於時墓在某山之陽銘曰

好學如植穀求友若赴谷樂易坦懷今所獨大壑高原幸溫煖以安以綏滋後福

右墓誌銘黎士宏撰

國朝詩林類傳卷之二

三

李琪

公諱琪字蒲臣號谷窆泰衡公之季子也性孝友疏貨財篤卹誼
年未壯受知於邑侯黃公以遠大相期與諸名士立岸花社文名
卓然丙戌丁亥間流賊屠戮潭邑李氏被慘尤甚諸伯父及孺人
張氏皆遭兵疫以死一年中九喪並厝措拄捩搗不避辛苦以祖
居栗塘近郭徙去城百餘里烏石峯下戊子復遭餘寇馬進忠之
變家產燹燼媼屬流離公奔走求食於山林墟市間數年或寄情
杯酒間輒詩歌自解迄無愠色亂定後凡泰衡公所遺田產盈萬
或餌於官或徙於商隨其資多寡售之不爲競先是湘洲公由宗
伯晉宮保田產所遺子孫亂離遠竄家政乏理僮僕有力者陷公

來請曰願公撫而有之勿利他人公笑揮之曰我雖貧豈以是汗
我名哉屢赴棘闈不第遂謝絕舉子業閉門深山不謁權貴城市
罕見其迹研精義象著周易便蒙一書論詩酷愛陶靖節手不釋
卷與謝公薇房石公天半余公攻瑕胡公影桑爲詩酒至交邑侯
趙公重其品徵爲鄉飲大賓題其門曰衣惹白雲丙子夏夢人贈
一聯云籬下黃花干日酒山中紅葉白雲衣覺遂恍然若有悟曰
此余像贊也余將行矣不數月無疾而逝年八十四著有寓衡吟
耐庵集爲文人所稱許子四人鷓鴣曉邑文學彪宗候選州同
騏偕郡文學孫男五人瀛邑文學沅郡文學餘俱能自卓立抗厥
宗云

論曰余嘗過烏石峯下竹木蓊鬱陂塘明瑟類高人居邨民指曰
此李公谷窆所棲息也當流離顛沛公獨詩歌不輟迹其胸次殆
不以生死利害計者嗚呼豈不賢哉

右家傳張垣撰

周士彬

周士彬字介文由縣改入府學生幼事繼母能孝母束組操作士彬織簾於其旁輒記誦四書諸經及長益研究宋儒語錄以身體之期於實踐時施維翰爲山東巡撫招致幕下適奉裁東省提督標下兵兵變方五月五日燕客倉卒無以應士彬請發庫帑數千金以安軍心且奏請給裁兵半餉俟訓練簡汰老弱卽拔驍勇者以充之其不堪者勒令歸農如是則反側自靖維翰從之事乃定明年維翰晉閩浙總督士彬以親老辭歸先世家於山所居堂曰山舟關山舟之西偏曰寶善堂偕其妻承歡養志及居喪哀痛成疾諸醫束手士彬曰莊敬可以日強遂半日靜坐半日讀書由是

道益修病亦平復服闋中康熙三十五年鄉試副榜生平視天下無可忽之人亦無可忽之境居常昧爽而起度時可執作始召家衆畢起七十後冬寒夙興如故或止之曰旣寤復寢是自甘昏昧放逸也平日泊然無所嗜好大要以靜敬爲功卒年七十八著有增訂韻瑞八十卷文集二卷山舟學詩草十二卷

右傳王昶撰

汪士雲

余讀汪蟾思母諸賦未嘗不三歎也曰孺慕之懷一至是乎詩曰
哀哀父母生我劬勞讀此詩而不垂涕者其人必不孝蟾之於親
也思其飲食居處思其話言志行發而爲賦纏綿悱惻使人不能
卒讀蓋全乎詩人之義矣丙子仲冬將合殯其父母於玉泉之山
泣捧行實來乞傳蓋傷祖若父白首窮經不獲一遇而寫其抑鬱
難舒之意則又以未振家聲爲己責以齋覽而悲之作錢唐汪處
士傳其略曰君諱士雲字吉臣悅心其別號云系出唐越國忠顯
公後南宋時有諱時揚者仕至今尹始居巖鎮是爲君始祖更數
世有諱尚廣者來居武林尚廣之曾孫志旦有聲庠序間世稱爲

西眉先生卽君之父也君資性絕異生五歲西眉口授毛詩曲禮輒成誦稍長通諸經手鈔國語國策離騷莊列史漢六朝文唐宋諸集俱熟誦行文敏捷一日可十餘藝好凌厲同學同學生輒遜不及也補錢唐博士弟子員前後學使者試輒高等而君銳意進取揣摩應舉之文於成宏正嘉隆萬啟禎先輩諸大家之作莫不別其高下辨入毫芒以故命意製格不落俗想君嘗曰時文者非時人之文乃聖賢傳心之道法也其義廣大精深而不可以捷獲故其篤好深思若此性孝友急友朋之難雖爲諸生毅然以名節自任當時名流宿儒如汪魏美陳際叔吳志伊輩時相過從盛稱君不容口其後應徵君嗣寅符隱君介潭亦深服君之爲人嗣寅

少所許可然其言曰悅心品端學粹爲吾鄉賢者其推重如此觀諸賢所服膺則君之生平可知也無何數奇屢不得志於有司丁酉庚子兩闈已入彀復報罷而君竟坎壈以終嗚呼是可悲也已配吳氏後君卒有賢行嫻詩書明孝義事悉蟾賦中生子三人長璿次蟾次曙璿曙俱國學生蟾仁和邑庠生善賦者也

以齋氏曰國家以制藝取士而士有遇有不遇遇者未盡工工者不盡遇也寥落之感亦隨地皆然耳觀汪君病牀箠呼兒泣且語以不得振家聲爲恨傷已內助賢勞望子成名而願與時違躬自悼矣雖然君有令嗣能世其學至性過人勤勤懇懇爲其親乞傳何慮乎湮沒無聞也不於其身於其子殆於蟾兄弟卜之哉

國朝書目類考卷之二十一

右傳楊雍建撰

臣

牛樞暉

牛樞暉字孝標順天人山水師董巨用筆運墨最爲得法
圖繪寶鑑續纂

牛樞暉品行高潔不事趨謁業醫賣藥自給善山水有柴門竹深
圖漁洋山人有詩 畫徵錄

石 國朝畫識馮金伯錄

國朝詩人卷之二十一

五

國朝耆獻類徵初編卷四百三十目錄

文藝八

梅清

袁啓旭

廖儼 楊之炳 韓樂

陸增

何其僕 時亮工

陳雅琛 徐大本

顧景文 顧廷文

景文子仁垣

劉瞻榕 俞玉局 鄒乾樞

方舟 從子道章

高元美 弟山 李巒

鄭中

陳之駉

周上治

龔起賢 李豐 田英產

林衡 子從直

吳雯 王萃

陳鳴皋

邵長蘅

洪昇

廖燕

魏坤

劉授易

儲欣

國朝耆獻類徵初編卷四百三十目錄

朱紉

陸安國 子祖禹

國朝耆獻類徵初編卷四百三十

通奉大夫前署江西巡撫江西布政使司布政使湘陰李桓輯

文藝八

梅清

梅清安徽宣城人少讀書竟夜不倦既長英偉豁達以博雅稱順治十一年舉人再赴禮部試不第南北往還周覽燕齊梁宋之間士大夫多與之交新城王士禎崑山徐元文尤傾服焉清所爲詩凡數變當年壯氣盛時叱咤成篇久之意不自滿取舊作校刪過半其沈摯纏綿之意則見於巖棲旅食者爲多自訂爲天延閣前後集年七十餘又合未刻彙編爲瞿山詩略共三十三卷康熙三

十六年卒清工書做顏真卿楊凝式書尤盤礴多奇氣山水入妙品寫松入神品嘗作黃山峯十二幅極烟雲變幻之勝墨松蒼雄秀拔爲當時所貴

右 國史館本傳

梅清安徽宣城人少讀書竟夜不寐既長英偉豁達以博雅稱順治十一年舉於鄉再赴會試不第往還周覽燕齊梁宋之間無不推轂者新城王士禎與崑山徐元文尤傾服焉主盟騷壇最久後學多藉以振起康熙三十六年卒清所爲詩凡數變其始年壯氣盛叱咤成篇久之取舊作校刪過半而沈至纏綿之意則見於巖棲旅食者爲多長洲宋實穎序之以爲鏗鏘發金石幽渺動鬼神

颯颯乎調天然之律呂有天延閣前後集年七十餘又合未刻彙
編爲瞿山詩略共三十三卷 欽定四庫書並著目清亦工書倣
顏真卿楊凝式畫點綴瘦硬綽有餘妍時復盤礴多奇氣嘗寫黃
山峰十二幅極烟雲變幻之趣墨松蒼雄秀拔當士禎時已貴重
於世故居易錄中稱其山水入妙品松入神品更數十年斷紈霽
素定不減蘇黃云

右傳朱琿撰

袁啓旭

宣城袁啓旭工詩而好遊與施閏章梅庚同著聲都下詩發揚踔
厲頓挫鬱塞足抗衡古人弁其集者爲宋實穎謂以秦風之悲壯
而兼楚騷之哀怨眞東南第一才子前輩惟梅村先生可以方駕
近則其年得其豐腴漢槎得其英槩其推挹如此梅村吳偉業號
其年陳維崧字漢槎吳兆騫字皆名流故以相況啓旭國學生試
不遇有中江紀年彙

右傳朱珩撰

皇朝通志卷之三十一

三

廖儼 楊之炳 韓樂

廖儼字次儀湖南甯鄉人康熙三十七年拔貢生性磊落無城府
巡撫趙申喬重其學行聘爲嶽麓院長時出脩脯資寒士膏火之
不足者同郡楊之炳字虎文湘陰人康熙乙未舉人雍正七年聘
充廣西鄉試同考官所取多知名士工詩古文辭著有北遊草粵
遊集韓樂字適齋善化人吏部主事楷弟八歲能文解聲律及長
補諸生提學繆沅持其卷示諸學官曰是當張楚南幟者中康熙
庚子副榜淡於仕進工詩古文詞客江南與儲在文王步青友善
性友愛歲入館穀分贍諸昆弟斷炊弗計也樂子之焯字寄廬乾
隆癸酉優貢

國朝通志卷四十二

右傳李元度撰

四

陸培

先生陸氏諱培錢塘人梯霞者二十字也父夢鶴公諱運昌明崇禎甲戌進士官吉水知縣與其弟忠中公諱鳴時官兵部郎中夢文公諱明燧官理刑推官俱以文章氣節指名於世明季尙文社每府縣官人各彙其所在指名者板而刊之曰名士較試場所取榜帖士尤爲嚴重而太倉張君天如以翰林院庶吉士家居秉月且輯海內指名與東林諸都講共採錄者合得如干人定爲復社時杭州一郡唯公兄弟三人褻然列社首而他皆不與人之造其廬者比之河津之有三門山曰此陸氏三龍門云乃吉水公生五子長麗京諱圻次鯤庭諱培先生其三也崇禎己卯舉兩浙鄉試

先生偕兩兄合梓其社業行世而鯤庭君於是年中式一時購鯤庭行書並兩人社業並行之號三陸體當是時先生有兩弟曰紫璉曰左城皆名士而年未成也人第指三君繼三龍門後遂以三陸監稱之子是年初赴試場從邢君奕遠舉蘭里文社於浦金門外杭之名士唯徐君世臣張君用霖吳君錦雯先後至曰三陸君何在既而麗京鯤庭來而先生不赴次日訪先生於板兒巷予之見先生從此時始而次年而鯤庭君成進士官行人司行人曰三門又啓其一矣及壬午再試三陸君艱居國變王師收杭州下令鄉官在籍者各投名授職里胥到門時行人君避兵橫山老母裘太夫人尚在堂夜起呼先生徬徨曰是地去橫山遠將欲使汝

至橫山促之來非吾意不來此吾家門事且此隙所繫大死忠死
孝未可以母命亂其意如之何先生俯首不能荅詰旦而橫山訃
至曰行人君死牛鼻繩矣先生乃扶母告廟爲位而哭遂奔橫山
收其屍投牒軍門曰行人司行人陸某身死取驗狀訖並詣錢塘
學告大成殿右階下盡等歸而奉喪太夫人隱於河渚之駱家莊
以圃以漁間受雞林估人請選舉文甲乙試帖並房牘名龍門集
取其所酬金爲菽水貲而伯兄麗京則賣藥茗霽間每月一歸省
每歸必牽一舟奉母居其中飲食歡笑以爲樂如有年先是陸
氏以文章爲東南領袖先生之選龍門集繼先人志也會督學使
谷君倣張君天如作明史紀事始末以金幣聘麗京作史論已辭

之矣烏程莊氏輯偽史豔麗京名陰竊同時指名者范君文白查君伊璜與麗京作參定姓氏不告諸本人而標名卷端適周侍郎從閩還見其書不實畔亂無狀又不自館局違犯功令以告文白文白大驚亟偕麗京伊璜合爲詞檢舉由烏程縣達府將入奏而未遑也烏程知縣吳君者以他事去官不得於知府且怨莊氏不遂賂首之部堂會 今上改元之歲平章者怒甚緹騎四出逮知府以下籍莊氏檻其首者三君披銀鍔就道家人無少長皆繫獄先生乃先麗京行倍道至都旬其舅氏喪公之都居者備極營救且謀納橐館爲刺讞地而家之籍捕者以不得先生覆追至京大索長安街適文白之子魏公呼冤於西臺謂檢舉有前詞不得

罪議遣尋京朝官就浙按讞先生急南還時叔父兵部公以高年在狂狷且無嗣前此裘太君生時議以先生爲公後有成言矣至是先生曰此卽吾父也焉有父在獄而子掉臂者遂詣獄乞代守者曰代耶律父子俱死無代法念君自來不異牖可也旣而讞上上憐其無罪得不坐康熙二年五月獄解先生奉兵部公歸立爲後越二年兵部公卒先生行三年喪禮而麗京自獄還輒鬱鬱不自樂每曰幾以我覆宗至是居公喪服除喙咷拜公墓辭曰猶子不肖幾使叔父死於獄今縱不能從叔父地下其忍陽陽居人世哉遂託以遠遊不復歸先是三龍門公惟吉水公有五子而兩公闕然因預奉裘太君命以先生後兵部公而理刑公則紫壘嗣之

至是紫躔左城皆相繼不祿獨麗京承吉水公祀主禱器重大先生將尋兄稷苗而風刺於骨惟兄子寅旁求之見公於徽州已爲僧矣牽其衣不卽舍遂奉之歸乃爲先生療風疾且日會鄉人道故舊示無去意何先生疾稍愈頓失所在嗣後再覓不可得而寅於康熙丁卯舉鄉試中式戊辰成進士然終不能再出門身死先生乃孤居里閭授生徒四方從游者如歸市自東西浙至他省多有景行不得前者同郡貧士覘閩中慕先生名乃飾爲項丑懷爵里投閩名士閩名士爭闢館舍執一經請委摯門下值莆田魏君虎上以北行經杭州造先生廬驚曰此眞陸先生耶先生乃笑曰彼亦名士徒以貧故借僕名且安見僕非僞也初先生生時有文

在手曰才人既弱冠曾卜夢於于公神公餉筆一斗始竊自喜至是嘆曰才者材也吾將藉管城材多子弟矣兩浙開府張君運青者裘侍御本房師也侍御諱克美爲裘太君之姪與先生中外兄弟以言事得罪居於家開府謂侍御吾欲延陸先生爲國人師能曹邱耶曰能願先生守段干節必肅以禮幣而先於門然後某從容導之開府如其言先生初甚拒旣而諾又旣而幡然以從開府乃大啓義學構書院於萬松山巔集通省學士讀書其中奉之爲十一郡之師每大會赴試者數千人惟先生進退焉事竣輯其所講四書錄顏之曰大成而梓以行世當是時世固重先生而兼誦開府之好賢能興教云予醫痺來杭就人問先生起居曰此三先

生也杭多學人不敢以二十字呼先生而必尊之以五十伯仲曰
三先生三先生不相見四十年矣前此二十年予避人湖西見麗
京於廬陵城下問之從贛還也既而返南昌再見於吉水之水次
曰拜吉水公祠也惟三先生不可見然而少壯出門垂老還故鄉
曩時親朋並無一存在者而猶得見先生於七十之年不可謂非
厚幸乃相見無幾而先生以八十有三遽先我卒然且卒之之年
計之卽當時見之之歲則是百年而一日矣先生初娶趙孺人賢
而早卒生子二曰豐曰兆爵而紀孺人以賢繼之生子一曰正夫
皆以諸生能文章當時羣從指名者長繁昭行人君子也高才不
試次寅麗京子進士又次冠左城子以康熙庚午中北場鄉試豐

兄弟皆與之齊名而豐尤著銘曰

從來名家出自禮官因義責實嚴於申韓當其盛時載書雜壇文章
卓卓若氣節傲然降及末季猶以名先平輿品目界休引延譽士
秀會大義日宣張霸會子黃憲顏淵爵刺遠布盟詞高懸君家前
游賈領百賢豹達五里龍開三門以是兄弟饒爲文篇五常未著
三賈遠傳懸圃積玉乃超雲間驟遭鼎革朱門改觀王蠋緝樹
冀生抗咽賣藥韓休採薪百年乃謀養母終棲林泉何意不弔榮
名招鷲象齒忽拔蘭膏白煎叔緣伯及黨因鉤連五屬異獄三親
同獲公治園土夷齊皇天將輸金矢兼謀囊餽藉茲呼救因而矜
至於斯肥遞亡名變顏夏氏林慮焦先海埔鴻飛冥冥弋何篡焉

仲死伯去孤居里閉爰授生徒鳴鼓設筵授中國室進都養餐開
府捧几侍御執鞭大闡講院萬松山巔明經四十習禮數千七十
縣士咸呈簡編輿無歌鳳堂有銜鱸外市公超東家鄭元某也半
生匿蹟人間老而相見因思從前奈何頓別有如朝烟惟君大名
千秋不刊亦惟有道無慚此言

右墓誌銘毛奇齡撰

陸堦字梯霞錢塘諸生有兩弟曰紫躔名垣曰左城名堦皆名士
國變後奉母居河渚之駱家莊以佃漁爲食

右文獻徵存錄錢林撰

何其僕 時亮工

何其僕字天成號六谷別號洞虛子石屏人檢討朗父康貢生至性孝友學問淵醇工詩文善蘇黃書法又多考歷名山大川著有迤江圖說元師平滇道路考西藏指掌圖墨雨樓集弟其偉字石民號我堂康熙己卯舉人博學能文官浙江遂昌縣知縣治績著聞尋告養歸家居十餘載足不履公庭以詩書自怡宏獎後進與修省府兩志著有我堂詩古文集

右滇繫小傳師範撰

時亮工

時亮工趙州人康熙己卯科舉人性豪爽足跡幾徧宇內著快遊

集三十二卷歸里後與詩僧醉夢相酬唱未仕卒子遠乾隆丁巳
恩科進士餘雍正癸丑科進士

右滇繫小傳師範撰

陳雅琛 徐大本

陳雅琛字獻元號喬山益陽人康熙三十九年進士司理有光之孫

耆舊傳司理殉難死雅琛作蔡忠烈別傳論中附及之以古文名詩不多見

右湖南文徵羅汝懷錄

徐大本

徐大本字泉長益陽人康熙五十三年舉人

長沙府志大本與其叔日宏同登賢書幼警敏試輒冠其曹儻有才略能詩古文書法亦精中道而卒人爭惜之

石湖南文徵羅汝懷錄

顧景文 顧廷文 景文子仁垣

顧景文字景行廷文字廷颺江蘇無錫人兄弟皆以才名景文故跌宕爲詩具有奇氣廷文善飲時時病酒而景文尤嗜酒每劇飲必醉廷文顧諫止之然廷文竟先天景文雖老壽亦窮困景文子仁垣字中以諸生刻意爲詩沈博絕麗不及其父而法律精細則過之口滑稽能令滿座鼓掌遺橐若干卷其遊梁章及綺聲詩作具饒風調尤爲時傳誦

右傳秦瀛撰

劉瞻榕 俞玉局 鄒乾樞

劉瞻榕字于根江蘇無錫人父學洙有學行與劉齊同爲桐城方苞之友康熙三十九年進士調選歿於都門瞻榕持終身喪一素帶常不解曰死以此束我瞻榕深於詩冲澹淵穆如入禪定子執玉亦工詩邑中學詩者多從之遊有俞玉局者字爰心拔貢生偉貌修髯讀書過目成誦學詩於顧仁垣性孤介居京師十餘年意所不可雖公卿造廬輒拒弗納父履道客死茗溪玉局以弗克視舍斂爲終身恨歿時斥子孫去左右其友鄒乾樞亦拔貢生同學詩於仁垣記問博洽尤熟於舊聞軼事玉局孫模極推之模諸生能詩布衣糲食閉門忍飢亦狷士也

右傳秦瀛撰

方舟 從子道章

兄諱舟字百川性倜儻好讀書而不樂爲章句文字之業八九歲誦左氏太史公書遇兵事輒集錄置衿衣中避人呼苞語以所由勝敗時吾父寓居棠邑畱稼村兄暇則之大澤中召羣兒布勒左石爲陣年十四侍王父於蕪湖踰歲歸曰吾鄉所學無所施用家貧二大人冬無絮衣當求爲邑諸生課蒙童以贍朝夕耳踰歲入邑庠遂以制舉之文名天下慕廬韓公見之歎曰二百年無此也自以時文設科用此名家者僅十數人皆舉甲乙科者以諸生之文而橫被六合自兄始一時名輩皆願從兄遊而兄遇之落落然江西梁質人宿松朱字綠以經世之學自負其議論證晷經史橫

從穿貫聞者莫不屈服而兄常默默退而發其覆鮮不窒礙者苞
謂兄盍譬曉之曰諸君子口談最賢非以憂天下也兄長余二歲
兒時家無僕婢五六歲卽依兄臥起兄赴蕪湖之歲將行伏余背
而流涕其後少長卽各奔走四方余歸兄常在外兄歸余常在外
計日月得與兄相依較之友朋之昵好者有不及焉兄嘗曰吾與
汝得常家居俾二大人無離憂春秋佳日與二三同好步北山徘徊
墟莽間候暝色而歸吾願足矣及庚辰四月余歸自京師七月
兄歸自皖江而疾遂篤未得一試斯言也弟林先兄十歲卒兄欲
於近郊平疇買小邱自爲生壙而葬弟於其側辛巳四月余爲弟
卜地於泉井夢土人云伯夷今葬是余不忍廢兄之命遂以次年

三月十六日遷弟柩與兄並葬其村之北原兄歿於康熙辛巳年十月二十一日年三十有七娶張氏子道希道永銘曰
不若於道者天絕之胡體其所受而至於斯矧材與志古固有不足而又何憐

右墓誌銘方苞撰

自用時文舉甲乙科以諸生之文而爲海內所誦法人知其名家有其書者惟桐城方百川先生先生寄寓江甯余來典郡歿已逾歲矣友其弟望溪稽之與久故者然後知先生非文人先生生棠村六七歲讀左氏太史公書遇兵事輒集錄置衿衣中議其所由勝敗暇則之大澤召羣兒布勒左右爲陣時三藩遊亂比邑旱蝗

憂之或廢寢食既長遷金陵家貧召徒投章句無應者乃與望溪學爲時文遂用此知名四方名輩造請望溪常引接而先生鍵戶弗與通惟燕人王源邑子宋潛虛宿松朱書自負經世略時就先生證羈今故論辨鑿鑿先生終無言退乃爲望溪發其覆曰諸君子口談最賢非以憂天下也先生性孤特而內行篤修其父逸巢先生每語人日記所云視於無形聽於無聲者於此子見之望溪行遊四方十餘年先生常居守服勤盡瘁其後望溪歸先生東遊登萊極沿海視日之始生北過燕市遘疾以還逾歲自知不可療妻子在前未嘗一給視卒之夕強言笑陰戒望溪奉二親就寢曰命盡矣恐記吾言嘗異日常炯然於寢寐也妻子環而哭之喻使

退曰君子以齊終吾獨宜死第手先卒之數日閉戶悉焚平生所
論著其古文眾見者惟課試擬庾亮南樓譔集序絡緯賦二篇又
於宗伯長洲韓公所得廣師說一篇韓公曰雖退之無以尙也望
溪治古文詁諸經皆先生發其端緒死之後親故過時而哀吳中
十郡薦紳羣士條其行誼詣督學使者乞定祀於鄉山阪海聚嗜
古績文者皆爲素秋不置云先生諱舟上元縣學生卒年三十有
七葬於某鄉某原銘曰
積之不施維遇之艱學之未竟而奪其年厥德渾堅而風窳然矣
必彰於事而裸於言

右墓碣陳鵬年撰

方道章

定思姓方氏諱道章字用安江南之桐城縣人今爲上元縣人故侍郎望谿先生之長子其家世見予所作先生神道碑定思生於魁儒之門顧少罹禍患望谿先生以連染入旗籍定思遂補八旗博士弟子先生得改原籍定思始入太學舉秋試其性落落不甚可人苟不當其意相對默然令人廢沮顧獨暱就予所言多合亦不知其所以然也予叨望谿先生愛最篤然侍坐說經時或與先生不甚合則爭之定思在側默而不語退則竊語予曰子言是也望谿先生持古道以此或爲少年節貌者之所欺定思每以見問予曰是人未可信也定思輒攢眉曰吾故知之先生每有所行亦

未嘗不商之定思或不相中定思必來告令予更向先生轉移之
蓋定思之在家庭非但能承學業而已也然先生既以直言得罪
津要不安其位而定思亦復耿耿爲諸公所畏忌故相尤惡之於
是以一孝廉待試公車卒不得成進士先生既放還定思蕉萃里
門食指甚繁終日米鹽之閒以至於死定思爲古文雅有家法然
未嘗輕以示人望谿先生八十子過白下定思飲子於湄園不數
日子遽東歸次年而定思卒又次年先生始卒嗚呼以定思之骨
力不肖隨時上下其人非晚近所有而一無所試而死其所爲古
文詞以其不肖苟存無一傳者上之不得比於原父之仲焉次之
不得比於道原之義仲遂將泯滅其可慟也定思不妄可人人亦

無知之者但盛相傳議其不近人情知之者莫如予安得不銘定
思生於某年月日卒於某年月日春秋四十有六娶某氏八子長
者已舉賢書其第六子子壻也方予別望谿於潭上先生謂吾老
未必久人間篋中文未出者十之九願異日與吾兒整頓之豈意
定思先歿而先生亦隨下世而予奔走五千里外未踐斯約是則
負疚者矣其銘曰

望谿之學空負盛名實罔知者坎壈一生君承家學亦復骨鯁固
宜眾惡咎茲獨醒世道日衰江河東下可憐赤鯉茶甕所詫故人
有我知君之心作此銘詞奏以素琴

右墓誌銘全祖望撰

高元美 弟山 李密

高元美字長人幼即工文章年十三學使彭而述三試三補博士
弟子員兩中副車不售年四十遂絕意進取力學嗜古不近勢利
以琴酒自娛詩宗陶柳書法趙文敏畫倣倪雲林著有寄山堂集
沔陽州志

高山

高山字子仁元美弟也生有偶才早歲作鶴樓秋曉賦為楚撫幕
公所賞能詩畫山水尤為擅名蒼崖古樹近形遠勢老筆紛披峭
拔突兀有元人筆意 沔陽州志

右 國朝畫識馮金伯錄

李巒

李巒字亦山兒時僅讀論語善病遂輟誦冠而彌甚異人授以吐納導引之訣始愈乃折節讀書敬禮諸名宿有疑必問人亦嘉其虛懷而樂告之尤喜誦詩有會心處輒謂得畫家三昧因復學畫遂以畫名高安朱可亭先生撫浙時曾以其畫進呈 御覽喜動天顏客維揚王樓村願俠君輩相與酬唱爲之梓其詩行世亦山孝友篤摯鄉邦久推長者長白偉公守郢廉得其實將以賢良方正薦亦山以老病固辭卒年八十七所著有晚秋書屋快雨山房

邢上豫章諸集

鍾祥縣志

右 國朝畫識馮金伯錄

鄭中

清江先生諱中字子紱其先閩之長樂人曾祖起予公官江浦始家焉祖我爵公父用梅公至先生凡四世清江者長樂之城東門也故別號爲清江用梅公有逸德母張氏以賢聞先生少穎悟讀書過目成誦弱冠應試立就七藝補郡諸生學使者待以國器屢試高等旋食餼是時文體熟爛士皆爲揣摩經史度置高閣先生獨研究羣經自秦漢以下古文詞皆手纂成帙工爲詩嘗詠梅花爲先輩張鹿牀所歎賞先生負才氣尤篤於孝友事父母能得其歡心昆弟六皆好學能文章弟子一早亡嚴事伯兄子簪仲兄鹿萃鹿萃所居相去遠經宿不再見卽鬱鬱不自聊時與伯仲同居

野園日吟哦其中栽花蒔竹客至瀹茗清談不以世俗事挂其齒也稟素弱會親未葬輒上下崇岡得吉壤躬負土營兆域凡先墓皆爲立碑以表識焉性好佳山水而尤不忘其故鄉每俯臨大江登高南望泣然曰自此而往其直達閩海乎及仲兄閩遊返爲言山水之勝輒思放舟而南從父令清平歿於任子幼先生獨毅然走千里卒扶柩歸其至性多此類凡十試鄉闈不遇思曷禮經以就試而竟未遂其志以卒家貧素不以經心瘠田數畝悉以種秫釀酒妻崔氏賢而早亡殊不勝悲念遇知交談灑灑不止輒忘其悲也卒之歲年五十三焉

贊曰吾鄉故多奇士然有道而文者惟先生爲最云先生未卒前

數日忽大風野園古木折數株豈先生之歿天固爲之兆耶歿後
鹿茸夢與對坐談笑如平生且期夢中頻聚每夜半野園枯木颯
颯有聲鹿茸以爲清江猶在也

右傳劉巖撰

182-330

陳之駉

陳之駉字桃文歲貢生世家於攸生後於熊漢陽劉黃岡康熙十九年庚申督學莊慎齋得試卷驚爲鷹翻摩空雞舞在望再後則督學潘耒原日以蒼古奇崛不顧俗眼側白生平知己僅是桃文曠代軼才稽經誼史不爲口耳學古文自秦漢而下貫穿陶鑄目遠心空得古人深處乃見古人淺處其略具於集內所選歷朝古文序言制藝不下數千首比諸臨川大士梁間物所爲古文詞沈博絕麗漢魏六朝其鑑而治探諸靈府妙合生成聞有別錄一通乃深至所傾漱晚歲目旨爲無識狡取今傳於後者制藝尙可掇其尤古文詞零落無從採輯其宗人思邁汲古士也曾梓島孫集

十二卷多方採輯存十一於千百不盡可存以不忍割愛存之卷
首卽岳孫記攸陳太史春江云此記近二千字文筆之古一空傲
像當時劉黃岡諸孫見而詫異因卑禮訪焉乃爲指示原原本本
今刻本流傳割裂失真識者辨之太史之言蓋有所自云

論曰當熊劉競爽文壇正桃文習靜山中時也雄雞一聲天下白
三楚起衰功能熊劉而後又以桃文爲首庸焉沈酣今古開闢戶牖
及門郭青來輩不免望洋彼其非道不徇經訓自娛長洲韓宗伯
崑山徐司寇屢折簡領之而已若桃文者其不朽豈獨以文哉

右傳羅典撰

陳先生諱之駟字桃文長沙攸縣人生時有鬼夜呼其名於學使

者門連呼會元狀元學使者急命吏徧查試籍無其名願吏曰志之弱冠穎悟如神一日十行下家貧不能鬻書聞湘中某氏以藏書雄乞爲檢鈔不索值數月而盡讀所藏書皆默識曰吾終身不鬻書矣年十九出應試學使者悉前事尤奇其文曰得毋鬼呼驗耶然先生得元十餘次矣已而皆落去毘陵學士潘公宗洛者江南名進士也視學楚南耳先生名見文駭未曾有置第一翌日集諸生於庭出先生卷颺言此真秦漢文也先生執卷詣案前曰某文薄蒙甄拔甚愧評隲甚過當但某句出某書宜讀某句宜句指誤處衆失色潘公起離席揖曰某弋科第早汲古淺幸教我取案上筆令改正更對諸生朗誦稱善人直先生尤以是多公虛懷云

先生既屢黜文益高益嗜讀書嘗寓省城華光廟華光神俗稱主
文試事試之前三日士紛紛持牲醴跽禱剪牲血石上流地凝五
寸許杯琰雜還搖籤聲砉砉然又有街賈骨董物者賣傀儡者泥
牛繭虎者提笄櫛囊悅脂粉箴管篋者偃師戲者往來足
不支先生執史記危坐如深山中吟誦不輟嘗欲闢三禮精旨融
貫紫陽勉齋之說爲一書苦小室暑蒸灼借人池上魚梁覆草蓬
坐其中納涼風臨清漪浩然有得狂喜拍膝大叫幾墮池水每思
經中疑難周院落行或跋躡山徑溪橋以指畫肚忽憂忽喜見者
莫測何事家人呼之食不顧或竟大怒罷食其後潘公以御史中
丞開府楚南先生亦垂垂老矣迎之不至予之金不受竟以明經

終先生之學遠於諸經尤長三禮恣睢於諸史百家爲文每樹
義天造地設陽開陰闢疑有鬼神呵助非人力同作者舌橋不敢
下亦相與屢而安之聞有經解若干卷古文若干卷詩賦若干卷
時藝若干卷後嗣不能收弄盡散佚吾邑門人關維夏梓其時藝
百餘首今行

張九鉞曰異哉先生之僅以明經終也鼎也不可使柱車虎也不
可使守閭昌黎子言之矣天旣生斯才而必欲使命與相妨焉何
也李賀召賦白玉樓出唐人小說若夫文昌主試天上開科乃傳
奇家遊戲耳豈有是理乎隄其運者必昌其文嗚呼其所傳者又
止於是而已悲夫

右傳張九鉞撰

陳之駮字桃文湖南攸縣歲貢生學博奧文筆岸異獨闢蹊徑潘宗洛視學楚南拔之駮第一集諸生於第出其卷曰此真漢文也之駮執卷詣案前曰某文薄蒙甄拔甚媿但某句出某書宜讀某句宜句因指誤處宗洛取筆令改正更對諸生朗誦稱善其推重如此提學蔣永修亦心賞其文歎曰天下奇才也屢困鄉試崑山徐乾學長洲韓葵寓書勸赴北雍皆不報嘗迨遙巖野教授生徒桂陽郭遠澧州褚令望皆不遠千里及門請業與邵陽車无咎王元復衡陽王啟稱楚南四家

右傳李元度撰

楚詩紀桃文爲文如江濤洶涌皆原本經籍徐司寇乾學韓宗伯
葵致書勸赴北雍大旨謂君出則爲名士居則終爲山人桃文得
書一笑而已皆不報晚悉焚其著作曰無爲世俗口議

攸輿詩鈔桃文著作甚富乾隆間同邑陳杰嘗裒輯其殘藁十二
卷刻之名曰島孫集仁和李寶幢學使序之

右湖南文徵羅汝懷錄

廣東省立第一師範學校

三

周上治

吾邑前直新安江江水淺深見底南山之緣倒臥焉分沙漏石明
燭須臾沈隱侯詩所謂千仞寫喬樹百丈見游鱗是也士生其間
方寸湛然可以玄對山水者則惟六雲周先生先生名上治初字
緩王而以餓餐爲其號貌清而脩長指爪眼開合有紅光峨峨玉
骨見衣表顧能屹然而立者終日好讀書自中經四部外凡在簡
素罕有不津逮而博觀約取度其本末而立衷焉以歸宿於易論
語其於二書箋注紛羅密幾無際章句小儒讀之不解作何語也
所居邑西偏邑長顧稀見其面足未嘗至市井一日縱步行忘路
之遠也忽昂首見麗譙遽反走若迷陽之傷吾行者校中課士發

子游爲武城宰題把文而謁者滿街先生屏勿省曰此何等題也
後世復有澹臺生如吾輩其人乃能爲之不相面而相背則邑諸
生某某者於由徑至室冷暖自知或時得一二公等碌碌兩無著
手處卽安得搖其筆端其高自標致眼底無餘子如此所與游多
一時名士而於徐少宗伯蘋村投分尤深蓋先生嘗受知學使者
谷公霖蒼再試皆第一實蘋村暗中摸索之蘋村旣官 禁近而
先生以年資貢太學蘋村歡然好逆爲言於國子先生欲延以都
講而先生投策禮曹則已單僕孱驢出春明門矣蘋村歎曰眞可
謂望塵不及也先生少無宦情適有僧自西蜀來眉稜尊異先生
數往從聽法僧誓不顧也最後則曝然投其杖曰放下先生於言

下有省而老道人者住石窟七十年鑒先生有道骨以參同契訣
投之自是遂習爲熊經鳥申能使玉池生肥氣滿大宅願視世味
益如嚼蠟矣善弈善琴亦善書法然非其好也所好自讀書外唯
飲酒人有執榼承飲者欲詩乞之詩欲文乞之文或持一錢來則
謾罵客絕不復與通猶憶蔡如始游鄉校見先生於博士官坐上
博士官者禹航鮑先生覺庭也歎羨先生謂如君者可與尋孔顏
樂處矣先生謝曰何敢當抑儒先此語某猶疑之樂則樂耳有何
處所可尋孔顏之樂妙不自尋而人獨安能尋之尋之是舟人覓
劍痕也夫樂已滅矣已失矣鮑先生以便面閣几曰是可與尋孔
顏樂處矣顧而語蔡如小子解未此我輩禪也當是時實索解不

得卻後十餘年偶一念至乃始拊手歎解知兩先生喫緊爲人非
口頭禪語而鮑先生已去先生亦蟬蛻濁穢無從印可矣先生生
前明天啓甲子終 皇清康熙壬午年七十有九配童氏子二人
曰政曰澄並邑諸生孫口口口口邑諸生其系本周平王別
子也宋之南渡諱明者自汝南扈蹕來臨安遂家睦州其後六世
復從州徙瀘之邑西又五世而當天順間瑄公官至臬使族益大
又九世而生石峽院長宗文公字在茲卽先生考也丈夫子五先
生其仲與兄上臣字鄰哉弟上如字汝石皆歲貢生才名亦相伯
仲云先生所著苔園詩南村詩及苔園文集已板行世易解論語
解藏於家銘曰

敬弘超悟逸少清真去之千載其人若存有詩有筆斲冰積雪柴
桑宣城柳州笠澤吾廬三間顏以玉磬先生來止宿宿信信泉聲
琮琤倚杖而聽記及紫魚動中之靜說動說靜說魚說泉傳神寫
照先生在焉嗚呼往矣新安江空月明人定墓木呼風

右墓誌銘方黎如撰

											1111
--	--	--	--	--	--	--	--	--	--	--	------

龔起賢

李豐

田英產

龔起賢湖南芷江貢生康熙四十二年會勦紅苗時用兵者多主撫起賢上書略言宜先做以兵威庶不致如前屢撫屢叛且請迅繳器械嚴禁匠造申巡防之令定交易之期稽查戶口編設保甲籌畫周詳具有方略同時諸生李豐呈繪地圖亦言前此勦撫苟且訖事未盡根株姑息養癰靡所底止其論與起賢合及大軍進攻天星砦苗始警懼就撫滌心內嚮兩人之言悉驗云又田英產麻陽諸生楚蜀黔三省會勦紅苗英產上書具陳苗眾乞撫未可遽信且審進退之方合哨兵之力事平按畝輸賦戍守控制毋以土地資其跋扈其後改土歸流多如其言

右傳李元度撰

林衡 子從直

林衡初名璣字義璠福州閩縣學生幼孤事母孝尙氣節勇於爲義縣令某捭撻請生衡憤其冤率庠士慟哭孔子廟庭籲大吏求理坐除名後受知於學使者沈涵重入縣學改名衡衡博涉載籍善詩古文詞及書法康熙癸未甲申間與郡守顧焯都督李涵同郡陳祖虞林豫吉藍連李馥等四十餘人結詩社於平遠臺合爲平遠集鐫之年六十三卒有草廬詩集文集全宋詩註鳴書小品竹窗筆記博古錄凡百七十卷子從直字白雲乾隆九年舉人亦能詩

右傳陳壽祺撰

國朝文獻通考卷之三十三

三

吳雯 王萃

吳雯山西蒲州人本貫遼陽父允升任蒲州學正卒於官遂籍於蒲康熙十八年薦試博學鴻儒不中選雯少明慧年十五補諸生輒流覽羣籍自六經三史外先秦兩漢下逮六朝唐宋元明四部之書旁及釋老內典祕笈皆能鉤貫旨趣含咀英華所得一發之於吟詠既屢試不售遊京師謁父執梁熙劉體仁汪琬皆激賞之尤以詩見知於王士禎目爲仙才嘗與葉方藹同直誦其警句方藹下直卽訪之名大譟大學士馮溥以扇索其詩雯大書二絕句荅之其坦率如是卒以不遇亦不能悔也歷遊燕趙齊魯吳越秦楚之區晚訪舊京師歸未幾居母憂以毀卒雯天姿雄駿其詩有

其鄉人元好問之風不使才不逞博不尙聲華不求媚好峻潔微遠自露天眞著有蓮洋集二十卷蓮花洋在普陀山下爰據名山記華岳山下有蓮洋村因取以名其集云

右 國史館本傳

漢魏已來二千餘年間以詩名其家者眾矣顧所號爲仙才者惟曹子建李太白蘇子瞻三人而已 本朝大一統閱六十載作者亦多矣余獨以仙才許蒲坂吳君此予之私言也亦天下之公言也君且死語弟霞曰吾平生知己無逾漁洋先生吾卽死遺詩勿遽出必待先生刪定雖相望二千里而勿憚跋涉而往求焉且謁誌墓之文吾無憾矣予居田里聞君之訃爲哀輓以代楚些其末

云已空文字障靜閱莊嚴劫何事勞結集猶煩大迦葉未幾而霞
至將君遺命予詩若爲之識然嗚呼異哉豈予與君精神感通雖
越在二千里不以幽明間有如此耶既次其詩遂爲其銘君諱雯
字天章其先遼陽人也父允升中順治二年順天鄉試六年授蒲
州學正十二年 賜同進士出身明年卒卒後幾年吏部按籍銓
授知臨潁縣君幼孤母朱有節燥撫君及弟霞等皆成立遂籍於
蒲君姿秉殊絕嗜書如飲食又薄帖括以爲不足爲雖在諸生輒
瀏覽羣籍自六經三史外先秦兩漢下逮六朝唐宋元明四部之
書無弗習也旁及釋老內典祕笈皆鉤貫其旨趣含咀其英華而
尤於五際六義有深嗜焉初僑居中條山南之永樂永樂唐縣也

李石兄弟三相皆居之詩人李商隱義山亦居之號玉溪生玉溪者永樂水名也君少而食貧無以爲養數遊京師謁父執友年二十餘矣京師士大夫無知其詩者予一日過同年榮工部洞門見其詩云泉繞漢祠外雪明秦樹根又云濃雲溼西嶺春泥霑條桑至今堯峯上猶上堯時日大異之曰此非今人之詩也吟諷不絕於口久之君再入京師一見談藝輒夜分不休如釋迦之有鴛子瀉山之有寂子相說以解不待往復扣擊君固以謂予一人知己如后山之於南豐也戊午己未間天子詔徵博學鴻詞之儒備顧問特舉制科海內名士鱗集闕下君在舉中顧獨耽寂守素不與他人走健僕囊巨軸宛顏低眉望門求知者競馳逐膠牢澹

泊門有雀羅予以是益重之臨胸馮相國知君名以扇索其詩君
大書二絕句荅之其坦率如是卒以不遇亦不悔也君遊燕趙齊
魯吳越秦楚足跡半天下而梁宋間詩尤工晚訪舊天津復與予
相見京師時康熙辛巳君年將六十倦遊矣君好友天下士士之
名雅者亦皆援君以自重所至縞紵贈荅無虛日然君胸中涇渭
不徇世俗毀譽涼燠以爲親疏故人亦樂就之所謂嵇叔夜土木
形骸黃叔度汪汪如千頃陂者庶幾似之平生好仙釋有空諸所
有仰青雲睹白日之意情耽隱逸僕僕四方謀升斗以爲甘旨之
奉非其志也嘗買圃鄭谷之口有竹數百挺黃梅數十株橘三株
中作草堂面雷首肘太華怡然自足將以終老而迄不得遂嗚呼

其可悲也君詩一刻於吳中再刻於都下三刻於津門今未刻尙
千餘篇予刪之不少貸所存皆卓然可傳蓋痛君彌留不忘誣諉
之意亦以報亡友於地下云爾今 當宁右文士苟懷一藝朝躡
芒屨而夕登館閣者何限君之名固已聞於朝矣而終不遇窮老
以死是尤可悲也君娶祁氏有子二人江蘭早卒崇厚州附學生
亦前卒繼娶聶氏孫一逢源尙幼卒以康熙四十三年甲申七月
某日得年六十有一以某年月日葬某阡君嘗以詩賦應制科故
稱徵君銘曰

山河兩戒皆首河中重華舊都扶輿所鍾昔在唐賢摩詰

王右丞
祁人徒

河允言

盧綸河
中人

義山玉溪

李商隱懷州
人居永樂

表聖王官

司空圖
虞鄉人

有明名

世首兩襄毅

楊公博王公崇古

勳名爛然風騷未繼嶽嶽吳生崛起布衣

身處蒺藜名動京師聲滿天下尙謀升斗晚卜菟裘子真谷口惟

君之詩疏越朱絃後有知者移情成連神之往來河聲嶽色

君得古銅

印刻此四字

修竹梅花徵君攸宅

右墓誌銘王士禎撰

吳雯字天章蒲州諸生所居曰永樂鎮有玉澗水唐詩人玉溪生

故里也天章有異才雅工詩善參活句曾一應博學鴻儒舉已而

被落依人遠游倚硯田爲生活亦士之失職不聊者也初天章至

京師落落無所合新城王阮亭先生得其詩讀而駭歎謂非輓近

人所有目爲仙才一日待漏朝房舉示館閣諸公如所云泉繞漢

祠外雪明秦樹根濃雲溼西嶺春泥霑條桑河聲過雷首雨氣下
風陵至今堯峰上猶上堯時日者計不下數十句葉訥庵學士大
加擊節下直卽命駕往訪詩名由此大譟先生又嘗語人云僕與
海內談詩幾五十年雅材固不乏然得隨者終屬蒲阪生其爲哲
匠所心契如此詩集亦先生所點定外間少流布者有友從蒲東
來曾爲予代鈔百十紙審視非完本卽諸摘句亦多散佚然金甌
琳瑯亦何必多之爲貴耶聞天章在都日獲古銅章篆嶽色河聲
四字大喜謂己所卜宅合當勝處侈爲神畀予謂蓮洋詩鬱蔥秀
拔而齋泫澄深渺乎莫窺其涯浹援印語作詩評庶幾惟肖此文
字之祥也河嶽英靈請卽以名其集可矣

右小傳鄭方坤撰

吳雯字天章其先遼陽人父允升順治初舉人爲蒲州學正卒於官遂籍於蒲少姿稟殊絕薄帖括不足爲詩情高邁當世無輩耽二氏之書有出世之志故其詩亦頗用禪語初僑居中條山南之永樂鎮鎮卽唐之永樂縣有玉谿李義山之所居也食貧無以養母以拙於時藝困躓場屋中體貌粗醜衣冠垢敝或經歲不盥浴人咸笑之而詩才特超妙人嘗比之溫飛卿云與歷城王萃爲吟友康熙己未以鴻博徵初至京師未知名王士禛見其詩亟賞之謂爲天才吳詩名遂譟都下旣試報罷遂遊趙遊齊魯梁宋吳越秦楚浪跡半天下晚卽津門又入京師終不遇士禛嘗稱其過儀

真詩云真州荷花一萬柄正對城門是酒家下馬當釀更斟酌醉
臨明鏡看吳娃風格殆不減楊廉夫其推敬如此而趙宮贊執信
稱之則云千頃之波不可清濁天姿國色亂頭粗服皆佳其詩全
首如古意云美人豔南國顏色如朝霞昨來邪溪上妬殺芙蓉花
秦珠隨月滿越練逐風斜獨慕孤高意今年猶綰紗吳門初春云
聞道江干冰漸消眼看芳草坐無聊酒杯總使愁中得春色終難
客裏銷山鳥漫吟泥滑滑吳娘偏唱雨瀟瀟歸時借問金陵路桃
葉新添幾尺潮摘句如黃湄遊太華山得結屋地賦贈云須臾互
長虹關陝半呈露晚望云河聲過雷首雨氣下風陵半山云白雲
逗殘雪忽見前峯暝憶栖巖寺云河流同郡白山勢入關青瓜步

舟次云稱次廣陵郭忽逢京口山皆卓然可傳今蓮洋詩鈔十卷
蓮洋集二十卷蓋卽士禎所定本浮山張體乾得之士禎門人黃
叔琳家刻之者也而執信之言則曰妻父故與阮翁同年始入都
以詩投謁阮翁心折竭口爲延譽而其性迂僻寡合遂淪棄終身
與予甫一見如舊相識余好用馮氏法攻人之短惟蓮洋不以爲
忤其作字用馮法不能工也晚相值於津門出詩卷見示云曩之
所攻悉改之矣乃知其非名輩所及也屬予論定予請俟異日蓋
其時正逢阮翁之怒不容闕入詩壇故耳又數年卒於家卒後聞
其集送新城阮翁爲作墓志且刪定其集迄今將二十年矣而未
行於世意阮翁鑿而多忘未幾遂亡未及歸諸吳氏耶若然池北

藏書散失殆盡連洋集從可知矣

右文獻徵存錄錢林撰

王萃

王萃字秋史雁城人諸生少學詩於田雯既友蒲州吳雯其所爲詩清拔絕俗有亂泉聲裏才通屐黃葉林間自著書黃葉下時牛背晚青山缺處酒人行之句人稱爲王黃葉王士禛嘗寓書張中丞鵬言萃之才中丞贈之金引爲上客後成進士自稱七十二泉主人

右文獻徵存錄錢林撰

陳鳴皋

君諱鳴皋字蘭崖朝川其別號也明初自洪洞來遷禹曾祖蒞封戶部員外郎祖所樂諸生伯祖所職萬厯丙戌進士歷官參政父某武生君文采翩翩有大節好古尙義惟恐不及少讀書里塾出語輒驚其師既長操筆數千言立就康熙壬子學使者史公逸裘奇其文拔入太學未幾念父母並篤老遂疾馳南歸同舍生挽留不能止自此依依膝下左右就養者三十年訖父母歿終不出執事人或不解其意或笑之不顧也修族譜收合同姓祖免待以舉火立妻也好學能文章崇頤末李自成陷禹率其婦韓氏登樓自縊君之旁邑搜

得其遺詩刻之人謂君尊祖敬宗表章節義有功先世爲多性嗜
酒尤喜爲詩歌與河內鍾爾知同里劉東里楊道南馬子陶趙友
春劉蒼佩六老人晨夕過從倡和無虛日詩旣成更大呼稱善痛
飲達旦以爲常由是諸雜沓禮俗率偃蹇不肖赴然遇事關名教
者則應時立往未嘗或以酩酊廢城南忠烈祠祀禹陷時罵賊死
節副使李公歲久圯壞君偕眾力復其舊壽州人有夫婦將其女
至禹東之富邨女故已許字人聞父母欲他遣遂自經死君走訪
其姓名不可得歎息久之書其事於石嘗兩周孀婦之不嫁者數
年已而其節皆不終君初不自悔而變其所爲也君旣慷慨好施
與以故久而家漸貧禹西南近大山里人競鑿山數百尺出石灰

以射利君窘於生理姑就而學焉殊不諳其術顧更闕怪石治洞
數區日飲酒讀書其中寒風積雪下簾塞向仰天而歌聲振林谷
於是費錢不下數百緡石灰利終無所獲而詩益進君笑謂子弟
曰有是哉吾之拙於生而工於文也復何憾乎哉今甲申之七月
年方五十八遽病不起悲夫桑梓之人物零落盡矣配某氏子四
人果增廣生榮太學生果卓女四孫男四章民章文章善某是年
十一月之二日耐葬君祖塋之次君姻友韓君孟宣以果狀來請
銘銘曰

嗚呼余之不見君也踰十年而每見未嘗不問君之所爲於孟宣
何孟宣今之來也而一旦聞君之忽然嗚呼已矣蓋悲古學之日

減而絲毫曾不得以少延

右墓誌銘全軌撰

邵長蘅

邵長蘅江蘇武進人性穎悟讀書日數行並下十歲補諸生因事除名束髮能詩既冠則以古文詞鳴謝舉子業弗事枕藉經史力追唐宋諸大家所作淘汰鍛鍊粹然一出於正客遊京師會開博學鴻儒科海內之士鱗集輦下若施閩章汪琬陳維崧朱彝尊輩咸與長蘅雅故時時過從于喁迭唱旋入太學再應順天鄉試報罷歸寄情山水放遊浙西攬湖泖之勝會商邱宋犖巡撫江蘇禮致講藝論文敦布衣之好長蘅亦觥觥持古義無所貶損時論賢之長蘅始爲詩瀏灑頓挫步武唐賢晚乃變而之宋格律在蘇黃范陸間所著自康熙戊午以前爲青門麓案凡文十卷詩六卷已

國朝書目類考卷之四十四
未迄辛未爲青門旅槩文四卷詩二卷壬申以後爲贖槩文五卷
詩三卷長蘅始除諸生名自署青門山人因題其集云

右 國史館本傳

青門山人既歿之明年厥孤士豫士京衰經涕洟持狀來乞銘曰
先君葬有日矣抑此先君之命也憶余始識山人於黃州嗣開府
江右山人數過從比莅吳則延致院署簿書之隙相與商榷今古
意見多合觴詠往復殆將一紀今已矣微二子之請忍無一言志
其幽窆以慰亡友於地下乎按狀山人系出宋大儒康節先生後
康節六世孫依婦家來毘陵始爲常州人居武進縣之章滄里十
一傳有諱銑者山人祖也考諱文燦嘗以家貲贍其鄉里邑中稱

爲善人山人幼穎敏讀書日數行下籍籍有神童之譽甫十歲卽
隸籍學官每試屈其曹耦謂青紫可戾契致及省試輒不售山人
於是發憤謝去舉子業益潛心六經三史及唐宋諸大家之文鑽
穴寢饋梳爬剔抉久之融釋貫串大放厥詞理足氣溢醇而肆簡
潔而渾雄蓋山人根柢槃深而又甚疾夫世之爲古文者標斂句
貨影響依附故其於文洮汰鍛鍊粹然成一家之言今所刊行青
門集若干卷是也往余序山人之集謂 國朝布衣之以文鳴者
自商邱侯朝宗甯都魏叔子外唯山人可鼎足而立然山人起孤
生不藉家世黨援刻苦踴厲與之後先揖讓於壇坫之上而詩又
特工又能於及身親見其詩若文流布遠近爲當世所指名以不

沒於身後較之魏侯力倍難而遇過之噫可謂盛矣世競惜山人
阨於一第恹惓不得志以老若此者詎不謂之厚幸歟山人內行
淳備居親喪力行古禮又嘗獨力剏始祖康節先生祠所費不貲
皆取諸子錢家貳事族子某有失身爲豪家奴者山人捐金拔之
歸與人交煦然以和中坦坦無城府意所不可卽髯張面赤絕無
澳忍阿附之習嘗往來京師有顯貴物色之者山人自矜重不先
不注蓋其制行之卓卓者如此家故不貧有田一區在蓉湖之濱
歲有秔稻蔬藪之奉居則有山池竹木禽魚之翫其出而遊也特
欲縱覽名山大川與一時偉人巨子抵掌樹頽廣拓其見聞以銷
其胸中結轡抑塞之氣故宇內名勝之地足跡幾徧所交悉當代

第一流晚而倦遊詩文益恣肆瓌璋令人睥睨震掉余方以此卜其松喬之壽而山人遽不幸死矣豈不惜哉山人姓邵氏諱長蘅一曰衡子湘字也享年六十有八歿於康熙甲申年十一月二十二日配錢氏前卒側室高氏劉氏子男子二長士豫郡庠生高出次士京太學生劉出子女子二適管澄毛銳孫男女若干人墓在某鄉某里之原窆以某月某日山人故嘗補博士弟子員已而入太學試於吏部當得佐貳官銜名選人然非其所好稱青門山人從素志也噫世之稱山人者眾矣幸弼其外而枵其中若青門者實乃不愧今新城王阮亭先生雅知山人稱其文爲荆川後一人長洲汪鈍翁先生以爲山人人品似陸魯望文章似柳子厚知言

歲嗚呼是可銘已銘曰

既昇矣孰聞之以弗昌於時有蔚不磨君獲則多

右墓誌銘宋華撰

山人姓邵氏名長蘅一名衡字子湘別自號青門山人世居毗陵
漳滏里五歲侍其家先生卽席命占對輒應口就九歲能屬文日
誦秦漢數千言十歲補邑弟子員十五試省闈文已入彀五策橫
放多觸忌諱語被黜時論惜之是歲順治辛卯也張西山先生能
麟視學江南歲試拔第一當食餼會丁母艱格於例未幾江南奏
銷案起絳誤者萬人而山人亦黜弟子員籍時論益惜之山人束
髮能詩弱冠卽又以古文雄一時既謝舉子業則盡棄其少作益

沈酣三史唐宋大家既又潛心經學凡六七年渙然有得而後山人之文乃大昌嘗曰文章須十數年攻苦自立根柢不則沾沾撫秦漢樞八家要是華葉耳奚其傳是時邑人鄒祇謨董以甯方與玉璣以古文相劇切皆願交山人鄒董數稱吾邑有邵子荆川先生後一人也玉璣曰然久之橐所著書北遊燕一日而名動京師宣城施公閏章新城王公士禎崑山徐公乾學黃岡王公澤宏皆先達有盛名顧皆折輩行與定交若恐失之與陽羨陳維崧秀水朱彝尊鹽官陸嘉淑慈溪姜宸英宣城梅庚相友善皆一時知名士山人性樸直意所不可不能爲唯阿諸公持詩文就正率臆點竄無所徇亦不肖以名刺先貴顯人諸公乃更以是多山人居年

餘聞人談登州海市之奇忽跨驢走二千里之海上登蓬萊閣愴
悅望所爲三神山者幾或見之然卒無所遇復走京師親交強之
入太學已隨牒試吏部長洲宋文恪公方爲冢宰得其文驚曰今
之震川也拔第一例授州同知時滇黔猶開入貲例立得選親交
欲爲之地山人笑不應乃提筆研再就京兆試再報罷笑曰吾大
錯吾五十青裙媪猶從少年爲倚門妝耶草堂松菊遲吾久矣遽
束書歸江南嗟乎 國家三歲一貢士士登賢書者亡慮千人村
夫子之挾兔園冊黃口之占畢者往往弋獲去才如山人顧困硯
連蹇以老豈非命哉而論者謂科舉足以得天下士其然乎哉山
人豐頤而髯磊落高曠視一切泊如也家居篤孝行能飭名節母

喪苦由哭踊力行古禮蔬食者三年及外艱時方困科繇墨衰奔
走闔閭又以病茹腥不逮母喪之盡禮每語及輒泣然族有始祖
祠祀宋康節先生庠陋不稱祀典乃更卜陟拓其規模費可數百
金山人獨肩之不足則子貸以應有族子略賣爲豪家奴出氣力
捐金必拔之歸然後已建小宗祠於家略倣溫公書儀朱子家禮
爲儀節歲時率家人獻奠甚謹初山人之被黜也先人遺田及千
畝一月閒忽斥賣過半然不名一錢鄉里竊笑之未幾里諸生十
餘人以多田賦逋伍伯纍纍繫頸去被捶笞荷校府門至有畢命
者乃詫曰邵君其智人耶歲己巳山人年五十三卽治棺棺成顏
曰息庵而自爲之記大指齊得喪一死生其言類聞道者山人故

好遊自壯迨老足跡將半天下既歸益縱情山水爲其大兒娶婦
便敕斷家事尤愛武林湖山數往遊其族兄戒庵學士故有別業
在西湖每至必延居之累月然後返嘗欲結廬孤山放鶴亭側與
處士卜鄰又欲營一舫載筆牀釣具爲浮家吳越閒未果會中丞
商邱宋公開府吳雅知山人禮致之幕府山人注書論文外不涉
一俗下語公嘗屬撰宋氏先賢祠碑率子姓奉幣再拜請山人再
拜曰諾然衡賤官階當用誰某公曰此俗見耳先生豈真以館閣
頭銜重於文士耶文成卽署先生名足矣其見重如此公以文章
清節負朝野重望而中丞體故嚴重二千石以下文武吏抑首促
促跪白事逢掖之士罕有被容接者公於山人顧能折節敦布衣

交而山人益觥觥持古道無所貶損論者兩賢之比之陳仲舉之於徐穉任延於龍邱萇云先是康熙癸丑 詔天下修郡縣志毗陵邑志當事以屬璡與山人纂述之功則山人爲多會軍興報罷後十年復奉 詔修山人時客京師璡勉卒業而采摭多從舊槩書成列其名識不忘也山人所著書已成帙者有麓臺旅槩廿二卷中丞公序之謂當與前明潛溪震川諸大家相驂騶吾邑令王侯元烜亦稱山人詩古文辭必傳世今方爲鏤版行

陳玉璡曰予交山人三十年矣故知山人特詳予觀山人蓋古篤行君子也世之慕交山人者獨盛推其文章蘄黃顧景星亦振奇士讀其文歎曰五百年無此作者矣而吳門汪鈍翁琬乃言青門

文章以柳子厚人品高曠似陸魯望也人言鈍翁喜媢罵人斷斷少許可顧獨心折山人有以哉有以哉

右傳陳玉璣撰

邵長蘅一名衡字子湘自號青門山人居武進之漕漕里讀書日數行下十歲卽隸籍學官每試出其曹謂青雲可戾契致俄而奏銷案起絳誤除名時論惜之山人束髮能詩弱冠則以古文詞鳴旣謝去舉子業弗事乃益枕經靡史寢食於唐宋大家者又六七年泚汰鍛鍊粹然一出於正而文境高不可攀矣曾一應博學鴻儒之詔輦下諸先達如愚山阮亭健庵諸公皆折輩行與交而迦陵竹垞冰修西溟諸君子則又所挹袖題襟于喁迭唱者也久

之報罷入太學再應京兆試卒不遇笑曰吾大錯五十青裙媼猶
逐少婦爲倚門妝耶遽束裝歸山人本好遊至是益縱情山水尤
愛武林湖山之勝欲結廬於放鶴亭畔又思營一舫載筆牀釣具
爲浮家泛宅計所志皆未就而宋公牧仲開府吳會禮致之幕府
談道論文敦布衣昆弟之好山人益觥觥持古義無所貶損論者
兩賢之開府序青門集略謂 本朝韋布之以古文名其家者商
邱侯氏甯都魏氏已耳山人起孤生不藉家世黨援刻苦踴厲與
之後先揖讓於壇坫之上如鼎三足然叔子雅不以詩名朝宗力
追北地而蹊徑未化山人格高氣適嘗觀海市於之杲窮炎漲於
扶霄而詩益雄肆奇偉卓然成一家言是又二氏之所瞿然退舍

也夫

右小傳鄭方坤撰

邵長蘅一名衡字子湘自號青門山人居武進之漳滏里嘗言道學之有異同自朱陸始也異同積而爲門戶自姚江以後始也又言讀書非記誦之謂蓄諸躬必有根柢見諸文足資世用蓋德與言兼焉若立功則視乎其時耳潛文之源在讀書在養氣不知讀書奚有於文下者譁世取說殆類俳優其病鄙上之習遷固之優孟而悅其贅身其病剽又上之阻宋人之落魄而以爲元醜其病腐詩之名家皆學古人而各得其性情所近視吾自得何如爾吾之學旣成無論其爲漢魏六朝爲李杜爲三唐爲宋元明人之詩

皆可使之就吾之鑑治而不能爲吾病吾之學未成無論其學漢魏六朝學李杜三唐及宋元明皆足以病吾而未必有當於詩何則其自得者尠也著青門籠彙詩六卷文十卷青門旅彙詩二卷文四卷合之得二十一卷其自序曰嗟乎士負七尺軀進不能有所樹立退不能巖棲谷飲垂老矣溷姓名於不仕不隱間爲鄉里所笑行自慙也不幸如昌黎所云衣食於奔走學殖日落而猶欲以是爲詹者與立言之士爭身後名於萬一又重自悲也雖然某於此亦有可以自信不爲流俗毀譽非笑之所移者而況海內交遊離合之跡忠孝節烈之行事與夫山川遊覽之勝往往見於予文他口歸草堂時簷偃曝偶一展卷或亦赧然而自笑也夫

右文獻徵存錄錢林撰

洪昇

洪昇字昉思浙江錢塘人上舍生著有稗村集昉思名滿京洛因演所著長生殿傳奇至於斥革受辱又遭家難坎壈終身五十餘墮水而歿天之戾之爲已極矣而其詩疏澹成家漁洋及門中在吳天章下餘子之上應以可傳許之

右 國朝詩別裁集小傳沈德潛撰

洪昇字昉思錢塘人上舍生遭家難流寓困窮備極坎壈康熙甲申自茗詈還落水死有稗村集王士禎所定也石門云先賢逝已久子亦宿石門天寒鳥自歸林表斜陽昏吏隱計難得詎知憂世屯栖栖終袒褐此意向誰言又公子行云春明門外酒樓高稱體

新裁蜀錦袍花裏一聲歌子夜當筵脫與鄭櫻桃又客武康有句
云林月前後入谿花春夏開其送高宮詹入都一百韻尤警策人
競傳之朱彝尊有酬洪詩云金臺酒坐擘紅箋雪散星離又十年
海內詩家洪玉父禁中樂府柳屯田梧桐夜雨詞悽絕蕙苴明珠
謗偶然白髮相逢豈容易津頭且纜下河船趙執信曰昉思故名
族遘患難攜家居長安中殊有學識其詩引繩切墨不順時趨雖
及阮翁之門而意見多不合朝貴亦輕之鮮與往還見予詩乃大
驚求爲友久之爲長生殿傳奇非時演於查樓觀者如雲而言者
獨劫予予至考功一身任之褫選田里坐客皆得免昉思亦被逐
歸予遊吳越閒兩見之情好如故後聞其飲郭外客舟中醉後失

足墜水溺而死矣

右文獻徵存錄錢林撰

昉思工樂府宮商不差脣吻旗亭畫壁往往歌之娶黃相國機孫
女亦諳音律所作樂府長生殿又有天涯淚四嬋娟雜劇今已少
傳本矣

右兩浙輜軒錄張維屏錄

廖燕

予乙酉游粵東有廖生瀛者持其先人柴舟先生所刻二十七松
堂集謁予曰先君子讀先生文服膺十餘年矣歎服不去口日教
瀛與後學錄先生文焚香玩誦恨未識先生面乃今先生至粵而
先人適卒何不幸不得見先生一吐其胸中之奇以質其所未逮
然又幸先生之來得以其遺文請正以見其生平而因以求先生
文以誌其墓則先人死且不朽言罷流涕手檢其集中謬相推許
之言數則示予而長跪頓首以請予惶悚驚歎謝不敏旣而讀其
文卓犖奇偉矯矯絕依傍議論發前人所未發序事宗龍門詩新
警雄逸字字性靈而其人品學術性情神態磊落浩然之氣畢露

於行間於戲豈易得之士哉處士諱燕字柴舟廣之曲江人生於崇禎甲申時值鼎革廣東尙爲明守其後數更離亂破產食貧卒於乙酉是爲康熙四十四年得年六十有二十八歲補弟子員旣而棄去高隱常道莫不慕之而處士介然自守不肖事干謝肆力於詩古文能絕去近代陋習追蹤古人予耳處士名久未見其著作今始見之而處士已死於戲陰陽變化四時行百物生文之本也聖人畫卦造文字蓋假借以發其蘊而文章實不在此作者不能仰觀俯察於日月寒暑山川草木鳥獸以及聖人之禮樂政事歷代人事之變遷與一身之視聽言動求之而區區求之字句之間亦未矣故其於古人之文得形而遺神知方而不知其無方乃

今處士之文何其能得我心之所同然也且夫修辭立其誠聖人立言與德功相表裏非爲娛目邀名欺世之具近日作者惟甯都魏叔子先生言經濟卽可見諸用言道德卽其所能行而章法一準乎古處士議論雖間有高明之過然實可繼魏先生以不朽乃處士語人曰叔子先生後惟王崑繩一人崑繩之文汪洋無涯變幻百出直欲駕唐宋元明而上噫予何敢當處士之過譽哉顧以予之落拓見棄於時而萬里外有知己如此及親至其鄉見其子而其人又死悲夫悲夫子生平知己不過二三人皆先我而死處士未謀面亦死粵中高士屈翁山陳元孝亦死梁太史藥亭亦於是年三月死粵中虛無人而海內老成凋謝又不獨粵中爲然予

國朝書目卷之二
三
倜傥然獨立天荒地老俛仰無聊一無所成於天下徒以文字表
彰忠孝遺逸而悲歌忼慨呼天而莫之應則誌處士之墓而不禁
潸然涕下也孰知予之心哉孰知予之心哉處士祖父母某父母
某元配鄧無出繼亦鄧生子三瀛湘清瀛庠生能世其學湘殤清
幼女子子三銘曰

乾曜三光坤列九垓造物奇譎風雷水火山澤草木鳥獸各別終
則生人爲天地心代之喉舌經之綸之煥乎文章六字有截嗟爾
蒙蒙不知其本求之殘歎此道在人乃化之根不可斷絕處士廖
君嶺海奇英鍾茲滴血磅礴萬古睥睨百氏雷轟岳嶽視彼融修
大兒小兒何堪一瞥天賦之才又恐其張罄洩丹訣遂度其年留

茲真宰歸諸寥泲嗟哉廖君惟我與爾心解神悅白日昭昭幽局
漠漠靈虛洞澈千秋尙友矧在同時何須面詰九原可作溘彼埃
風招搖獨揭

右墓誌銘王源撰

魏坤

君諱坤字禹平別字水村世居嘉興之魏塘今之嘉善縣也曾祖考某祖考某考某雖不仕鄉黨稱善人從祖吏科都給事中大中忤奄寺受蒙蔽刑死詔獄世父學泚以哀毀卒苦次故言忠孝門者首魏氏君十齡草今文弱冠兼攻古文詩詞家有田二十畝不足供餽粥父喪除游京師入太學京師貴人延君授經教其子既而客中吳與嘉定陸徵君元輔海甯陸處士嘉淑訂忘年之款詩詞日益工尋就試橋門撰石鼓賦國子師交賞擧以爲絕倫也屢試有司不利乃託迹賓幕東游歷下謁孔林南入楚粵西浮彭蠡淹豫章年五十有四始舉鄉貢進士兩與計東偕赴禮部仍下第

歲乙酉復書驢券北上以歲除前一日抵真定之南關寒甚擁爐
促酒乍飲三爵聞一嗽而君逝矣太守寶應劉君中柱君之故人
也哭君於簣下質明視其斂含載以輜車歸其喪於是君之子錫
琦錫璉將葬君於遷善鄉之東蚤圩凶服來請銘嗚呼君之學叩
之而不窮其修辭動中事會所填樂章被歌管悉合於律宜其有
浙西才士之目舉於鄉謂晚且達矣乃反速之死於道路天平人
平若其持己正臨財廉非其道一介不以入懷非其人近乎膩而
不污可謂有君子之守也已君生於丙戌月日卒於乙酉月日享
年六十先娶陳氏繼娶王氏有子二人孫男四人女二人所著有
倚晴閣詩鈔秦淮雜詠歷山唱酬集粵游記程詩水村琴趣多行

於世銘曰

魂兮歸來北方不可以久留些反葬於鄉樂哉斯邱些將詩可傳抑又何求些

右墓誌銘朱彝尊撰按文藝四李先生漁傳內魏先生附見已刊成茲得墓誌全文因依次編此

日本書紀卷之三十一

三十一

劉授易

劉授易字五原號損齋湘潭人附貢生著有損齋詩集中分燕臺
過嶺渡江浮海迎鑾靈渠茱萸樓等集

損齋與同縣陳滄洲鵬年張湘門璠曾虹受世琮諸公交好滄洲
成進士時損齋亦客都門同遊西山賦詩作記記今採入文徵康
熙四十四年 仁皇帝南巡授易與武陵王爲壤天門唐建中各
獻詩冊迎謁 行在蒙 天語垂詢來意 諭令候試試舉 欽
取一等三十人授易爲壤皆與而建中居第二奉 諭至京分別
授官授易不樂仕進浪游四方嘗問詩於王新城尙書又與嶺南
三詩家交陳恭尹元孝爲作詩序詩集久佚邑人罕見故無由知

國朝詩林卷之二十一

其生平也

右湖南文徵羅汝懷錄

三

儲欣

自孟荀董楊爲斯文道法之宗至唐開元天寶後蕭李獨孤梁氏
作而識復正至貞元而體彌闕遂終唐世多克武之宋繇穆柳逮
晁陳其體胥演於貞元至乾瀆間而君舉伯恭正則同甫行之世
號古文中決科體元逮初明亦多作者又百餘年至嘉靖而遵嚴
浚谷荆川鹿門震川氏胥用古文詞鳴唐茅歸三公又號經義大
家後復寢百年千子大樽二者差具體而微它如朝宗勺庭工古
文詞而科舉文魁所傳述青峒子駿文止大士蘊生暨代興諸諸
彥經義多奧衍造極而魁湛深於古義之至者不兩能其信然乎
其信然乎若叔祖在陸先生所謂兩能其藝之至而法胥與道合

以克豎海嶺碩望者與先生諱欣字同人嘗闢在陸草堂學者號
在陸先生參藩公孫上舍醇庵公叔子也少有巨人相性篤學其
嗜經籍也若食之宜粟菽衣之宜布帛嚙齧之提挈之而曾不知
其少倦也今按先生傳茂才君宜公曰順治丙戌至己丑怙恃降
割予與弟相依爲命晝支撐內外侮夜理鐙雜誦寒甚則擁衾背
坐互覆所讀書未逮半而鄰雞胥鳴不解衣寢矣夢寐中輒放聲
長號又序礎芹周先生藁曰予年未二十偕舍弟君宜羣從井陘
清源萃友八人里中稱曰八俊旣而廣之爲十二人約曰非聖賢
之書勿視非其行勿繇不幸有過必面責改然後止又約曰文之
課月有三合而課者一爲書之藝七離而課者二書之藝五論表

判策暨詩賦古文詞諸體胥一後如約行之寒煖不少較者凡七八年蓋先生稟虞庠翼子公文林公訓指嘗約礎芹天綏二周先生培生葉先生仲文吳先生暨茂才公井陘公清源公爲八士課又益以子廷許先生亞卿亮生二周先生叔遠徐先生切劘經義繇是子邑文獨闢沈雄閎邃體視明季尤盛其後遂衣被天下唐書所謂殘膏賸馥霑旬後人者迄今窮海絕徼猶胥爾而紀其源則實繇先生之勤學慎交始也先生嘗札山陽明揚楊氏曰某少好古書年二十凡先秦兩漢司馬氏班氏暨唐宋諸大家之書雖不盡精曉然亦多成誦爲文深入敢戰雖不盡軌於正然有時言所不能言此先生自道之詞而其實則雖借古作者並轡而馳

美以越此是故先生經義繇深入敢戰之幹力以紆鬱奧衍造極
之詣其美未易悉而尤符古語者曰文章爾雅訓辭深厚曰氣盛
則言之短長聲之高下皆宜曰含英咀華曰窈渺密栗而彙而揚
摧之曰若人之爲言固當如是至其芟蕪斥俚盡放黜莊列首楞
嚴體諸子剽駁體萬庥乙未後體雲間儷藻體金沙肥脂體並扶
西江流變澀整體茂苑象偶體雖南宋決科參停今古嘉靖倣宋
大家而無以解免驚緩之訾者猶將抉其突奧而摧論之而先生
自運則鑄唐宋以探秦漢之精採天崇以化正嘉之貌才高而繩
削彌謹齒宿而詞意彌新實克於荆川震川孟旋子駿大士後斷
然自爲經義大家而楷樞後學功尤鉅也先生少治古文詞後交

達州李念齋先生愛其文不蹈襲雪苑金精派而詞指特錢削因
時偕上下議論故所造尤深後清源公遊嘉善交慈谿姜西溟先
生推論古文書在陸草堂記後曰自宋南渡此道寢絕今君家得
兩人焉先生亦雅喜海內之有同解也陽曲傅公他富平李天生
江西曾庭聞三先生嘗時面清源公激歎先生文了無頹蕪氣而
吳江葉星期先生亦權訪草堂咨歎曰君文適淨乃爾耶先生自
喜古文詞推論甚悉嘗曰繇秦漢入則句不冗又曰古文極盛爲
西漢爲晚唐晚唐實與西漢埒經緯集其巨擘也又曰宋大家老
泉第一曰李泰伯力殊勝而推有明一代則曰避廢較勝至比日
則獨高朝宗氏又曰筆必能飛始可語古文能走業不逮若盤踞

勃窣期下矣此所謂鏡入幹理之識也先生年二十有一學政李公大收常鎮士半日而七藝成補博士弟子望寢起而內外侮亦寢息尋食餼試輒弁其曹康熙庚午先生年六十安邑學士王公主試獲卷歎曰真古文真古文書名第四揭榜環觀者如鶻胥歎得人辛未禮部試不入貴要門有來招者訖不往唯一謁西溟先生榜未揭輒歸繇是輟計偕役者終其身先生望焯著而摧科舉文利弊尤愨且悉札明楊氏曰未得手而厭生已改塗而復憶又曰三年之文若出數手一年之作亦分數體三折肱知爲良醫精文律者以爲名言而指授生徒筆硃圍整其祇承有司之尺度尤密先生傳翼子公曰說經書未嘗布席繞室周行或持杯酒且飲

且說說一章豁全部而先生指授亦多繇杯酒間發之間稽遺迹
錯引新說侍坐者倏天機呈豁灑然易容殆雅類蘇端明詩所謂
無數心花發桃李者而它師窮年兀几席或蘄生徒一義之開明
而不可得此殆繇神解未易以壽陵餘子而彊學之也蓋自康熙
丁巳甯德兄雋戊午諭德楊公戶部吳公雋而楊公己未復聯雋
辛酉臨川兄雋壬戌復聯雋甲子偏撫潘公雋江南第一戊辰復
雋庚午先生中雋繇是時館於楊癸酉南安公雋丙子侍御偕先
生甥兩吳君雋己卯慶雲蔣君南宮潘君曹司郁君偕雋壬午曹
司蔣君雋於北子廷先生嗣杏聯偕編修汪君雋於南癸未侍御
君復偕汪君蔣君聯雋乙酉孝廉蔣君雋於北丙戌郁君雋而是

年先生遂夢兩楹矣戊子編修弟雋於北滁州兄偕固始汪君雋於南己丑編修弟復偕汪君蔣君雋辛卯汜雲弟偕郡教蔣君雋於北雲南弟偕侍御朱君雋於南癸巳廉使弟又陸姪雋甲午大文幸雋於北孝廉叔偕徽州弟雋於南丁酉先生孫曰虞弟雋辛丑大文偕徽州汜雲二弟雋洎雍正癸卯廉使弟偕朱君蔣君復雋焉而它如上舍陳君名播京洛礎芹先生嗣茂才省齋君司諭吳君虞庠霖蒼應余二吳君少白公孟爲公胥號江左宿儒以暨籍於校版於南曹若私淑艾而書名於榜者至不可殫記也然則先生經義雖原本古作者而未嘗不兼綜南宋決科之體也先生有史才嘗撰盧大司馬金翰林陳檢討傳暨臧林豐義家傳得司

馬班氏法它文於韓柳氏尤深嘗做非國語著曲臺疑八十篇有
奇後爲人持去裁存與齡捷伯禽二辨序記銘說極佳者並多放
失今茂才叔暨曰虔弟先刊在陸草堂集六卷唐宋十家選類選
亦附刊焉嗚呼此所謂兩能其藝之至經義業雅武震川而古文
詞法又克越宋以武唐之開元貞元者也先生雅不事標榜而躬
行殊慙君宜公早卒慟寢絕誨二孤胥成立長卽孟爲公也俞孺
人兄文若先生號高才生以窶卒泣然曰於我殞復分田宅贍窮
嫠再植厥嗣焉先生性甚和而不可非義干癸酉館於離商或屬
以貢緣毅然曰吾雅不識貢緣事拂衣歸先生里居力蘄發潛德
邑前輩安隱鄧氏質行王氏韋人蔣氏王谷任氏燕侯楊氏胥文

以表之交友尤澹而篤曩會業十有二人晚強半凋落惟許葉二先生時時過從談笑有味嘗語茂才叔曰吾交滿天下歲寒松柏兩公耳小子識之先生交海寓士久列壇坫右雖援寡多抵巇而克沈潛卷帙者恆翼佐之卽侈張者婉導之或諷以闢精舍講輒愀然曰某得爲眞讀書人幸矣其硜執不少浮湛若此然則誦先生之文可以摧道矣故曰法與道胥合也先生卒康熙丙戌距生前辛未年七十有六壬辰學政銅仁張公檄邑崇祀鄉賢祠子茂才公偕孫曾孫胥克世其學

大文謹贊曰當在陸草堂之始成也徙居夕先生夢桃李葩盈園鉅者采彌綯文英俞先生釋曰此公門桃李徵也今後學多傳之

雖然心花與指義發端明厥祥孔昭詎埃占夢夫蘇安亭泊在陸
且百三十年有奇而古今文之道法始再合蓋天有以相之矣嗚
呼豈偶然哉豈偶然哉

右傳儲大文撰

國朝書影初編

卷四下百三十一

美

朱紉

歷下發地皆泉金膏水碧與湖山相照映土生其閒翕清輕以爲質煦鮮榮以爲詞所從來矣自唐李北海爲守太白子美皆來游止自時厥後曾子固蘇子由李公擇晁无咎趙子昂相繼作郡而李文叔辛幼安張希孟李漑之之流皆以文章先後鵲起方有明盛時文苑推四傑七子而邊華泉李滄溟實爲職志又有劉希尹殷正甫谷少岱許殿卿諸人左提右挈風流文采遂與湖山之勝同在人口百年已來亦稍衰歇矣吾門朱君子青晚出風流文采獨能自見於當世方期以遠大庶幾成一家之言以繼諸先哲之後而竟天闕以死天實生才而又摧折困阨之如此其有意耶其

無意耶於是其弟永州駕部兩君以狀來徵銘嗚呼吾烏忍不銘
子青諱細別字橡村總督閩浙兵部右侍郎厚庵先生宏祚長子
也少負逸才自六經三史四庫七略旁及天官玉遁之書無弗習
顧薄科舉程文以爲不足爲而獨致力於歌詩其爲詩義兼騷雅
體備文質幹之以風力潤之以丹青彬彬然近代一作手也子青
既盛有時名四方勝流名士過歷下者攬湖山之秀挹泉流之潔
而未識子青則猶以爲未足也必停車結駟而造焉所居有雲根
清壑之堂楓香之閣花竹窈窕房廊靚深羣賢翕集更闌燭跋筆
墨橫飛說者謂金粟道人玉山雅集而後世無此樂三百年矣自
有子青湖山若增而秀泉流若增而潔而今已矣斯亦湖山之不

幸也子青買田橡村其地在繡江之濱百脈之泉周於舍下羣峯環抱清暉娛人鹿柴牛宮魚牀蟹舍謂異時將老焉而竟亦不能待也子青天性純孝又耽尙邱壑既連不得志於有司則循近例入貲得投曹郎家居不入仕者十年日侍兩親寢門雍雍如也庚辰司馬奉 旨分督河工歿於 王事子青戴星而往扶輓以歸喪葬如禮頃之母王夫人病時兩弟皆遠宦子青侍疾無漏刻去左右迨王夫人既葬而子青以積毀積勞病不起矣人亦有言文人不護細行若子青篤於人倫信於朋友言行相顧內外無異詞不爲千古文人一酒此恥乎所著雲根清壑楓香觀稼樓諸集合詩數百篇皆子所論次歲乙酉子有安德之役憩子青桐陰書屋

者十日日緝閱架上書又置酒邀予游西郭溫泉汎舟歷下水面
諸亭之韻賦詩曾幾何時而華屋山邱已成陳跡悲哉生康熙九
年庚戌五月初七日卒四十六年丁亥二月初三日得年僅三十
有八王長史云如此人曾不得四十悲哉惜夫配王氏有子五人
崇道崇勳賓理翊興端宙女三人字李壽淵勞天寵李壽瀟以康
熙丁亥年十月二十九日葬府東鳳凰山北之新阡銘曰
薤玉樹著黃土惟風流文采之未沫兮與湖山而終古

右墓誌銘王士禎撰

陸安國 子祖禹

先生姓陸氏諱安國字康侯先世居太倉之直塘里累代讀書然未有顯者至先生之祖太和公諱獻明中萬厯丁未科進士歷官太僕寺卿康熙丁卯崇祀鄉賢父辛庵公諱日升崇禎壬午科舉人先生以太僕水西功廕官生八歲方就塾卽喜讀書旣長爲文文卽工十五入國學館課輒高等崇禎癸未棄官生就童子試入州庠補增廣生名籍甚申酉之交歲大饑又值鼎革之際烽煙未熄人心洶懼太僕公驟卒未幾辛庵公母孀人又相繼卒先生元配李孀人又卒亂離死亡頻仍靡已人生觀閱爲已極矣太僕公旣爲廉官不肯爲子孫計先生以名閥貴介不善治生產驟歷

艱難遂大困多逋公賦然先生晝則蒼黃補苴應催科夜歸仍篝
鐙手一編呶唔聲盡三鼓也家道中落藉硯田給糗殮教授有法
及門業皆成就故士大夫家爭延致之然喜結納名流所得束脩
隨手散去未嘗顧惜性敏強記於書無所不窺嘗與客互摠引故
實客已色沮告窘先生方便便徐傾吐腹笥莫測其所窮盡尤好
讀史讀二十一史凡三過其間治亂得失之故瞭若指掌紙窗竹
屋疏雨寒風則邀二三知己促坐開尊抗論古今得失酒酣耳熱
慷慨悲歌一發洩其硜礪不平之氣座客睜眦者久之先生亦爲
胡盧一笑而已晚年謝世事畱心釋典時攜筇過精藍與高行古
德參究法門宗旨移日不倦然性嗜酒不能久耐僧爲先生破禪

律如遠公於陶合置醇醪以待引滿弗辭也先生和易近人與物無所忤雖與穉子接見未嘗有倨色或干以非分則又凜然不可犯其制行類如此先生形體不踰中人而多壽康強世罕有及者年八十子孫纍纍四世矣猶生一子邑中傳爲美談其得於天者厚與素無疾丁亥患痢卒子二人長祖禹次祖介

祖禹陸君字濟夫嘗讀易至損有感於懲忿窒慾之語矍然起曰周公其教我矣遂自號損庵君生而穎異讀書數行俱下八歲能文卽綜朱陸兩大儒之論爲學庸解年十三試於巡方使者李公公名進士知文拔君前列引見時歎詫不置蓋不意君方象勺也君旣夙擅家學母李孺人爲司馬萍槎先生孫女以外曾祖文授

君君文益進年十八補博士弟子員十九食餼時父康侯先生方
貧國課無以償隸梓君詣州守守訶君君不爲動然守雅聞君能
文名無如何也甲子省試同考以君卷薦主司極歎賞而二場不
得錄旣遇復擯後以餼滿邀歲薦時 天子念明經老且貧免廷
試然貢士例得備教習就銓選王司寇顯庵錢京兆再亭貽書招
之君曰吾忍以一職離老親耶堅不往庚午科主司已取中君卷
欲魁其經君姓名稍涉嫌疑抑置副榜先是君夢有告者曰易而
名則得中式至是夢果驗君文不隨時趨獨師成宏慶厓諸名家
孺教人曰作文不規撫先輩冥然如長夜耳能詩真樸堅老自成
一體頗似君家放翁自敘有云詩以道性情耳我不能效人爲唐

詩爲宋詩我自爲陸潛夫詩也吳祭酒梅村先生以詩文重天下君師事祭酒公祭酒公不輕易許人每君以所製詩文就質必展卷快讀握手流連歎賞不置也君嘗謂做秀才便當留意經濟專事帖括真豎儒耳故凡有關國計民生者必講究利弊蓋有待也然其後屢挫不售循分安命漸淡進取絕不以得失介意少時卽嚴辨理欲關頭遵奉袁了凡先生功過格爲下學日程久之漸純熟無過舉於邪色悖貨尤遠斥如仇讐自謂吾一生心地光明無不可對人言者蓋得於懲忿窒慾者深矣晚年病肺喘嗽侍父病兩月嗽益劇父不起君哀毀委頓苦塊聞饋粥不入口亦不起相距不百日子三琥璜皆州庠廩生珽幼璜蚤卒有父風

論曰昔天啟中魏忠賢盜國柄毒流正人太僕公與應山楊忠愍
公交善巡按湖廣爲代償罰鍰三千金奄欲中太僕以法幾不免
太僕危矣哉奄卒敗不及於禍何其幸也太僕立朝大節於此可
睹矣康侯涓夫父子雖困窮然余觀其積學勵行無忝爾祖嗚呼
太僕之名德其子孫當有興者其在涓夫之子歟

右合傳唐孫華撰

國朝耆獻類徵初編卷四百三十一目錄

文藝九

吳農祥

宗室文昭

蒲松齡

璩美斯

郭遠

汪舍亭 子沆

潘兆

蕭維箕

王源 子兆符

王壘

姚匡 顧文淵 徐方

游士端

景星杓

楊紹爽

郭彭齡

李暎

陳士良

孫璟

陸鵬 嚴載

馬逸 王順曾

周洽

王邦采 吳楸

劉戡

田夢月 周琰

國朝通志卷之四十一 名臣三十一

萬松齡 李夢鵬

郭毅

徐德宗

鄒漪 秦保寅

蕭正模

王史直 王史鑑

吳之振

丁一焯

唐岱

趙永懷 趙明鼎 李礎先

李崧

國朝耆獻類徵初編卷四百三十一

通奉大夫前署江西巡撫江西布政使司布政使湘陰李桓

文藝九

吳農祥

徵君吳氏名農祥字慶百一字星叟故錢唐諸生也其先自海鹽
海甯再徙而家於此曾祖上世皆不顯至祖繼志始仕雲南越州
衛經歷父太沖明崇禎辛未進士由翰林累官右春坊右中允徵
君其長子也兒時爲馬文忠公世奇所知曰他日當以文冠世年
十許歲數往來婦翁家婦翁者傅巖也會三九公譙陳公函輝發
題命坐客各製芙蓉露下落賦徵君最下坐舐筆賦就末更綴以

詩其落句云一輩少年爭跋扈明公從此願躬耕陳公歎爲英異者久之初徵君祖經歷君好聚書且勤掌錄祕閣之鈔逾萬卷及官允鼎貴則家益有賜書輒帶帙籤至與山陰祁氏海虞錢氏埒於是徵君既長構樓於別業之梧園儲書其上與弟農復登樓而去其梯戒不聞世上語盡發所藏書讀之朱墨句稽識其大者旁又囊篋細碎囚鎖怪異搜述疑互並潰漏發筆語則纏纏然居久之會康熙戊午 天子開博學鴻儒科徵君以大司空陳欽承薦被牒書敦迫上道至京師辭於通進司者三辭於吏部者二皆不報明年三月試 太和殿廷 上命三大學士暨掌院學士定甲乙徵君卷議在甲伍中有日已而不與 上顧大學士等舉所遺

舉所遺則首以徵君聞已又不與或曰是有以蜚語聞者或曰是
索其卷無有故罷其事祕不可知也徵君之至京師也大學士馮
文毅公溥客之代舍時稱佳山堂六子六子者陳維崧毛奇齡吳
任臣王嗣槐徐林鴻及徵君也維崧奇齡任臣既入史館嗣槐試
不及格而用 天子後命畱官中書舍人獨林鴻與徵君不就徵
君尢倦遊旣宿畱不耦則乘薄笨車出郭門藥囊書帙縷破藍藍
然送者自大學士馮公以下吁嗟歎之徵君曾不芥蒂曰吾道蓋
是乃今可遂吾初服矣徵君薦肩蛄鼻鶴脰指爪長三寸須鬚鬣
頽然淵放得錢輒付酒家而識徵見遠略不干人以私人亦無敢
干以私者社事之殷也吳下士沿復社故態角爲尊奢門戶各不

通水火而浙西郡若讀書秋聲登樓孚社及慎交諸社爭立名字
應之各欲引徵君書幣交戶外者履且滿徵君曰是載禍見餽也
諸君子忘東京鉤黨事乎不荅書亦不發視其後 天子果切齒
諸爲社事者盡搜所刊錄摧燒之於今著爲令世咸以徵君知幾
國初通籍者往往有徵君故大司馬孟□□督河朱之錫方伯彭
而述其著也數以書招徵君謝勿往或在車騎過之亦匿不肯見
而族兄□守蘇州六年賓客闐咽徵君一以書問無恙而已迄不
至他日邂逅於可中亭族兄欲載與俱歸不可則以縑置船中徵
君遽捨船去其介也如是獨嘗一應李文襄公之芳聘當是時文
襄以蕩寇功督兩浙建身於三衢以掇閩衝羽葆棨幢吏從帶弓

幾夾陛立上謁者或不敢仰視徵君至則長揖之明日宴於射堂
軍中以鳴鏑射戟枝侑酒酒半文襄離席起酌金叵羅爲壽徵君
前請草露布徵君且飲且口占授書吏一坐盡傾久之辭去爲書
便塞數事文襄再拜曰感君良箴吾輩者知君不盡乃以爲文士
也徵君內行敦篤遇三黨有恩紀其於朋好性命也鄞縣周容太
倉王昊客死京師質衣爲具含賻視白旛卽路乃返晚與陸增毛
奇齡徐林鴻爲飲酒難老之會月一會會輒推文史一日偶及興
獻禮並牽連濮安懿王事奇齡以司馬光楊廷和議非是嘗詞狠
籍口角流沫墮餐飯中徵君伺其閒也爲一難以送之奇齡亦未
有以應蓋徵君好史法其於明代事尤悉棘棘不阿然一以公心

聽皆此類也康熙戊子七月十六日卒年七十七矣初徵君之生也母張夫人夢偉衣冠者七人抱一兒投之曰以爲而子請其年曰二七及是果驗所著古今體詩一百三十四卷古文一百四十一卷駢儷文四十卷詩餘二十四卷他雜著又一百六十八卷子裕孫慎思編以藏於家皆殷青可繕寫

野史氏曰韓愈稱樊宗師曰多矣哉古未嘗有也元稹序長慶集曰樂天之長可以爲多矣徵君亦云然徵君不以自多遇後生一字之王三復不能已其子之友壻方黎如者把文謁之亟歎以爲當今無輩又錄其弟柔如詩數篇入所撰驚喜集中然至其意所不可雖翰音登天不一以色詞假也徵君素強無疾前卒之一年

家不戒於火盡所嘗讀書燬焉自是遂病病或浹日不食亦不語
曰吾無與爲質矣踰年竟卒其以書死生如此

右傳方彛如撰

吳農祥字慶百號星叟錢唐縣學生著有輿圖隸史彙考補錄文
獻通考嘯臺讀史綠窗讀史梧園雜誌宣齋南歸雪鴻流鉛嘯臺
等集乳哺啞啞私語皆建文遜國時事過十歲方不言與志伊齊
名皆博綜能文虎林呼爲二吳尤精於易與毛西河善又有錢邑
志林唐詩辨疑詞苑等書康熙戊午舉博學鴻儒陳鼐永薦謂經
國鴻業固賈生晁令之儔卽雕蟲小技亦相如子雲之亞益都相
公古文則稱農祥汪琬儷體稱農祥及陳維崧詩賦亦稱農祥毛

奇齡小詞則推維崧彭孫逖越閩又以農祥爲首入都止竹林寺
不遇歸家以著書自娛有畫圖梧桐園記云余舊業在錢唐門東有
梧桐數十本顧而樂之因自名曰梧下先生家貧質之鄰家意忽
忽不樂有客見慰曰請爲先生實之遂圖畫梧桐數十本見貽曰
此梧桐也先生其自爲之記若夫土稱五沃樹記九枚比屋亭亭
遙集將雛之鶴虛簷歷歷爭棲引子之烏南岳舊歸北窗栽得五
郎三尺循後會以重來金管一株聞清歌而不去雜惠施之雄辨
紀何遜之雅遊同挹深杯兼聆諠柄雖命多顛顛勢等孤生運迫
流離體符半死而形成兔目節等宮槐皮躍龍鱗莖含庭柏幢幢
車蓋定依先主之桑濯濯闌干猶望桓公之柳風高廉懦植孤竹

而危吟姓託虛無數長梧以述願爾乃蓬蒿一畝蘿薜雙扉蟻垤
常遷蜂房恆閉棠梨舊館已屬他人叢桂小山難招知己空庭老
樹悉歸朱戶之家若木一枝僅傍丹邱之樹垂垂銀漢指天上之
匏瓜纂纂紅牆隔鄰家之甘棗於是吹臺朗月不入虛帷晉井迴
颯隨投警枕結根幽谷暗滋元雨之陰接葉阿房斬吐黃鐘之律
豈非生由位賤探鳳穴而無奇名以人卑排龍門而獨立者哉客
有畢宏後輩曹霸前身點染煙霞淋漓邱壑烘雲吸霧玉除之芳
草爭飛量雨論晴金谷之名花如醉怒拔凌雲之廣圃擊攬蛟龍
織抽撲地之平臺淒迷蚊蜨解衣槃礴袖筆凝思傾北部之騰脂
注東方之沆瀣於是吳宮萬頃齊殿千條彫斲蕙聲傾散楚似

瀛洲之咒活剪列華池若閭苑之移來刻成清露劈分白蘭啟溪
閣之千層裂取紅綃豁風亭之百尺淺深石磴各置藜牀高下雲
虛何煩竹杖莫不蔽虧丹廡照耀碧林草帶交暉苔衣胥化神游
未幾恍登庾信之園目賞不忘突入潘尼之宅猶記韶光初麗淑
景方妍紫燕則亟欲生雛斑鳩則驚看逐婦微茫吐葉漸分萸莢
之形次第含苞徐茁楊柳之色銅溝漲綠金市鋪丹吹落紅綵在
別院將飛之後積來白糞是春城不掃之初驗節序則徵信周書
紀月令則私占戴記江光寒食霽景清明乳酒重門墮懶脂而立
淫華減深巷啄雀喙而成膠戲可爲珪取能扣鼓已而麥秋近熟
梅信微蒸飄來柏子之香捲盡蓮花之漏洪枝驟大修幹斜垂滴

入清油聯徑則陰森十里瀉開朱霧交柯則覆葢千人導巫雨於
青天都成卵色巽湘瀾於白日皆作魚鱗陰兔迴標陽烏斂轡所
以科頭老子晞髮才人苦澤國之餘波畏炎洲之烈燄築長春之
館無地理愁尋消夏之灣何時寄跡細房蓮淨便擬乘舟長鬣松
青卽懷舉扇況復披襟列坐解帶孤眠駕眾竅而常虛鼓洪濤而
不斷耶秋隨白帝序易黃姑玉擲參差不盡長年之怨金投瑣碎
逾深寒士之嗟每飄逸響於琅玕時中清商於琴瑟空階蟋蟀祇
助蒼涼隔嶺蟪蛄彌增哀訴挂珠簾而晝入拂羽帳以宵飛那藉
嚴霜爭橫衣桁不干落照還上釵梁昔也少婦多愁文人失職暫
看旅雁輒傷遲暮之心纔對曉猿遽掩盈懷之淚煙霏露壓竹笑

託以相思月白風清荷何因而說恨此則子良有賦忻素賞之在
今沈約含悲俟末光而未照者也至生梧子實結桐花小似綠珠
朗於紅豆鮮同菱芡光浮琥珀之樽嬾類蓮房影亂芙蓉之府當
其離離承萼葦葦垂條味溢三卮香盈百和杏梁奔迸雕陵之韻
羣飛薄水澄泓灌瀆之魚畢集從茲幽緒雅合清襟供茶竈之餘
歡佐酒罍之佳賞銜來丹羽貪分鷺鷥之糧馳送朱脣狂錫葡萄
之錦此則晨炊未舉藉以療飢宿醉難醒由之解渴者矣不第此
也僕家居東郭地比南宮頻苦囊空尤嗟羹盡懟妻穉子餐白石
以爲資悍婢愚童向朱扉而請乞三聲牛角不無齊國之懷一片
豬肝大博屠門之笑近且臺難避債室雜催租數卷賜書旋償酒

券盈箱小賦亦質錢家犬苦飢虛辭主人而遠去鶴窮搖落逐仙
侶以高齋空留畫餅之名徒述鋪糜之念藤梢橘刺拉沓摧燒葛
葉榆皮辛勤採掇何圖金粉遂累丹青略驪洞壑之幽便帶雲霞
之麗淇亭細數一縣河陽紫府虛探四時建始游絲繞路疊影當
關任儉方朔之桃許買王戎之李柔柯芍藥堪因折贈而傷心弱
蔓蕃薇競欲徘徊而浣手訪衛郎而剪韭致此何難憑張翰以思
尊不妨相對悲夫貧真原憲亂識王尼詎分梓澤之花狼藉沙棠
之樹鬱金堂側或有賴於化人羣玉山巔究何殊於幻術好事傳
觀而動色迺千秋風闕之虛故人持贈以咨嗟僅一段鷲溪之絹
著有古今體詩一百三十四卷文集稱是全謝山謂所作擬史諸

傳如朱大典章正宸張煌言事大半舛錯杭州瓶花齋吳氏藏之
未能刻也

右文獻徵存錄錢林撰

宗室文昭

宗室文昭字子晉號薺嬰居士原封鎮國公百級子

欽定八旗通志薺嬰居士集八卷宗室文昭撰是編爲古瓶續集
二卷龍鍾集一卷飛騰集二卷知田集一卷雍正集二卷共八卷
其所與酬唱諸詩亦各附於編後如王玉生謝雙村楊晚雷諸人
是也

王式丹序紫幢以鮑謝爲胚胎而又兼綜眾有擷諸家之精華其
味在酸鹹之外

鮑鈇稗勺紫幢王孫所錄天潢之詩爲宸萼集分上中下三卷其
二十八家計詩三百七十六首各著小傳自序一篇撰於 聖廟

庚寅歲第一卷恭載 世廟天章葢 藩邸之作鈔東居時嘗借
歸誦閱數日手錄其目並序傳藏之龍吟鳳唱皆太平和吉之音
真足籠蓋一代也

張宗栴帶經堂詩話附註紫幢道人字子晉查田太史曾有詩寄
酬見敬業堂續集

右 熙朝雅頌集鐵保錄

國家厚待天潢歲費數百萬凡宗室婚喪皆有營恤故涵養得宜
自王公至閒散宗室文人代出紅蘭主人博問亭將軍賽曉亭侍
郎等皆見於王漁洋沈確士諸著作其後繼起者紫幢居士文昭
爲饒餘親王曾孫著有紫幢詩鈔宗室敦誠爲英親王五世孫與

弟敦敏齊名一時詩宗晚唐頗多逸趣臞仙將軍永忠爲恂恪郡
王嫡子詩體秀逸書法遒勁頗有晉人風味常不衫不履散步市
衢遇奇書異籍必買之歸雖典衣絕食所不顧也樗仙將軍書誠
鄭獻王六世孫性慷慨不欲嬰世俗情年四十卽託疾去官自比
錢若水之流邸有餘隙地盡種蔬果手執畚鍤從事以爲習勞晚
年慕養生術每日進食十數稍茹甘味卽嘔出人皆笑其迂然亦
可諒其品矣先叔嵩山將軍諱永憲詩宗盛唐字摹榮祿晚年獨
居一室人迹罕至詩篇不復檢閱故多遺佚近日科目復盛凡温
飽之家莫不延師接友則文學固宜其駸駸日盛也

右錄宗室昭榘撰

按紅蘭主人蘊端初名岳端字正于一
字兼山原封固山貝子多羅安郡王岳

樂之子有玉池生棄問亭名博爾都別號東皋漁父輔國
 恪信公拔都海子襲封輔國將軍有問亭詩集白燕棲草
 敦誠字敬亭理事官珣以子有四松堂詩文集弟敦敏字
 子明任宗學總管有懋齋詩鈔永忠字良輔一字渠仙又
 字雁仙多羅恭勤貝勒弘明子封輔國將軍有延芬室集
 書誠字寶之一字季和又字子玉號樗仙輔國將軍長恆
 子襲封奉國將軍有靜虛堂集永泰字嵩山康修親王崇
 安子封鎮國將軍賽曉亭爾赫巴列是編卿貳四十七卷

蒲松齡

蒲松齡字留仙號柳泉康熙辛卯歲貢以文章風節著一時弱冠
應童子試受知於提學施愚山先生閏章文名籍甚乃決然舍去
一肆力於古文辭悲憤感慨自成一家言性樸厚篤交遊重名義
與同邑李希梅名堯臣號約庵諸生有百四篇詩集張歷友名篤慶號厚齋別號崑崙生有崑崙山房詩集諸名士結詩社以風雅道義相切劘新城王
漁洋先生士禎素奇其才謂非尋常流輩所及也家所藏著述頗
富而聊齋志異一書尤膾炙人口云

右淄川縣志但明倫錄

柳泉屢試不利遂肆力於古文以餘閒搜抉奇怪著為志異一書

右山左詩鈔張維屏錄

按蒲先生又著有省身錄懷刑錄
歷字文日用俗字農桑經等書

璩美斯

璩公藏山諱美斯字崑星懷慶濟源犁灣村人也髫齡氣卓準如
成人父鳴玉鼎革時離亂孤熒撫而嘆曰興吾家者在此子年已
及就傳貧不克延師乃發憤執經書謁貴序老儒請析疑義歸輒
哦誦夜不休母憐愛甚數訶禁之潛以釜覆鏡候母寢熟讀達旦
遂通易書詩禮春秋博極諸史尤喜程朱書兒時里落中蜡臘報
賽簫鼓嬉遊屏迹不觀長而遂恥逐聲利不妄與人交遊號藏山
所以自志也然四方從遊者日益盛而公諸子皆嗜書過其廬者
見蓬蔭翳如惟聞讀書聲隱隱達於邨墟之外仲子延祐成進士
得連邑令奉公之官邑中博士弟子請公至鄉校皆受業焉公講

解諄復如老塾師若不知其邑宰之父也及仲子官侍御奉公之
京師侍御故清貧公曰暖粟飲水吾歡有餘若不知子之爲侍御
者古人以詩書之業累葉傳家於漢有韋氏桓氏父子窮經世濟
其美憲章前典貽厥方來今公篤學老而弗衰言有箴銘動有繩
墨侍御紹承家法樹立烏臺諸子廷舉廷慶廷瑞皆已賦鹿鳴蒸
蒸競爽非公稽古之力以燕翼子而誰之澤哉濟源濱大河蓋濟
水所自出而王屋砥柱環列於屏公自犁灣遷澳水南曰東馬蓬
邨尤山川佳勝處也晚而讀書其閒曰是足以娛余老矣以年七
十一終邑之人士請於有司曰鄉先生歿而可祭於社者莫若公
宜遂勒諸祀典而侍御乞余表其墓焉

右墓表劉巖撰

大漢書卷之九

七

--	--	--	--	--	--	--	--	--	--

郭遠

康熙甲申乙酉予遊湖南北日夕過從暨達音問者漢陽則有甯友許君尊三勞君孝感則有淳洋陳君長沙則有元朗李君玉友張君長沙之湘潭則有豈石崑石二張君衡陽則有虎止王君席雲宋君邵陽則有能愚王君補占車君桂陽則有來倩郭君迄今十四五年之間而淳洋年最少才最雄出最先卒玉友因諸生佗係卒郭君辛卯舉於鄉壬辰癸巳會試連報罷客潞涿以卒甯友能愚補占比聞老且病虎止尙健飯豈石戊子舉於鄉元朗以癸巳尊三以丁酉今歲戊戌胥以報罷崑石丁酉中副車偕席雲尙新應諸生試而郭君之卒倏又十五年矣悲夫悲夫當君癸巳之

會試也聞超然張君亦報罷時號二遠朋遊勸君盍再奮爰有涿州之行甲午春正月君復至都子訪君宣武門外客邸坐談而二時迺別別而君復至涿遂病病而就醫藥於都子以邸舍遼闊不復相聞比聞而君已卒時七月之某日也君子思齊尋奔喪泣薪于銘歸而以某年某月某日葬君縣之某原君門人朱君能復來速銘君姓郭氏父某母某氏年十六籍於庠二十食餼四十有七而循次貢五十有二而爲歲辛卯卒年五十有五娶某氏思齊弟某某孫八人君性剛而嗜義嘗以縣籍禮部小學取士隘力請儒學提舉子鄉潘公公問諸朝報可改中學又請寬徭役於令鹿君嘗繕治學胥克有成君嘗語人曰此三者子雅快意事也君

少嗜讀書工詩古文辭制義多至二千餘首應提舉歲科試暨院
司州縣試胥第一撫偏沅鄭公專使走千里迂至署談詠彌月潘
公嘗歎曰五嶺之秀盡在子矣後君忤令誣案之公咨撫偏沅趙
公事卒白君善誘後進弟遠遊胥籍於庠思齋與君同食餽餘胥
工文生徒業成者百餘人朱君繼君舉於鄉蓋速子讓銘凡四年
君號青來學者稱青來先生來倩其字名遠癸巳會試後都人士
所稱二遠者也銘曰

昔君之論文日下也曰小心行以灑氣精理緯以名言欲誦君文
文在其中而君復舉元亮陶氏詩以博文之趣曰春水滿四澤夏
雲多奇峯嗚呼蓋君所得良深矣予聿書之並附甲乙閒遊從諸

公爰以志人才之雅難得而重太息於江漢湘嶠磅礴鬱積之氣之寢空

右墓誌銘儲大文撰

按青來先生歿後座師馬汝為梓其文集行世

汪舍亭 子沆

先生名某字某舍亭其自號也世居歙之槐塘里自大父遷杭遂爲杭人父玉峯翁生二子次卽先生先生少穎異六歲就塾受書歸入舍揖父呼問曰若讀何書曰大學大學何學遽曰內聖外王之學也父大奇之稍長通六經屬文立就辭義超卓可觀弱冠聲籍甚所至傾其輩行遂爲諸生祭酒當是時西河毛太史以閎博著聞海內其令子遠宗名浙東西大師先生從之遊時時詣太史請業太史性高峻於人少可門下著錄者甚盛願獨推挹先生且謂其徒曰鑒懸日月詞富山海汪君當之矣其爲耆舊所賞重如此甲午舉於鄉時館塘棲卓氏家人馳往報之先生方端坐書程

子四箴容色如平常書已徐起理書策鍵戶辭主人乃歸聞者已
占先生德器之遠先生居家孝友無與比事親色養未嘗有違戊
戌再舉禮部值母袁太孺人卒先生痛已遠遊而母死不能喪也
自誓不復解試辛丑計偕尊人察其無行意一夕召謂曰而以乃
翁邁乎因據案起立張左右手復坐命進餐食盡一升先生知老
人尙無恙重違其志也決而行既又下第亟謀南歸尊人移書止
之乃需次銓部其明年春尊人病問至卽束裝觸熱單騎行三千
里抵家家人哭而出具知凶狀先生仰面號咷曰吾兩試而兩遭
親喪豈非其天耶乃吾不鑒於戊之役以遺此恨也安終窮矣奉
帷入以首觸棺慟絕家人慰解之嗣是持服終喪絕意進取居常

語諸子曰吾少無宦情中年數走長安役役而不辭者徒以有親
在將得一當而歸爲榮也而今竟何如言未已淚下氣結不能語
先生有兄乾事之如父終其身不忍別財異居待遇從子如己子
汪故右姓宗人繁先生接之悉有恩禮嘗之歛展先墓過宗祠願
瞻榱桷歷歷如昔夢經遊者人以爲誠感所兆云生平勤於撰述
晚歲彌篤所見畸聞秘冊輒手自甄錄著有黃睡漫志四卷悔人
草三卷舍亭病餘錄十卷村樂堂文集五卷詩集八卷子三人浦
沉浚浦才美早夭沉以學行知名

南漪外史曰先生蓋篤行君子云余交浦沉至久日侍先生其與
人溫溫語必依於理道嘗教諸子以甯爲宋迂毋爲晉達然則時

並通脫者何耶嗚呼此可以訓已

右傳張燾撰

汪沆

西灝少從樊榭學詩薦試鴻博著湛華軒雜錄小眠齋讀書日札
新安紀程全閩采風錄蒙古氏族略識小錄泉亭瑣事汪氏文獻
錄

右名人尺牘小傳梁同書撰

按汪先生字師李一字西灝號槐塘諸生

汪沆早歲能詩爲學博涉無津涯與王曾祥杭世駿符之恆張燾
稱松里五子脩浙江通志及西湖志舉博學鴻詞 廷試額溢報
罷游天津客查氏水西莊南北論詩者奉爲壇坫

右杭州府志符葆森錄

少從樊榭鴈君學得其詩法博極羣書

右詞科掌錄杭世駿撰

東坡志林卷之二十一

十一

潘兆

潘荆山諱兆吾浙孝廉也靜深有謀閩浙總督滿保辟入幕府康熙五十四年臺灣反以立朱一貴爲名朱農家子幼養鴨爲業每叱鴨鴨皆成伍路不亂行鄉人異之游民之無賴者倡爲亂擁一貴據南路殺守備及官兵二百總兵歐陽凱副將許雲討賊戰死臺灣陷事聞省城大震時漏下二鼓滿公不知所爲登荆山牀爲訣哭聲烏烏荆山披衣起笑曰公止哭賊卽平矣臺灣賊皆烏合何能爲第兵機貴速須盡此夜了之公曰如何曰公持印荆山持筆兩侍兒供紙墨羣奴張鎗聽遣足矣如其言書一牒下中軍曰發兩標兵各千五鼓集轅旌旗器械戰船缺者斬一牒下司道曰

運糧若干集廈門聽取誤者軍法從事一牒下府縣曰明早部院
出兵送者斬各吏民安堵毋動荆山每書牒筆颯颯如風雨畢一
紙請公加印印畢卽發未三鼓而部署定荆山復解衣臥哈臺大
駭黎明拔營行兩日至廈門時承平日久兵不善檣槩公憂之荆
山下令傳呼曰凡海賈船能捐貨載兵者與五品官有一賈奮前
卽褫守備蟒服與之繼來者分給牌劄豹豸繡補眾賈大喜爭自
掉船船銜尾布列兵依隊而上不敢譁甲光耀日五日抵鹿耳門
賊大怖以爲神兵從天而下駭散無關者互相攻殺守紅毛城僅
十六人誅之進剿竹箐城禽朱一貴檻車送京師兵不血刃糧不
支給凡七日而臺灣平滿公欲奏荆山功荆山辭曰某性嬾非能

吏事者也賊平仗 國家威靈不可貪天功襲人爵請事公終其
身滿公卒潘復佐浙督李公衛以名聞

右書事袁枚撰

--	--	--	--	--	--	--	--	--

蕭維箕

廬陵有篤學君子曰蕭誠字先生以康熙乙未十月某甲子卒明年冬余銜恤歸里其孤鴻音泣涕再拜請余爲文表諸墓時余不敢忘先君之哀敘次先生遺事固辭又二年服闋乃克爲之先是癸未甲申閒余數來廬陵謁吾師邑侯劉定巖先生乘閒訪邑中文獻及後進才俊之士聞先生中子鴻濟通五經能詩方受知吾師拔童子第一督學使者試復然孝廉劉君飛龍介之來見執弟子禮余雅重之叩其學皆有原本劉孝廉先生之甥也於予爲同年友儻有文名不妄許可人獨心折先生父子余因得謁先生盡讀其所爲詩歌古文詞余入都門吾師定巖先生落職君之中

子失解鬱鬱死劉孝廉客信豐死去年吾師將徙閩中余衰經送
其行追憶舊游恍如隔世所過文酒倡酬故處輒淚泫泫下而先
生亦已卒矣嗟乎余於先生其何能無言先生諱維箕字穉云系
出梁吳王岑唐末有名覺者官運巡祭酒避亂居西昌再傳月卿
公爲武甯令徙廬陵之高澤鄉其後國子祭酒陵公復由高澤徙
安唐遂爲安唐鼻祖代有聞人曾祖諱某祖諱某父諱某皆名諸
生蕭氏故邑望姓科甲相仍自其族祖麟仲公延致鄒泗山先生
講學於家而安唐特以理學著稱先生之父次方公尤精易旨鼎
革後棄舉子業自稱麟陽遺人隱居養親以篤行聞於鄉里卒之
日門人私謚曰孝友先生生丈夫子二人先生其長也少而穎異

承次方公之訓恂恂敦禮讓不苟訾笑立身處世動以古人自期
平居無故不入城市與弟文學維第晨夕呶晤於書無所不窺尤
發憤肆力於古文欲以著述自表見蓋吉安一郡人才淵藪自宋
時歐陽公以道德文章振興於前文信國公以忠節維持於後流
風餘澤漸漬人心歷數百年不變明興科第之盛甲於天下人皆
尙實學勵名節其發爲辭章多滄茂清剛精理內含而澤以風雅
暨乎前甲申之變名卿宿儒凋零殆盡繼值三藩煽虐連兵數年
士人流離困苦不暇治其故業其務進取者自一二鉅公外僅誦
四子書治一經效爲空疏輒靡之文苟且求合於世而古學遂亡
先生於是時獨能毅然以爲己在研窮經史百家旁及漢唐詩賦

之學思有以挽末俗而復古初雖其所作不盡比於昔人然亦可
謂卓犖有志者矣先生之生爲順治辛卯旣二十年學成海內晏
熙文治烜盛始有意仕進會高公瓚來視學號稱知人首拔先生
有國士之目何公某繼至復冠一軍食餼同郡士交口推服以爲
高第可唾手取顧歷試棘闈不見售五十後益閉戶山中出所學
課弟子及四方之請業者當是時吾師劉定巖先生以名進士莅
茲土雅意作人所賞識皆奇俊士尤敬禮先生爲執林倡一時學
校翕然向風以古學相劇切凡經先生口講指畫者文采悉可觀
如劉君飛龍亦其一也生平著述最富有讀史擊節蕭子龐言和
聲堂全集楚圖主人雜藁凡若干卷藏於家其文汎濫八家尤得

力於司馬氏詩則取嚴滄浪之言有味外味書法摹黃庭得其神
理嗚呼先生自少至老以古人自期以古人之學自任孜孜矻矻
不少休向所謂空疎輭靡之文皆得掇巍科致通顯而先生卒無
所遇行年六十有六始循資貢入太學甫數月竟卒意者研田之
食報也遲不於其身殆於其子孫中子之死何爲也抑數有所難
測而理亦所難憑歟往者劉君飛龍又爲余言先生持功過格甚
嚴終身無纖芥玷缺家素貧館穀所入輒捐數十石以給鄉鄰之
乏者歲以爲常然則爲善者必獲報其克昌厥後無疑也夫亦有
待爾也先生元配某氏前卒子三人長鴻音邑庠生能世其家學
娶某氏次鴻濟郡庠生卽謁余執弟子禮者也娶某氏次某娶某

氏孫幾人鴻音等以某年月日葬先生於某原某首某趾自先生之卒也同里之學者失所師承咸追悼不已余又懼其志不篤謂好古如先生且以牖下老經史百家之學果無用於世故特表而傳之俾知有文者足以不朽雖其身既歿而宇內猶有稱慕之者庶幾有志之士聞而興起焉

右墓表萬承蒼撰

王源子兆第

王源字崑繩世爲直隸宛平人父某明錦衣衛指揮明亡流轉江淮寓高郵源少從其父喜任俠言兵少長從甯都魏叔子學古文性豪邁不可羈束於並世人視之蔑如也雖古人亦然所心慕獨漢諸葛武侯明王文成於文章自謂左邱明太史公韓退之外無官北面者年四十餘以家貧父老始遊京師備筆墨貴人富家多病其不習時文笑曰是尙需學而能乎因就有司求試舉京兆第四人曰吾寄焉以爲不知己者詬厲也源以貧無資不能不託跡諸公閒而常以自鄙未嘗降辭色或極飲大醉嘲謔罵議中其所忌諱諸公用此陽體貌之而陰擯焉源雖好氣與世參商然內行

篤修其兄死旬歲中貌若非人以余所見居兄弟之喪顏色稱其
情者獨源與山陽劉永禎兩人而已其於人果有善未嘗不降心
晚年與蠡縣李埭遊大悅之遂與師事博野顏習齋學禮終日正
衣冠對僕隸必肅然自負經世之略益堅每日吾所學乃今始
可見之行事非虛言也始源慨不快意五十後葬其親遂棄妻子
爲汗漫之遊至名山廣壑輒淹留踰時忽復他往見人不自道姓
名逾六十復歸往來金陵淮揚閒客死山陽惟兄之甥蔣衡視含
殮卒之夕神色傲然無一語及家事其古文旣刻者世多有所著
易傳十卷平書二卷兵論二卷及未刻古文藏於家

右傳方苞撰

王兆符

雍正元年冬十有二月余病不能興聞王生兆符歷而蘇輿疾往視與之語神氣若未動越三日而死嗚呼是吾友崑繩之子也王氏自明初以軍功爲宦族至崑繩之父中齋公而五服親屬無一人中齋二子長汲公無子崑繩以兆符後小宗今兆符僅一子以繼祖則崑繩無主後矣兆符從余遊在丙子之春余在京師館於汪氏崑繩館於王氏使兆符來學次汪氏馬隊旁危坐默誦聞若無人方盛暑日三至三返不納汪氏勺飲其後崑繩棄家漫遊兆符自天津遷金壇復從余於白下崑繩嘗語余曰兆符視子猶父也吾執友惟子及剛主吾使事剛主曰符於方子之學未之能竟

也弱冠爲諸生南遷遂棄去逾四十以餬口至京師或勸以應舉
庚子舉京兆明年成進士或餽之金使速仕以養母余日用此買
田而耕則母可養學可殖而先人之緒論可終竟矣兆符蹙然趣
余爲書抵餽金者及報諾而死已彌月矣方兆符之南遷也以稚
齒獨身將母及女兄弟陸行水涉三千里及崑繩旣沒奔走四方
未嘗旬月甯居而其母老病暴怒不時常恐妻女僕婢久不能堪
而在視不盡其誠故身在外憂常在家又慮年日長學不殖而斲
斲於人事叢雜中是以心力耗竭形神疲傷一發而不可救藥也
余與崑繩交最先旣而得剛主三人者所學不同而志相得其遊
如家人剛主之長子習人亦從余遊辛丑秋剛主使卜居於江南

而道死自習仁之死三人子姓中質行無可望者矣今又重以兆
符而文學義理可與深言者亦鮮矣余歲老德旣墮學亦難補所
恃者後生而天意若此余所痛豈獨崑繩之無主後耶兆符性孤
特不能容物雖其父故交旣宦遠察其意色少異於前卽不肯再
見而行身端直又以文學知名故其疾也聞者皆憂之其死也皆
惜之兆符渴葬先世兆域而母及妻子在江南葬事畢士友南還
者爲紀其家畱京師者分年而主墓祭雖兆符意氣所感召抑其
祖若父節槩風聲宿畱於人心者不可泯也兆符年四十有五所
排纂周官及詩文若干卷蔣君湘帆爲編錄而藏之以俟其孤之
長而授焉銘曰

無所施於世而行能已著於家將道之探而學焉已得其英華並
垂成而中毀曷以泯吾儕之怨嗟

右墓誌銘方苞撰

王翬

從來藝事之極者必歸大家論詩推少陵論書推平原而論畫於宋推北苑於元明推子久石田此三人者畫中之少陵平原也當今之世能繼北苑子久石田而興起者則有畊煙王先生先生童時無嗜好嘗引荻畫壁作山水卽生動時與東二王先生以畫擅當代名二王者奉常公煙客廉州公元照也廉州過虞山偶於壁間見小幅驚喜甚詢之知王氏子物色之甫弱冠也歸語奉常奉常具舟迎館於西田盡出唐以後名畫俾坐臥泳遊其中而四方收藏家輒往還蒐討心遊目想盡得古人祕奧而一以靈心運之垂二十年遂成大家先是館西田時倣古入神廉州忘分推服曰

此非吾弟子三百年罕覩此人矣而前後稱揚如牧齋梅村櫟園
阮亭漫堂諸前哲或見之記載或形之詠歌推爲大家無異辭錄
是 內廷知其名徵召之以山林士待 詔輦下方其繪 南巡
圖也天下能手駢集成逡巡莫敢下筆先生至口講指畫凡山川
形勢 六飛七萃諸大小臣工與夫老幼男婦之顛顛望 幸者
咫尺千里如印泥聚米然眾遵守分繪而先生總其大成圖成
上覽之稱善欲授以官先生以不能任職辭出都日公卿祖餞賦
詩贈行傳爲盛事以是知先生所重不在人爵而杜老所云丹青
不知老將至富貴於我如浮雲者乃於先生信之也先生篤孝友
慎交與不翕翕熱尤重感知奉常廉州沒歲省其墓至老不忘乞

畫者無虛日必慎擇其人否則巧取豪奪不可得晚歲煙雲供養外吟風弄月自足性天以是終其身殆隱於畫而畫外別有事在者耶先生姓王氏名暈字石谷畊煙其號宋忠臣堅之後世爲常熟人祖載仕邑諸生考參龍漚隱嗜古亦以畫聞猶石田之先有貞吉也先生生於前明崇禎壬申二月二十一日卒於康熙丁酉十月十三日年八十六配錢氏有淑德子二有譽邑諸生疇太學生孫五人某某曾孫八人某某乾隆癸酉得吉壤冬某月葬先生於虞山北麓曾孫玖大椿來請誌墓玖亦善畫與予善大椿邑諸生嘗問業於予者也其烏容辭予聞國初畫有三王之稱謂奉常廉州與先生也後有二王之稱謂先生與麓臺侍郎也分位

縣殊聲望則一又聞惲南田壽平寫山水兼神品逸品見先生畫
曰我讓子爲第一人遂專工花卉稱絕藝於此見南田之虛衷而
先生之致其退讓者實有無忝大家之目而畫外之品尤有足重
也夫銘曰

烏目秀起蔚生名人造化在手寢食煙雲辭榮還山耄年頤神昔
親杖屨歲惟丙申別餘一載辭塵歸真於今三紀交其曾孫逢君
歸藏來徵銘文文無愧詞勒諸貞珉後之過虞山者謂此耕煙幽
篔而鄰子游氏之墳也耶

右墓誌銘沈德潛撰

此耕煙王先生之墓先生名翬字石谷號耕煙系出宋忠臣堅家

常熟累葉矣四世祖伯臣工畫爲沈石田所稱至先生益集大成
而有名章徹無貴賤雅俗莫不珍購或履其名以要厚值有目者
輒能辨之當繪 南巡圖也天下高才妙手咸集中都和墨濡毫
鋪絹素相顧索胸莫敢下筆惟覘候王先生發口先生曳草衣占
上座瞪目凝神良久乃授以意匠曰於此置都邑於彼位山川若
者望幸若者法從若者駐蹕若者回鑾數千里形勢曲折指顧而
稟遂定眾工遵其布置惟謹先生略爲點綴神彩有加焉圖成上
獻 宸矚稱善不樂就官羣公咸賦詩以寵其行先生之於畫可
謂遭遇其時者哉原夫書與畫同源六書首象形卽是畫體古風
樸重多於屋壁圖人物故事著名蹟至唐始寫意爲山水亦如禪

有南北二宗其南宗氣韻尤超工其藝或文人學士天資清妙興
趣所寄率爾造極或耽嗜宿業不營他務如僚九秋弈獨自名家
視夫偶寄興趣者功力尤爲完密則先生是矣先生容貌質雅篤
行孝謹與人交有終始不降意於貴游不希榮於供奉意所不欲
不可以豪奪計取而利購年八十有六高朗令終人謂先生以畫
顯吾謂先生隱於畫焉畫詎遂足以盡其爲人哉予與先生同里
聞稱世好於其改葬也用表而出之

右墓表陳祖范撰

姚匡 顧文淵 徐方

虞山姚子石邨匡曾赴粵中觀察蔣君之招一歲還吳道途往返所經必有詩詩先以小敘指次分明詳略有體名爲南游日記以投余於京師余纔一開卷而萬里江山恍然入目此豈摩詰所稱詩中有畫者邪石邨故善畫余過慈仁寺海棠院見其畫壁老松排空偃蓋蚴蟉奇突趙恆夫黃門書側謂石邨與王石谷同師指授畫格故不相下今石谷名重天下而石邨旅況寥落如故故特令其畫壁以當子昂之琴其爲名流愛重如此

姜宸英西溟文鈔

右 國朝畫識馮金伯錄

顧文淵 徐方

陳朝書畫識馮金伯錄

五

我邑顧雪坡文淵徐鐵山方少時與石谷同畫山水後石谷從太倉煙客元照兩王公遊得見宋元真跡學問日進雪坡鐵山度不能勝之遂一去而畫竹一去而畫馬兩人亦臻絕詣雪坡寫竹尤妙在水口與石蓋此二端專長畫竹者多不能工雪坡從山水入手故獨擅場耳 柳南隨筆

右 國朝畫識馮金伯錄

游士端

游士端字楷儒先世西江人楷儒始徙於楚因家焉少好讀書尤
愛蘇洵父子策略之文年二十三克善化弟子員尋食餼屢試輒
冠其曹自善邑暨遠近州郡籍籍稱楷儒若一口然楷儒頗不好
舉子業既屢躋場屋益肆力於詩古文及刑律戰陣之學杜門埽
軌敝廬數椽敗絮自擁而嗜古不倦讀書聲時斷斷陋巷中以楚
南地僻雖山水奇勝不足以極心目又家貧資斧不給不能遠遊
於是旁搜一統輿地諸志及所手鈔地形論說邊防考略諸書參
之以見見聞聞者著方輿指掌十卷凡古建都會布行陳形勢之
高下夷險攻守主客出奇設伏之要靡不畢具詳審該覈類若親

歷者然絕非經生識見蓋畱心世務欲以效用於時而所如輒不
偶既乃慨然歎曰此亦破碎駁雜之學術耳名教之責匪異人任
身雖賤貧庶幾當代有賢公卿者出吾將以經世之說進之使措
諸行事會武進趙公甫承命撫楚尙未悉土俗而欲大有所設
施每於朔望謁聖人廟召諸生立明倫堂虛懷下問楷儒美須髯
雙目炯炯善談論顧見輩流皆囁嚅畏怯計不足共論事卽有所
籌畫諒必不當公意乃長揖直前侃侃論說公亦爲之掀髯動容
退卽列時務切要十餘事以進公雖未一一舉行然每顧諸廣文
官再三嘉歎以謂此真書生中有用人也繼此若潘公陳公李公
撫楚時其說閒進陳公時所上救弊八策尤可採其辭別錄蓋與

所進於趙公者大略相似文則縱橫馳騁而義意切當其方駕蘇氏父子而進乎賈晁之間者也陳公奇之奏疏參用其說阻於事會未盡展布迨陳公由楚遷閩卒於官而楷儒亦頭顱斑斑行且老矣時人怪其行事指目爲迂且狂楷儒岸然不屑與校也晦明風雨偕二三學徒歌吟唱歎上下千古雖時復衣食奔走而礪礪奇偉之槩終未嘗少減厥後竟以醉後郊行陷池中得疾而卒年四十八卒時謂其子曰嗟哉此身不能復爲世用矣然有湘客芳玖兩人在身雖死吾志或猶有可表見時也湘客姓劉氏名暉潭芳玖名暉澤皆先生門下士也卒後又二年澤乃爲之傳贊曰有明才人中潦倒困苦莫若徐渭文長乃今觀先生何如出

一轍也與嗚呼使先生獲用於世必不等於庸碌者明矣乃卒抑鬱以死死矣而剛勁之氣猶令人往來心目間顧不偉哉湘客曰先生奇於窮更奇於死蓋非復繩律中人故無之不在人意外也先生生平無如意事死後得芳玖一傳須眉欲動名永骨香足矣芳玖己亥春有哭先生詩三十首詩成卽焚其藁雖余亦不盡觀蓋芳玖之用意微矣

右傳劉暉澤撰

景星杓

先生姓景名星杓字亭北仁和人父邦鼎字三岳豐於財性任俠
出貲爲人排大難三人呼爲景三俠先生生而磊落不拘小節嘗
集畫艦數十招詩人酒徒劍客遨遊禾之鴛鴦湖故通音律方烘
飲援箏作數弄隔湖人偃耳嘹亮有奴曰青猿最趨捷酒酣耳熱
起射林薄間命青猿疾取箭爲樂赴友難白晝刃人都市中散萬
金如流水難得紆家業洗如意頗侈以爲豪已而幡然折節讀書
葺屋城之東皋花木叢竹環蔽之不見廬舍屏妻子獨居三十年
名曰拗堂自爲之記詆世事多失直吾拗之畸人騷士叩扉劇談
茗飲終日顧壯志不能遇謂豪傑非天生乘時得志便見奇節論

世事成敗輒奇中慷慨吐論聲如洪鐘精心種菊秋光瓌麗爛如
華蓋流蘇花時達官貴人變童豔妾趾相錯類不見主人而去因
自號曰菊公尋厭其諠遂弗種散菊種數百於東城數年後人猶
呼爲景氏菊賣文爲活連遇歉歲奇窮義不苟取元日益無粒粟
屑薯蕷爲食而已不問晴雨恣遊湖上諸山憑弔古今詩成自歌
震蕩林木所著有菊公詩五十卷拗堂詩八卷醉翁詩二卷菊公
詞八卷拗堂詞一卷松風詞一卷拗堂文十六卷文藝一卷山齋
客譚十卷螻史三卷俱手錄書法絕類山谷晚器後進桑調元慨
然許託焉庚子秋疾作妻王孺人已下世子二畱次子侍疾易簣
前一日命檢詩文彙授調元屬他日編存吾集甯簡無繁枕上詠

別同好詩浩然而逝其日爲重陽日壽六十有九葬方家峪
桑調元曰先生豈詩人哉自著令以程式取士奇才不得盡達竟
槁頂黃馘匿窮山藜藿不充而死如先生其一矣聲光未滅猶以
其詩傳悲夫

右傳桑調元撰

182-486

182-486

楊紹奭

舅氏楊君諱紹奭字靜棠於書無所不讀少工爲科舉之文而鬱不得志旣困無所合而讀書益奮發不衰年已老頭白且禿猶依鐙火坐讀禮經至城上三鼓不輟蓋君之於書自其天性而非以求名聲利祿也舅氏性剛直於尋常人未嘗苟有所酬荅與鄉人處雖貴顯有不善卽面責不少依阿臨財廉執事果可謂好學有道君子者也娶邱氏累生男不育而舅氏遂無子以康熙六十年六月二十七日病癰而卒嗚呼可痛也舅氏於諸甥中尤愛憐樹嘗撫予指吾父而言曰此子殆能大劉氏之門然未知吾及見之否平居設酒食召槐與飲舅氏自提觴行趣令醉槐謝已醉不能

飲舅氏笑曰子性嗜酒每過從人家飲酒主飲者不趣予飲吾意
輒不樂以此度人意皆然乃者舅氏實飲汝酒當不使甥意不樂
也酒半仰首歔歔徐顧謂槐曰子窮於世今老且暮且死然未有
子息汝讀書能爲古文辭其傳於後世無疑當爲我作傳則吾雖
無子猶有子焉槐受命而退未及爲而舅氏遂舍予以卒悲夫君
既卒之七日其兄子某以君之柩權厝於縣城北月山之麓槐涕
泣而爲之誌

右權厝誌劉大槐撰

郭彭齡

康熙壬寅六月日商山先生卒先生嘗以先集屬同年友金壇王步青爲之序已又出授經圖使記之今年步青館於揚知先生志行愈悉卒之日哭諸寢門既發喪先生故以有道而文爲四方士師表秋八月遠近會弔千餘人步青襄事訖孤子涵泓抱其叔父引年君狀泣而言吾父生之日曰先生知我病且亟猶謂好先生之文今卜葬有日涵等敢乞銘嗚呼余忍弗銘先生諱彭齡姓郭氏其先太原人自南宋始遷揚元明代有賢達越自瞻公諱光以明經應康熙戊午廷試授司訓是爲先生父公五子先生其仲也伯延齡香山叔鶴齡緱山季九齡乾山爲先生狀者引年名嗣

齡乃乾山之兄然故嘗出繼而叔季皆先先生卒老年相依者獨
有伯兄而先生卒之前一年則香山亦卒先生仁孝性生篤於友
愛幼喪母哀毀逾節事父能得其歡心比侍疾在視飲食寒煖之
節十餘年不少懈喪葬惟力所竭不以貽兄弟憂父既沒事兄如
事父撫叔季之遺孤俾之成立先生制行之大節如是初自瞻公
丁啟禎之末文體蕪雜公起而廓清之先生少有遠志稟承膝下
不事聲華故公五子並擅文名而先生之文正大爾雅得於家學
者尤深歲丁巳入郡庠試於學使者輒撫卷曰國士國士乙酉貢
成均甲午魁南省是時先生年六十有一矣座主宮詹梅公今侍
御湯公嘗語人曰吾榜故多知名然皆聲實並茂吾爲屈指必先

郭某矣蓋先生故久聞京國自少爲諸生祭酒所經口講指畫往往掇科名如反掌而先生顧老而後遇今編修方君覲視學蜀中猶稟師訓從萬里外手書報政先生嘗以視余歎方君之克廣其教思自餘師資所承標名爲證者不可勝舉也然先生未嘗自喜手先集一編昔年攜之京邸授余敘曰此某等所幸荷先業友教士夫者君爲我一言再拜潸潸出涕其旣舉於鄉而試南宮也三試三誦先是先生以明經應京兆試歲在戊子長子涵適以壬午副車官教習試京兆涵年少有盛名諸公貴人有欲爲先生父子地鉤致之先生父子皆不應皆誦越十年次子泓中丁酉賢書亦偕先生試南宮泓爲高才生已久父子名動京師尤甚而先生年

既老門下一再傳之士已多達人居翰苑故所至率以先生長者
自處諸貴要亦莫敢鉤致之既試父子亦皆誦論者謂先生之不
遇不獨以數奇先生弗善也初娶駱繼娶王涵駱出泓王出也王
孺人有懿行嘗委曲以成先生之孝友撫涵一如泓老而見其夫
及二子之並列科名也曰是吾舅種德績學之報先生曰賢哉婦
也飲水知源己亥二月卒先生痛之先生體故羸神明絕勝自孺
人卽世漸衰然猶強自攝至辛丑下第南還遭伯兄之喪悲傷成
疾衰羸日甚矣是年秋杪余來揚香山卒己三月先生見余猶涕
泣不能出言已又指其叔季之遺孤謂余曰是皆十歲失所怙余
謹覆翼之今季之子沅幸食餼屢冠一軍粗有立浚猶困童子試

此與君家耘渠同選貢成均吾弟緱山之子幸爲我教之言已復
位蓋是時去乾山之沒已二十餘年緱山亦歿已十年所矣家本
貧遇周親緩急必相事力持之至有賴以保全節行者諸凡隱德
先生所不欲言涵泓不忍言余亦不能言也自世之相士者動以
標榜矯飾爲賢而國論不及乎閭行之隱邗江尤南北都會士多
俊偉俗尙輕揚先生以篤行君子屹然當中流一柱四方人士爭
以文知先生者余嘗謂之目皮相也與人外和內狷寒暄接其聲
款如坐春風有不可雖貴遊輒義形於色交朋友不爲翕翕熱然
久而愈親不以遠近異嘗自謂吾平生交好數人落落布天下教
弟子必盡其誠文有不工必自爲之式不淹晷立就成名高第私

爲枕中祕大小試無不售者所著印山堂行稟芝堂詩集易義環
山樓選已行世其未及行者大易合纂毛詩約旨春秋四傳合編
四書人物類考通鑑纂要史記彙評兩漢文集及自著傳記敘論
碑銘詩詞如千卷藏於家先生治經尤邃於易爲古文原本史漢
而神似歐陽詩不常爲爲輒工蓋風雅其天性也不爲標榜自見
故能盡知先生之文者亦少旣屢誦春官然志在顯揚壯心故未
已今春病少閒猶語余曰吾父以績學老明經吾兄弟亦多以明
經有聲皆齋志攷引年成進士則已爲伯父後今吾病且愈甲辰
吾年七十一猶當與君等南宮一戰也當是時先生色飛神動卒
之前一夕念二子百計營葺藥侍眠食日夜不得甯者數月甚勞

苦爲學畫身後事甚悉願視房中妾少無子呼其母使歸之古所
云亂命無有也時余往視榻前徐徐舉手曰與君別矣吾了無遺
憾吾與君好願時時助二子無忘投經志也余對曰兩嗣君皆公
輔器先生勿復憂明日遂卒享年六十九蓋生於順治甲午某年
某月日葬於某原銘曰

揚之水泱泱平山之摩木青蒼繁鴻文之矗立維懿行之流芳乘
白雲兮遠逝臨風恍兮回翔樂哉斯邱兮其歸其藏有穀兮詒孫
子靈昭昭兮莫之敢傷嗚呼千秋萬世徵余銘兮孰諒余情之苑
結而難忘

右墓誌銘王步青撰

Table of Contents

Table of Contents

李暉

李太學暉字寅伯一字東門鄞人杲堂先生子也杲堂艱於得子四十後始舉太學初墮地面上有如小耳者數十爲繫去之稍長右頰有瘕作鴉青色有相者見之曰此海外阿羅漢化身也負才氣頗任俠杲堂讀書雅守繩墨不肯少有疏略而太學不耐章句之學通其大意而已杲堂文詞簡練組織嚴於律度而太學信筆立成旣冠梨洲黃先生見其詩曰是能獨開生面者而鄭丈寒村尤喜之鄭南谿謝北溟萬西郭爲四子之集太學爲之長性好遊春則渡錢唐探河渚入姑蘇遊鄧尉直至花信更番告畢而歸秋則觀曲江湖徘徊桐廬一帶坐待霜葉盡脫始去至於四明二百

入十峯則其屐齒所晨夕也其遊錄每一年足爲一集座上之客
常滿頗不善飲而喜召客其自監司牧守鎮將薦紳先生騷雅遊
客以至劍俠術士沙門道流參錯旁午不可究詰四方之士至甬
上無不叩李氏而太學傾筐倒屣待之各以其美無爽者百函並
發半面不忘自朝至暮不以爲倦善治具其出門亦必挾客挾客
則其具連車兼舫生者熟者炙者醢者醬者醢者醢者蜜者晨晷
夜鯉春韭秋菘莫不充牣蓋自太學逝而吾鄉遊人驟衰風流頓
盡萬西郭曰東門本用世之才遭時不遇以致拓落江湖放棄詩
酒然其瀟灑跌宕要足以自豪矣尤畱心甬上水利時時爲當道
言之卒年七十有五所著松梧閣集其佳處時與寒村相近云少

時嘗豫證人之社然不喜講學或勸之則曰今世之為此者特希世以盜名耳吾不屑也語雖放誕然亦未嘗不切中近人講學之病三子長世兼次世法次世言而世法尤與予善能承先志開雕兩世未刻之集行世且以十世通家之誼屬予表墓媿蕪文之荒率也

右墓表全祖望撰

吾鄉康熙閒李東門太學暉萬西郭刺史承勳皆鄞人鄭南谿明經

性慈翁謝北溟茂才緒章鎮海人淵源家學各以詩鳴號為四友合

刻集曰四明四友詩南谿父寒村太守梁為之序按東門父為臬堂徵君鄞嗣西

郭父五河令言北溟父侍御兆昌寒村世稱鄭高州即與復寫長梁洲先生合稱二老者也四家先德並以循良儒雅著聲

卷為四友圖今猶藏南谿元孫處披圖誦詩想見當時故家喬木
 之盛前輩友朋氣誼之篤俛仰今昔感慨係之頃讀嘉禾錢警石
 學博甘泉鄉人集中有與馮柳東勸辭薦舉書稱柳東與史竹南
 屠梅西周桐北三君為道義之友總角之交知禾中四友亦以東
 西南北各占一字與吾鄉諸先輩事前後相符可云巧合

按柳東名登府

字雲伯著有石經閣集其石經諸種考異及三家詩疏證儀徵阮氏采入續經解

右紀聞陳康祺撰

陳士良

嗚呼昔王深甫之死而荆公爲之銘以爲深甫書足以致其言言足以遂其志志以聖人之道爲己任蓋非至於命弗止夫以生才之難豈意其道不任於天德不酬於人而忽然以死吾於陳先生裕齋謂可移荆公之哀深甫者以哀之先生之讀書也磊落崢嶸直取其大義微言之所在而拔出乎一切其於聖賢之言一一欲取而見之施行又非腐儒高談性命狹隘空疏之比也自其少時侍其親皆按禮經所言以爲程度而出之以至誠其居喪所謂顏色之戚哭泣之哀變除之節無一不中乎禮三年之服旣除而孺子之慕弗替故雖里巷之門亦皆斂容稱之以爲眞孝子也友朋

羣聚先生岸然如嚴師豪髮不少假借而苦詞忠告聞者雖未能盡從要無不悚然及講求宗法卽毅然欲取而行之定爲大宗小宗改易世俗之所稱宗長者以行祭禮其族人大譁而止至隨意爲古文時文落筆踔厲風發皆有至理精氣行乎其間其於逸世作者視之蔑如也嗚呼當今世而求以孟韓之徒自任欲貫道與文而一之者此絕無之人也先生居然以之自期而充其才力雖未必入其域而優爲之要必大有可觀者則似乎先生之得天蓋非偶然而豈知其隄窮潦倒三十七歲而死時先生館汝陽疾作亟歸卒於逆旅從者買棺殮之悲夫先生諱士良字宗獻裕齋其別署也浙之甯波府鄞縣人其高伯祖爲副使槐在明正德中守

撫州討甯藩有功者也曾祖篁諸生祖邦訓通判父登諸生妻張氏繼娶黃氏吾中表姑也生於康熙某年月日卒於康熙某年月日子培先生嘗讀書枕源書院院中有佛像其手指墮地跳躍不止見者皆失魄先生取而踐之於足蹋碎之投茶甕中於是村落中傳語以爲陳秀才大物也今不特先生之學未見其止而其言亦未及立身後遺文草草勵數十首使予不爲傳之後之人其孰知先生之志之大與才之高者乃爲之銘曰

高視闊步前無古人鬼伯害之埋諸秋墳白楊淒風助我酸辛

右墓版文全祖望撰

孫璟

孫氏丹陽望族也自其先待詔硯山公來僑於壇世以學行著四傳至宋光先生先生名璟宋光其字晚自號蒿生爲人氣體高妙跌宕文酒閒人皆以不羈之士目之不知其至性絕人所自持有介然者雖遇患難不以易初母夫人下世時先生甫三歲斂之日伏棺號踊棺爲不能闔家人抱持置他所始得斂事父兄真摯如嬰兒旣歿而祭白首未嘗不涕泗也家豐至先生而業盡落暮年至不免於飢寒然雖有親知故人欲少衣食之不可得子松客授淮上其主人知慕先生具四十金脩脯延至其家先生居一宿謝去松爲主人跪請畱先生瞪目汝乃能居是耶卒去不顧嘗借諸

生試句容地忽有蛟患人多溺者水入先生所寓樓勢岌岌壞比舍生爭緣樹急呼先生先生曰樹上人已多益以我恐爲諸君累獨持被臥梁上明日水退僅而免學使者召振被災諸生先生盡出其所給貲募人瘞溺者屍甚眾其勇於義而自忘其貧皆此類爲文章脫去畦町語不從人間來有識者歎服以爲仙品然先生懶不自惜所爲文多爲人持去故罕有存者於書法尤有獨得及所爲詩歌俱與古人相馳騁近人有譽之弗屑也晚益豪宕寡所合願獨好余所居相鄰接時時相過呼酒論文略無形迹閒嗚呼自先生歿後吾不能復索知己於世矣子松亦吾紀羣交也諸孫皆能於先生有似相踵來請傳於余余愀然曰微驥固莫可傳先

生者遂不辭而敘其略俾以載之家乘云

論曰世之稱韻士者輒曰晉人吾生平竊惡其說謂晉人實名教之罪人也任誕作達至一切蔑棄禮法以相誇尙卒之毒流於國使當日中原之禍爲前古所未有嗚呼孰謂先王之教可一日弛於人心也哉今以孫先生之大致飄飄然幾於嵇阮風流矣然綜其畢生按之繩檢之內未嘗有毫髮差嗟乎此吾所爲樂交之而今復樂爲傳之如此也

右傳王汝驥撰

國朝產廉考卷初

卷四十一

四

陸鵬 嚴載

陸癡名鵬字白為華亭人性狷癖故人以癡呼之善山水自成一局其法用挑筆密點由淡及濃不惜百徧林巒崖石閒煙雲紕縷墨氣網縕亦可喜也其布置務求奇辟不屑作常蹊能為尋丈大幅浙江巡撫屠公館之西湖踰年而卒屠公為歸其喪 畫徵續錄

陸鵬浙江遂昌人僑居於松故自號遂山樵畫初學二米房山後參以己意自成一家所居在超果寺南欲得其畫者每登寺一覽樓望其家炊煙至午後不起乃持銀米往易之否則終不可得故人以癡目之 婁縣志

右 國朝畫識馮金伯錄

嚴載

臨同里有嚴怪者名載字滄酷山水亦好立奇境嘗畫一古藤蔓
延糾結蟠兩山頭一人崎嶇攀援而下凡畫多類此人亦癡絕家
極貧不能以多金眩之勢亦不可屈也人目爲怪怪聞之喜遂自
名怪焉

右 國朝畫徵續錄張庚撰

馬逸 王順曾

馬元馭子逸女荃皆以畫名逸久客京師遊蔣文肅公之門

仁皇帝問公弟子工畫者擬以逸名薦逸以母老謝 在亭叢書

黃庶子之雋題馬逸畫魚墨瀋蘸成一水硯池飛出雙魚祇愁活

潑潑地濺溼窗前賜書寒酸別浦曾舍冷淡空江網船宵雅詩中

魚藻寫來太液池邊一壑芳塘圖畫半篙春水江湖綸竿恐礙魚

戲不著煙波釣徒

唐堂集○墨香
按逸字南坪

右 國朝畫識馮金伯錄

王順曾

王順曾字青山直隸宛平縣人敬哉相國之曾孫也幼岐嶷負倚

才讀等身書詩文倚馬立就入成均屢躋棘闈遂屏棄舉業放懷
於山條水葉閒日飲酒賦詩以其餘暇棲情篆刻弋志丹青中年
冀得祿養以考職得候選州司馬待久未銓嘗自戲鐫一印曰何
州司馬然境雖困而詩益奇畫益工飲興亦益豪每杖策浪游有
笑語投洽者不惜揮灑累幅否卽貴顯及賞鑒家亦唾棄不顧也

右墨香居畫識馮金伯撰

周洽

周洽字載熙居郊店六歲母亡能執禮盡哀每出閭鄰姬呼兒聲輒悲泣姬怪問之曰痛我無母呼也年十六七貧甚欲執一藝爲菽水資遂學畫於趙伊不數月盡其技遊揚州縱觀前人名蹟而秦興季氏所藏尤富洽日夜臨摹學益進遠近諸公貴人爭延致之皆知洽有才不敢目以藝士在福州都統胡啟元幕下最久總督姚啟聖調諸道兵征臺灣駐城外一日忽移城中城中人皆惡而啟元亦未測總督意疑有變急召部下兵使與連營相次以備非常洽聞之入見啟元曰公此舉得毋以總督召兵入城故冀以制之乎啟元曰然洽曰公與總督身爲大臣轉相疑忌是非所以

制之乃所以激之也某觀總督忠誠無他慮此舉不過欲耀武於眾耳公誠簡騎從往過微諷以地方當兵燹後靜鎮爲先一旦兵民雜處雖軍令嚴肅而小民無知必致煩擾恐乖公平日愛民之意如此則彼必喜公之推誠且理無以奪慮無不樂從啟元從洽言兩人驩好如初又在潮州知府梁文暄所方夜半總兵據縣詳文云甲首乙交通海寇宜急發兵掩捕文暄卽臥內告洽洽曰此事虛實未可知今海宇甯謐人無異志恐是奸民陷害良善耳宜拘乙卽訊而緩其刑使不致妄承然後密訪甲素行若何並查與乙有無仇讐則事可立斷矣文暄如其言乃知甲售田於乙因加價構訟不勝而陷之者在河道總督靳輔幕時河工始告成輔

欲繪黃運兩河圖呈覽以事屬洽洽日歷年所進河圖多不稱
旨非親歷其山川城郭則位置不能無誤也乃徧歷兗豫雍冀四
州之地閱四月相度河勢迂直緩急及隄閘要害之處手自摹寫
而別爲看河紀程三卷繪以進呈上覽之下旨褒美洽晚讀王
守仁書覺生平所疑渙然冰釋不復畱意於詩人筆墨然興至作
畫人爭以價購之年七十有五卒有攤詩閣文集藏於家

右傳王昶撰

五言古詩卷之二十一

五

王邦采 吳楸

王邦采字貽六邑諸生中年棄諸生業覃精六經儒先書所居斗室一座一几之外不能容坐糊囊筆格鑊甌果餌藥鎗刀錐鍼縷之屬錯落閒置興發為古文為詩為畫跌宕超逸皆到妙境 無錫縣志

鄒方鈞題攜鹿先生畫疎籬一曲石苔平溪路無人野水橫白板茆簷深竹裏是中應有讀書聲 大雅堂集

右 國朝畫識馮金伯錄 按文藝二呂先生簡材傳內王先生附見已刊茲得畫識編此

吳楸

吳楸字朝英別字逸泉居無錫閭江工畫而世無知之者同邑王

邦采一見欽其人爲延譽乃大發聞於時嘗與客泛舟笠澤湖四望晴雲晦霧千景萬象久之幻作叢竹狀枝葉紛披扶疎偃蓋楸大異之遂呼酒大醉命童子磨墨汁數升潑墨作竹雲圖頃刻數紙淋漓盡變一座皆驚賞而楸亦自謂天機所到直奪化工正如右軍蘭亭令他日重爲之則終無以及也時金壇王吏部澍在座中矜重此畫什襲藏之而竹雲圖遂傳於世楸言行瀟質終日渾渾不露圭角與之遊久而愈可愛暮晚得疲輒病屏絕人事餘十年獨時時以筆墨自娛

大雅堂續彙

右 國朝畫識馮金伯錄

劉戡

西廷公諱戡行三少居金陵金陵爲前明留都鍾山龍蟠孝陵在焉公先世墓去陵十里許前列翁仲石馬豐碑屹然公生八九歲會舅父彭公秋水與里中勢家有隙將陷以重罪蒼黃出走公父君甫公走送郊外古刹秋水公於神前且拜且出矢言曰吾與君幸託肺腑戚今不幸亡命以老父暨家屬累君君必使獲至誓終身不忘君德遂怱怱別去勢家者果誣公外祖於官捕下獄禍且不測公父破產謀救解於秋水公約緩其獄遂挈公母子及秋水公弟子嵩公之楚南子嵩公客經略洪公幕洪公薦授甯鄉令公是時居于嵩公署年且十五六矣秋水公亡命後挾策于當時爲

滇南中丞袁九敘所知薦知祿勸州事外艱服闋補雲南新興州
嘗試令公代署公移公於所受名詞舉筆判決秋水公以其少年
逞臆加以斥責已而諦視之驚曰老吏不如也秋水公雖勤於吏
事而性篤好書爲文典麗詩尤雄古公悉得其傳益深愛之延名
師教以科舉業及古文四六諸體會逆藩吳三桂變起繫秋水公
於獄已更迫脅之挾至楚南公閒道入山中省母旋奉命往從秋
水公於羈旅遂謀脫秋水公與俱走粵西依顏澹叟方伯者數年
寇平乃同歸長沙時公父已前卒葬長沙沱市村矣公以未奉含
飯哭盡哀毀瘠見骨聞者悲感先是公往來戎馬間又轉徙異地
所接多圻弛自喜負氣好謀略及據鞍磨盾才調絕出之士公雖

少年亦時出其詩若文爭奇闕捷閒揣兵事形勢上下其議論互
爲旗鼓加以身所經歷部曲營壘之散布山徑谿谷之隋且深雞
鳴月落盲風瘴雨辛苦化離之感嘍哨之音形諸篇章豪宕感激
頗落落有古氣佟公國勳者舊與公相識如弟昆好初守粵東廉
陽偕公往嗣監司浙東溫處觀察江西尋擢藩雲南改湖南藩轄
開府豫章前後四十年間皆賴公籌畫公性坦率與人交有肝膈
而性所不合雖達官貴人常奴畜之往往酒後抗聲談天下事或
指名面斥人過人多以是見嫉其傳劉西廷使氣好嫚罵人相戒
勿犯也既久客佟幕歲所入歸以遺母施及戚黨之貧乏者佟公
雅重其品一府中咸嚴憚公公杜請託絕苞苴且與人以可敬暇則

抱膝長吟傲睨自若日成數十篇不名一家動與古會其視世之
規樵獻吉于鱗拘拘格律者不相入也嘗作詩戒姪輩凡數篇其
一篇曰人生天地間安能如草木草木萎仍華歲月逝不復昔人
多務本惟知耕與讀耕者望有年讀者思自淑今人尙奢華羅綺
炫人自不知稼穡難日夕娛絲竹豈知轉瞬閒蕭然無隔宿嚴霜
苦雨中充腸無半菽今者固其宜昔者非其福所以年少人持身
尙謹肅行身必端方語言慎反覆出門交有功義合無諂瀆彼富
何足援維貧慎勿忽吾家青藜業汝輩當賡續勤學不及時老大
空碌碌誰不願肥鮮古人常晝粥誰不願華裳鶉衣原憲服詩書
氣自華豈在修邊幅嗟哉此拙言爾曹宜手錄其他亦多規切語

足爲終身聿弦至贈姜且兮先生有曰黃金浪盡原該死白首依
人不可憐此豈他人所敢言於前輩者哉卒章乃曰衰年不必多
憂鬱大節從來看屈伸又何古義卓然也公旣好爲詩尤雄於酒
歲時招故人謀集興至卽不復用常杯傾酒盞中與豪客爲拇陣
勝負紛拏輒大聲笑呼以巨觚盛飲可數十瓢卽席分題長篇險
韻他人沈吟欲出叻公已立就數百言一時名流未能或先也客
散則捫腹徐行吟哦聲不絕子姪輩有索詩者隨所求立應之所
著有紅雨樓彙雙江集巴山集若干卷然猶多散佚不存者早歲
游浙中西湖詩人陸葢進思愛其才爲之媒贅於沈氏沈陸內媼
也中間嘗至都下頗知名己丑三月來長沙拜母彭孺人於牀下

母喜命酒共飲越數日孺人無疾而卒公得奉含飯蓋母子至情若相待也晚年以佟潛修公子宦雲南復緣世誼堅約公偕公前贈楚友有四上金臺三入滇蘆溝明月板橋煙之句合是行計之且四入滇不數歲竟卒於滇滇於公何有哉初秋水公念舊約又以甥舅故待公兄弟甚厚其於公生平文學既多所成就矣而秋水公尤慷慨然諾急朋友難不恡千金亦常揮霍友人金不沾沾作世俗態公少而從游既熟見其行事且性情深相合也故於友戚多所贈遺稱貸者未嘗錙銖計公表弟彭警庵先生輓公詩云慷慨共知甥似舅清狂自署酒中仙蓋實錄也公伯兄諱曰伐字專征仲兄諱曰啟字衛廷皆與諸弟相友愛公一子曰暉潮

右家傳劉暉澤撰

右家傳劉暉澤撰

卷九

This image shows a blank ledger page with 11 vertical columns. The columns are separated by single vertical lines, and the entire page is enclosed in a double-line border. The page is otherwise empty of any text or data.

--	--	--	--	--	--	--	--	--	--	--

田夢月 周玟

田夢月字霓裳襄城諸生少倜儻不羈每從邑中諸少年飲酒呼
盧窮日夜爲樂年二十許乃折節讀書又不喜舉子業而獨好爲
詩是時主詩壇者劉太乙萬西田霓裳時從之遊山巔水浹分韻
唱酬偶得佳句則精神激發眉宇飛揚歌嘯歡呼以爲快其詩初
好爲近體多雕琢以出奇怪後涉獵工部東坡遺山諸大家格律
老成居然獨樹一幟惜天不假年三十三而沒著有杏花書屋詩
集同邑周玟字林石亦諸生與萬西田劉華嶽友善詩宗法香山
別饒風致著有深柳園詩彙

右傳張邦伸撰

日本書紀卷之三十一

三十一

萬松齡 李夢鵬

萬松齡字彭年河南襄城太學生西田先生從孫生平慷慨慕義家頗饒其從兄某素無行求生活於彭年彭年割己產八頃予之無何盡復來彭年資之如前以故家中落多村居罕入城市性善飲不事生產日放浪詩酒文字閒嘗作苦熱詩西田贊不絕口以爲家有傳人更以窮四庫窺宵窻相期勉紅崖集云從孫予所憐執袴不同調又云昨吟苦熱篇清比風竹嘯是也自西田歿後無復磨礪之者終年手一編坐荒村中雖蒔花種竹閒散步河干吟賞消遣而孤子岑寂少年賓朋譙集詩酒歡暢豪興都消磨殆盡竟抑鬱以死著小紅崖詩鈔行於世同邑李夢鵬字扶萬太學生

其詩情深語麗雅近邊華泉遊嶺海後聲調尤佳有紅桂草堂詩
集已刊行

右傳張邦伸撰

郭毅

吾友道遠姓郭氏名毅郊學生才氣高邁試輒冠其曹喜爲詩古文自娛永甯令佟公賦偉祥符令胡公權魯山令王公雍先後延致之已謝去授徒魯山漫流邨病瘡歸里踰年卒年五十六當道遠病小愈遣騎迎余至家時龍潭書舍新成冬日甚暖道遠杖而出面青黃瘦甚而談鋒頗不減笑言旣洽遂至三鼓慷慨謂余曰吾疾勢似退而暮氣垂竭無久存之理行當以誌銘累兄余戲諾之不謂今之果銘吾友也道遠恢豁有大度好施予尤篤於宗族疏屬老幼之依以居而爲之婚葬者數人長身美髯飲酒不三合輒醉醉後抗聲論古今名節事緩急然諾之際情詞壯激士友聞

之皆心折論文喜縱橫捭闔與時上下謂一戰可霸然訖不得志
於有司易簣前數日已不能執筆口占示子云敢望多生文字裏
孤魂渺渺去誰同石巖果有三生約願侍廬山鹿洞中其氣機默
移依歸正學之意有非他人所能窺者則道遠之所自立可知矣
考諱士奇妣齊氏許氏生妣楊氏君初娶張氏繼楊氏子五人伸
侯俱張出偶諸生憫佶俱楊出孫男四師婁師恆師厚師仁伸等
今卜於康熙某年月日某時奉父喪歸葬祖塋之次以母張祔致
道遠病中之意來請銘銘曰
大劉之陽山深土厚子骨可腐也名不可朽更千秋而萬歲兮孰
不知吾黨之畏友

右基誌銘全軌撰

續文獻通考卷之九十九

臣

THE UNIVERSITY OF CHICAGO LIBRARY

182 - 534

徐德宗

徐德宗字于朝貢生崑山尚書乾學孫壻於秦遂居秦氏之也軒
自號蓉湖逋客德宗世席華膺倜儻負奇以詩雄於時不得志輒
壞以歿女夫秦鴻鈞葬之惠山望公塢下子姓多居無錫從孫鏐
慶原名以金匱籍舉乾隆五十一年鄉試鏐慶涉獵經史亦以詩
文名既屢躋禮部試謁總督畢沅於湖北會有兵事主奏記敘勞
以知州通判用權蘄州事歿於黃州

右傳秦灝撰

鄒漪 秦保寅

鄒漪字流綺江蘇無錫人博學多聞好著述遊婁東吳偉業之門
偉業綏寇紀略半出漪手閻若璩謂漪作明季遺聞出脫張縉彥
於綏寇紀略又盛傳李明睿不能無過然漪平生交遊多名士王
新城士禎有惠山下鄒流綺過訪詩歲暮懷人絕句所謂花時曾
過九龍山第二泉邊挹妙顏者也同邑秦保寅字樂天家富藏書
喜賓客蕭山毛牲後改名奇齡亡命時嘗主其家盡取其書而讀之尤
善慈谿姜宸英與爲倡和保寅讀書兼綜條貫所爲詩刊落一切
獨標清冷中歲棄諸生能醫偶爲人處方輒效崑山葉方藹序其
詩稱樂天爲人落落穆穆與之相處塵意俱盡其詩質而實綺靡

國朝詩林卷之三十一

三十一

而寶朕從弟泉芳字天乳亦好學能詩

右傳秦瀛撰

蕭正模

蕭正模字端木延平將樂人康熙中諸生少從同邑侍郎廖騰燧學與郡人余思復施中鄧拔萃吳日彩等以古文詞相切劘蒞之亂避深山中久之累試不遇儀封張伯行撫閩令郡縣以禮招諸生之賢者送詣菴峯書院又開館延士數十人纂修朱子書屬正模總編焉貢太學一至京師而返正模深於史自漢訖後五代爲史論十八卷多糺舊史之繆覈而盡駁悍而足於氣他文不逮也閒爲讀東林傳筆記五篇本春秋責備賢者之旨傷門戶所由起辨三案之是非而歸罪奸相追論明社雖墟猶食講學之功以扶綱常而歎息於崇禎之蹈覆轍爲不知人之禍也正模亦能詩

不喜齊梁體滔滔自運而氣質少麤凡深谷詩文集四十四卷

右傳陳壽祺撰

王史直 王史鑑

王史直字子攀弟史鑑字子任江蘇無錫人俱好學能文熟於舊聞軼事嘗輯無錫文獻分爲二集凡一百餘卷知縣王喬林尙書任蘭枝爲之序

右傳楊熙之撰

吳之振

吳之振字孟舉自號黃葉村農石門人有黃葉村莊集刻宋詩鈔至百數十家多祕本買名園曰黃葉村莊作種菜詩又選施愚山宋荔裳王西樵阮亭陳說巖沈繹堂曹顧庵程石臞八家詩行世寒食口占鶯語周遭惱客眠起看花落小窗前今年病裏逢寒食禁得廚頭一日煙乞蘭云不同杜老乞花栽擬借盆蘭伴老梅等待花餘將結子扶疏新綠送君回懶惰休鈔種樹書信天翁也得吞魚東莊若解南前訣筆墨雕鐫總破除次母黨韻送黃主一東歸云幾盞扶頭醒午夢一聲批頰送黃昏寄懷沈石逃云古寺聞春畱好句寒鐙聽雨洗茶杯送黃晦木東歸云山深木客通名字

日暖慈姑種子孫皆得宋人神髓

右文獻徵存錄錢林撰

丁一焯

丁一焯字日峯湖南清泉人縣學生善琴工草書宜與儲大文作

南嶽老人行贈之一焯初學懷素書苦不能脫巢窠一日偶觀劇

有悟遂大進人以比顛旭故事云儲大文詩南嶽老人丁乾齋神

立殘雪又如孤松禿頂撐寒霜年已七十入真率如童孩平生蹤

跡絕塵滓不在山巖即水溪先生與奇古濡首墨池起狂舞有時

亂灑松梅花化為青天龍爪之而拳有時橫潑三升汁笞鳳鞭龍

騎不得一筆直下疑有神誰知千盤百結屈且伸綠天老髯非其

倫先生先生自有真萬本蘭亭看不足更聽先生彈一曲空山落

梅花幾片散作琴紋細難辨高崖瀑布飛九天瀉入琴絃清以徧

拂白石掃蒼苔玉案橫江樓開手揮日送孤鴻裴回一彈湘妃幽

怨結再彈洞庭秋思催山何蒼蒼水何泠泠鳥何啾啾木何慘慘

發浩歌揚哀吟契琴理翻琴音杳不知此曲之古今先生獨得乎

琴之心願我攜裝走南楚落落行蹤真儔侶清泉本是山水鄉先

生與我形相忘琴牀硯池樂晨夕酒燒春須滿酌頗憶雪花大於

城西林澹閣蠟屐衝泥不厭頻斗酒燒春須滿酌頗憶雪花大於

文藝九

掌刺既無聲風竹響先生手攜雞黍來空庭雪滿無塵埃挾以小
奚童背以古錦囊酒酣草聖兼詩狂徐調玉軫回春陽歡聚無多
歲云暮湖風吹我孤帆去先生相送淚霑衣日斷江雲與江樹石
鼓山前日將夕劇憐我去君猶立祇今煙水隔江南何堪往事重
追憶感君古意悲君老墨瀟冰絲須愛
惜到耳琴聲月滿江夢裏思君醒時泣

右傳李元度撰

唐岱

聖祖天縱多能藝事無一不學亦無一不精 幾暇作畫賜廷臣
今海內舊家尚有寶守者時滿洲參領唐岱號靜巖工山水嘗
召入內廷論畫法因 御賜畫狀元見胡學士敬 國朝畫院錄

右紀聞陳康祺撰

趙永懷 趙明鼎 李礎先

趙永懷字念昔湖南長沙人工部尙書開心孫工詩幼時流寓江都湖州守吳綺愛其才以女贅之晚歸長沙爲環莊奉母以居自號環莊居士篤友誼故友關玉山客死永懷爲迎櫬歸合其家八口瘞之仍分宅養其妻子卒年八十同郡趙明鼎字鉉吉益陽人家貧爲人牧牛且牧且讀卒爲名士所著詩文自成一家巡撫周召南以明鼎與江有溶陳之駉同聘爲五經師又李礎先字潤生龍陽人學問淵雅日與邑名士相唱和深爲光祿寺少卿彭之鳳所器重聘訂諫垣草著有竹广逸編

右傳李元度撰

李崧

李崧字靜山江南無錫人布衣著有芥軒詩集芥軒天真未漓視天下無不善人人有機械者對芥軒亦無所施生平在春風和藹中也居鷺湖之洗香園妻子奴婢蕭然自得晚歲盲於目詩成每令童孫書之

右 國朝詩別裁集小傳沈德潛撰

江陰李芥軒崧隱居不仕與其配薛素儀更唱迭和有前明趙凡夫陸卿子之風一日夫婦對酌偶以瓜子仁排作數行芥軒云細剝瓜仁排雁陣素儀應聲云輕移盃底印連環一時傳爲佳話

右記余金撰

李崧字靜山不樂仕進與其妻聯德高蹈工為詩而妻吳氏及繼配薛氏並工詩伉儷閒自相倡和於名利泊然其詩簡遠淡泊至有真味閒畫花蘼蘼雁雁時露天倪年八十餘兩目盡盲猶口占詩令其幼孫書之 無錫縣志

靜山別號芥軒居梁溪之嘯傲涇相傳漢梁鴻棲隱地也余屢過經宿琴書靜閒林木叢密有深山空林氣象性耽詩生平體凡三變壯年才氣奔軼五十餘就唐賢格晚年皮毛脫落漸近於道又善畫花蘼以蘆雁名然聊寫天趣匪與詩同注力也 歸愚文鈔

右 國朝畫識馮金伯錄

國朝耆獻類徵初編卷四百三十二目錄

文藝十

鍾秉用

龔明遠

張埴杜要

陳昌泗

張雲章

朱振玉

陳桐弟枚
陳善

桓
袁江周徐綵

鄭世元

汪惟憲

趙煥

金啟 劉紹錡

黃鼎

黃慎傳雯

湯之昱從孫然
杜曙

萬伯安

林企俊

邊連寶

周思仁

姚世鈺王豫

劉度余尚焜

董正國

羅牧

鄭蘭韓李思

謝元陽

鄧勝遠 朱藻

國朝耆獻類徵初編卷四百三十二

通奉大夫前署江西巡撫江西布政使司布政使湘陰李桓輯

文藝十

鍾秉用

先生諱秉用字上銓瑞金人雍正元年舉人也先生生十六年而考六錫公卒持服至謹每讀父書輒掩卷長號擗踊無算時母老二弟弱家貧斯薪拾糞以養年十九爲里中童子師端範飭童長老稱之年二十六補學官弟子第一其明年巡撫馬公檄先生肄業豫章書院屢試皆第一試於學使又屢第一自是弟子日進里塾爲滿先生之教弟子也始必授以朱文公小學書曰是爲人之

國朝...
規矩載焉規矩不修則廢不由則蕩偃而趨欲成人焉難矣繼以
經繼以史曰小學通則務治經以精之治史以廣之既精既廣規
矩陳象翼翼嚴嚴率循不爽其寡過矣乎論經義曰 聖清監百
王因明制首四子書義範圍曲成至矣士幸逢今時不務浴德安
雅研聖賢微旨幾自得而寫諸辭而希詭遇不誠也始不誠以進
其出而仕其有賈心決也上何賴焉故先生困蹟諸生中三十餘
年浩然有以自樂也涼涼然守先王之微緒自信不疑屹然而不
少變也屏常丹鉛不去手昕而作夜分而息老屋繩牀布衣敗絮
敝襟而兀坐詠歌先王之風淡然忘其年之將老也過言不出於
口過動不設於身表之爲九容蘊之爲九思終身勉勉未嘗怠也

於乎觀乎此者先生之所養可思矣先生年八十聰明如壯時鬢髮黝黑光奕奕鑒人日夜讀書不輟燈下作細小楷字剛健清整不苟其年二月患喘氣東向端坐命諸孫代誦易於旁聽之喘爲之損漸平誦聲偶已卽復喘二子請曰大人病矣幸請醫藥庶有瘳先生曰聞汝輩誦易聲如服海上方藥固有愈是者耶且吾年八十聽易而得斃焉足矣汝輩其勿復言越十日命移席南鄉端坐而卒先生玉色長身莊而和人望見者畏愛交集農夫牧子暨負販者先生教以孝弟忠信及古人敦睦事必盡鄉里作事不祥者恥以其事聞先生先生沒已十餘年弟子守其意以教者尙十許人其他馴厚樸訥之士多焉先生少時以易應舉晚而篤嗜易

著易講說若干卷又著帽山詩文集若干卷制藝若干卷藏於家
伯子諱啟憲字允成治班氏范氏書至老學不衰以布衣終叔子
諱啟年字允萬縣學生守先先生制藝學教授弟子皆以謹厚稱

右家傳羅有高撰

龔明遠

龔明遠字澹甯湖南沅州人少好讀書以用世自期許中雍正癸卯武舉效績伍中非其志也被黜斲歸刻意爲詩詞每登覽閒適手揮口吟不少休其詩主於陶冶性情流連景物然英雄失路之況篇中往往見之吟老妓云芳菲已過豔陽天春盡江南罷管絃當日舞腰成瘦損東風無力送鞦韆讀者謂其得風人之遺卜城北數弓地雜蒔花藥以自適帥府聞其名屢召之不往著有蔭嘉園小棗邑令王雲萬序之其甥李亮元梓以傳昔元末顧仲瑛受封武略而明史列之文苑明遠浮湛詩酒寄託良深因援仲瑛之例以書之

中華書局影印 宋史卷一百三十一

三

右傳朱琬次撰

張埴 杜要

張埴字貢五號香泉湘潭人雍正元年拔貢著有帆湘閣志千之萬吳行越行齊行楚鄉邨居等集同邑曾鈞字天民號萬樓刑部用璜子縣學生舉孝廉方正入一統志館修五路志多羅愉郡王事以師禮議敘涼州府經歷著有宗藩寶鑑河西草菑餘偶存雜著

耆舊傳越行齊行者省覲其父南麓君文炳於仙居文登之作志千之萬則就養其子比部九鈞編修九鑑京寓作也帆湘閣文集方侍郎苞張文敏照謝梅莊濟世皆有序蓋其喜游覽負盛名於時如此

國朝書目考卷之四十四
右湖南文徵羅汝懷錄

杜要

杜要字明若一字去貪新化人雍正七年舉人乾隆元年 欽賜國子監學正著有觀瀾文集

寶慶府志要屢困場屋僂得復失年六十四與同縣楊琨楊振鐸同舉於鄉已而琨與振鐸相繼登明通榜要年輩先於二楊取居其後乾隆改元年已七十矣徒步赴京與會試 高宗以登極恩命搜年老舉人硃墨卷進呈 欽賜國子監學正蓋異數也要有至性刻苦自勵矜尙名義負氣不下朋輩多憚之

右湖南文徵羅汝懷錄

陳昌泗

先君諸執友所最心折以爲足追齊古昔者莫如同里二陳磊落英多有志於孟荀正學之統其才力亦足以副之者裕齋先生是也醇深縝密力距詖淫篤信所學而不變者孔塘先生是也乃二先生皆以窮死將無古學之累人遂爲造物所厄不至於蕉萃殆盡不止其信然耶嗚呼我無以知之矣先生諱昌泗字魯水別號孔塘浙之甯波府鄞縣人也曾祖某祖某父某裕齋少與先生同筆研其所指歸在洛閩奮然思承其緒裕齋才高而先生心細互相討論以成水乳讀書於城西之桃源書院高視闊步非禮不履時時以正議扶末俗村夫子以爲怪顧窮甚束脩所入不足以供

八口之衣食乃以京房易傳賣卜巧發神中至其持論如蜀莊必
依於孝弟忠信不徒以禍福休咎動人垂簾焚香暇則賦詩自遣
累試於行省不見售於是世人益笑其迂友朋燕集裕齋輒於酒
後撫先生背歎曰若非老兄不益令我茫茫孤另耶乃未幾而裕
齋卒先生誦於隻輪杜門株守鶉衣藿食時或不給則佐以岐黃
之術商歌出金石忘其窮也生平學力本於一誠故其造詣敦篤
而純備無不自體認中來法言法行造次不苟蓋明儒康齋莊渠
之流晚年見予所作說經之文輒然喜曰是深甯東發一輩也將
來何以測其所止但惜不令裕齋見之先生之於予似有投分遂
成阿私之好每見一紙必連擊節又申之以後望焉豈料予三十

年來之荒落一至此也生於順治某年某月某日卒於雍正某年某月某日得年七十有四娶鮑氏子某先生卒後不久亦死有孫二人尙幼先生古文學朱子詩亦似之有孔塘集葬於某鄉之某原其銘曰

先生語我科舉之害六百餘年誰啟厲階至今昏墊其勢滔天敗壞人材極重難返辱不可湔所以志士恥言歆羨以成畔援嗚呼先生不見世上賣藝鬪鬪但得富貴足以自豪門戶赫然而乃老死妻子窮餓沒世顛連彼一坏土稽古之力荒草芊芊

右墳誌銘全祖望撰

張雲章

君諱雲章字漢瞻號樸村江南嘉定人也曩者崑山徐司寇好文術以得士爲名自海內耆舊以及鄉里樸學雍庠才俊有不能致則心恥之而士亦以此附焉余初至京師所見司寇之客十八九其務進取者多矜文藻馳逐聲氣卽二三老宿亦爭立崖岸相鎮以名惟君處其間斂然靜默體恭而氣和余心異之而君亦暱就余君始以校勘宋元經解客司寇家其後諸公貴人考訂文史必以相屬而君嘗就陸稼書先生問學獨陰以名義自砥方稼書先生爲當路所排君上書崑山相國其後儀封張中丞與江督噶禮互劾奏讞久未決君上書安溪相國在君見謂義不可以苟止而

以言之不與爲眾所咤君在舉場數十年所與比肩游好次第登
要津司貢舉每欲引手君輒曲避以是終無所遇康熙五十二年
聖祖皇帝詔求巖穴之士九卿公舉九人下江蘇巡撫徵君君既
至而首輔安溪公適告歸事暫寢華亭王司空承修尙書奏君參
校書既成而君淹留逾時眾以爲疑余間詰其所以然君曰假予
急功利乃佗僚到今邪顧竊自念生逢 明聖平生所志具上殿
劄子欲進見時一自列之耳既出京會儀封公總督倉場畱主潞
河書院又逾年然後歸 今皇帝嗣位詔舉孝廉方正江蘇布政
使鄂公以君爲舉首君老不能行再書辭大江以南遂無列薦者
君內行飭修遭母喪既禫子孫請少進肉泊君固不肯時年六十

矣將終語不及私慨然曰吾生獨君臣義缺命也夫君父諱某邑
庠生母李氏妊君得夢祥以順治戊子九月十四日生卒以雍正
丙午七月朔後三日享年七十有九有樸村集二十卷行世乙未
以後文集若干卷南北史摘要詠南北史詩藏於家妻李氏與君
同庚姑歿羣叔皆幼撫育有恩以康熙辛丑九月卒葬今寶山縣
橫港君以雍正丁未十二月朔後二日合葬男四人體方太學生
直方未冠好學工書從君卒於京師余親弔哭靖方業儒揆方康
熙丁酉舉人女一人孫四人銘曰

右墓誌銘方苞撰

朱振玉

婁東故多才人學士爲天下冠 國朝鼎新聿興理學陸陳江盛
四先生昌明絕業曷迫後進其師友淵源至今傳述士大夫之口
他若朱昭芑周韋庵之屬亦以經明行修見稱閭黨後生多及其
門比年來師道日貶有能飭廉隅嚴訓誨方矩闊步以師道自任
令人見前輩風流者必推孝廉朱君云君性端介不爲苟同望之
頎然長身骨稜稜出衣表卽之面目嚴毅丰裁肅括雖盛暑燕居
未嘗解帶與人言斷斷如也爲文不喜程墨熟爛之習析理嶄絕
匠心獨造其講說善發聖賢之蘊旁引博喻聽者渙然弱冠補博
士弟子員屢試高等從游日進握衣升堂頌禮甚嚴常以道義相

磨切諸生學成而去歲時來謁問起居外輒頽首下坐帖帖如在
塾時或坐有他客與爲讓君必呼名以告曰愚徒某不少假以辭
色君與客言終坐無敢攔語里中諸少年爲文社求月旦評者必
於君君爲點鼠塗改不異門弟子少年浮薄者率怨勝己而好上
人得君評定甲乙則無異論或當稱人廣會錯立族談君至則皆
曰朱先生來也翼然敬闐然無聲其見嚴憚如此然君實坦夷無
岸谷與之交者亦不見有抗厲之容也君之父曰鼎鎮巋然碩德
有聲鬢序間世父曰養正潛心實學皆杜門教授生徒濟濟故君
之師範稟於家法爲多君博綜經史尤好讀宋五子書抽關啟鑰
具有條貫丙午察孝廉主司少宰錢塘沈公夙推理學名臣得君

卷擊節不置曰勃宰理窟此必文場老宿也庚戌試部既入闈忽
心動卽棄卷出兼程而歸則繼母曹孺人病已亟籲天請代卒不
起蓋君未生而嫡母孫沒旣冠而孤甫壯而生母徐亦去世至是
益創鉅痛深且自以求名故不得視燥溼寒煖致親遺厲遂終身
不上公車居閒無事惟以造就後學爲急其人敏鈍華實不同君
隨資開導靡有不洎於成者其文高下奇正不同經君指授講畫
於規萬繩尺鮮有不中者君旣登賢書需次縣諭選有日矣適令
甲方用會榜明通循資者不得進君遂未及仕而卒 本朝學博
不越行省所轄君用則教及乎鄰郡不用則教專乎鄉邑畱君於
婁而不奪之去未必非後生小子之幸也而靳其上壽則猶有憾

國朝文獻通考卷四百三十一
焉所作制藝百餘篇門人欲鐫以行世君卒不許君名振玉字彙
九一字拊成其游庠也入籍海虞鄉薦後遵例歸太倉卒年六十
有七無子以兄之仲子某爲子

舊史氏曰古有人師有經師今世所謂師者惟以揣摩場屋爲教
其於師道抑末矣然如朱君潔修好古開示後學雖古之師何以
加諸余嘗登君之堂觀其門弟子率循循有規矩知君所以致之
者必有自也揚子雲曰模不模範不範使揚子見今之爲師當不
知云何若朱君者信可爲模範矣

右傳毛詠撰

陳桐 弟枚 桓 陳善 袁江

陳桐字筠亭號菊僧工畫草蟲花鳥點染如生

婁縣志

陳枚

陳枚字殿掄號載東晚號枝窩頭陀其兄名桐字筠亭以花卉擅場遊京師名公卿多延致之載東因北行與兄同寓時有畫院待詔小陳相公名善本京人擅名於時筠亭欲載東師事之載東唯唯終不往欲自成一家乃掩關不出焚膏繼晷凡宋元人名畫極意臨摹兼工山水人物翎毛經歷寒暑始取其畫付裝潢家適小陳相公見之驚出意外謂相好中無此筆墨訪知爲筠亭弟急造廬握手遂成莫逆薦於屢朝同供奉畫院投內務府員外郎銜屢

邀 優獎 賜予駢蕃自是名益振求畫者日戶外屢滿矣其畫
自出機杼瀟灑名雋無畫史習特用筆極細兩目大傷遂假回居
郡之清河橋左焚香煮茗仍以筆墨自娛晚年復構廬於杭之西
溪以終惜無子弟桓字岱門頗工詩畫多技能而不修邊幅故時
譽不甚彰著張浦山兼取其昆弟名入畫譜永不朽矣特謂岱門
是兄筠亭是弟微誤耳

陳黃門燦題跋

陳枚畫初學宋人折衷唐解元寅參以西洋法能於寸紙尺縑圖
羣山萬壑以顯微鏡照之峯巒林木屋宇橋梁往來人物色色俱
備其用筆之妙與巨幅同雍正四年以供奉 內廷勞 賞內務
府郎中銜給假歸娶 恩賚優渥藝林榮之

婁縣志

陳桓

陳桓號石鶴嗜酒兼好禪悅畫規橢倪黃以天趣勝

婁縣志

石鶴畫如其兄而以詩名方兄貴時石鶴不樂爲介弟既歿而家析石鶴不善治生日益貧衣如懸鶉聳兩肩行吟風雪中市人或匿笑之而石鶴左右顧自若也居久之喪偶攜其子栖委巷後轉入城西之湛然庵與客談詩書閒爲人作畫得錢卽沽酒以飲父子或忍飢竟日而終不肯乞貸於人以是人皆高其節

學福齋集

右 國朝畫識馮金伯錄

陳善

陳善大興人山水多焦墨邱壑亦深邃

畫徵續錄

陳善工畫山水人物 憲廟時 召入 內廷極邀 御賞筠亭

殿掄昆季亦極推重之 書畫紀略

右 國朝畫識馮金伯錄

袁江

袁江字文濤江都人善山水樓閣中年得無名氏所臨古人畫景

遂大進 憲廟召入祇候 內廷 畫徵續錄

右 國朝畫識馮金伯錄

周徐綵

君諱徐綵字粹存余典試浙江所得士也君曷爲諱徐綵祖故徐氏也徐可以後周乎周之所自出也周之出則可以後周乎亡乎禮者之於禮也猶庶幾焉耳男子謂姊妹之子爲出謂出之子爲離孫謂女子之子爲外孫有孫之義焉猶愈於非其出者焉耳徐氏之先有大理卿諱初者爲明名臣其曾孫諱應龍有碩德兩舉鄉飲大賓始後周君之祖也生君考諱廷翰從黃徵君宗羲朱檢討彝尊毛檢討奇齡遊爲名諸生家多藏書盛賓謙博雅之士競推爲海內宗盟君生而豐頤隆準早承家學尤精熟諸史慨然有用世志學使者莫能知會南陽彭公始搏來督學拔山陰會稽二

縣第一人皆君文也奇之致諸幕下從歷浙東西名大起知府俞
卿延修紹興府志紀事必實富人罄金乞立家傳不屑也歲庚子
鄉試始爲余所得聞中愛其文傳示同考然君以疾不及與計偕
又三年余出撫廣西延君不至丙午歲余總督直隸始來佐余明
年余內 召君亦病歸又一歲而卒雍正戊申歲三月也距生年
康熙丁巳實五十有二歲君具用世才而不得爲世用造物者於
斯文其有意耶抑無意而聽其自然耶種樹者移易其枝幹而續
之則華必盛實必美故媿育於姜五世其昌至八世而莫之與京
君之先以徐後周豈其世猶未耶胡爲而不極所昌也君所著書
曰識大錄十二卷識小錄二十卷幾山文選十二卷北征紀略一

卷恆言原始十卷越州先賢贊一卷理學淵源錄四卷越諺二卷
文章粹金二卷並藏於家一子紹鈞能傳君之學君卒後二年來
乞表君墓云君能爲古文卓然闡韓歐之藩時文師陳行人特少
所勤也然聞君文譙必祀大士之神率同學羅拜薦之以苾芬君
於小藝猶不忘其原如遭遇朽用豈負國恩哉惜乎不與於雲雷
之會奮其經綸也表諸隧道俾來者有聞焉

右墓表李紱撰

國朝通志卷之四十五

四

鄭世元

公諱世元姓鄭氏號黛參雍正癸卯舉人與余家均自越遷禾遂
家於幽湖公生有異質卅角能屬文試輒冠曹長益博學肆力爲
詩宗少陵得其神髓每出一篇藝林傳誦然嫉惡嚴與俗寡合意
氣豪邁館茗中與江子岷源韓子自爲及方外轉庵日嘯傲山水
學彌進弟蘆村官粵公度嶺作南征集後入燕爲王門師公卿爭
引爲重作北征集公長余一紀與余倡和獨多作先吾集門人江
相壻鍾國相裒數十種合鏡之號畊餘居士詩公生平自處高峻
而虛懷好善朋儕子弟以所著錄就質輒開譬之口說手批疊疊
不倦然其所獨得世俗卒鮮有解者嘗與余屏戶頽仰天地相對

泣數行下兒曹竊窺笑之不自禁也丁未北歸明年冬病卒年五十八配潘氏子二象占虎變能世其業云轉庵者吾鄉孫子曰也膂力絕人少起義兵敗被獲以奇計逸去遂削髮隱菴中

論曰余平生交友造詣純篤者間不乏人而燭理若犀利處事如斷金者自公而外罕覩也嗚呼以公之才隆其淵天下事必有可觀者而奔走窮悴以死豈非天哉其言文枝葉垂於不朽非公之志也

右傳陳梓撰

按鄭公字亦亭

汪惟憲

汪惟憲字積山錢塘人少補諸生好潔成癖每受知於學使者終不肖畢鄉試以場屋儲積汗穢易霑垢漬也性又好靜知交將任爲州縣者拍其肩戲曰可且少住不雍正七年例選士貢國學惟憲以疾未赴使者大怒遣學官押之入試竟以充貢且謂之曰生若務爲名高不隨牒上計我將以筆扑報生矣惟憲謝不敢然竟以病不出惟憲善爲詩尤工五言論者謂覽其詩非徒悒悒有雅致乃別見貞白之性有積山集六卷

右文獻徵存錄錢林撰

皇朝通志

卷之三十三

三

趙煥

趙煥字含彩汝州歲貢生閉戶讀書絕意進取以詩文自娛遠近名流過郊者必造廬訂交正己率物族黨奉爲祭酒雍正己酉邑令陳聘續縣志嘗慕陶彭澤之爲人一日招橋水李亦重爲作生墳志銘徧寄親知未幾卒

右傳趙林成撰

金啟 劉紹錡

金大名啟字奔山浙之會稽人生而慧父母早喪大父育之命攻制舉業八九歲時卽屬筆爲文比成童益可觀老師宿儒皆稱之未幾大父亦亡家徒壁立窮不自聊其姑歸謝謝令平涼乃往依焉爲授室延師教學時文時文故大所優爲不肖學師督之大曰是昉於半山而今非其體破題括矣承又括之小講起比又括之六經以來未見斯製或云倣唐人試帖而試帖括於首聯不聞頸領再括也若其泥章句襲訓詁尤局促效轅下駒故非所志志不在學必不工工亦卒歸於無用耳師雖不許而心奇之大於是私購少陵昌黎東坡集竊誦學爲詩王一元見而善之一元字晚仙

江南人以進士爲靈臺令著書等身所爲歲寒詠物詞儒林爭膾
炙焉大小於元而元樂與大游爲忘年友然大詩亦自是日進居
無何謝以虧帑黜姑又死大偕其家屬僑居三原城西而一元亦
以虧帑得罪大乃鬱思感憤無所放其意而託於酒往往舉觴自
勸亦或與耕夫野老傾壺盡歡舉人情所極不能忘者皆一醉忘
之醉而醒則作詩詩得意復飲極醉而向之鬱思感憤者又不知
其何往矣人或病之欲與言輒飲以酒旋出詩人亦相忘竟與抵
掌歌呼酣嬉顛倒而去終莫得言出語人曰吾欲援大於醉鄉願
乃爲大舖糟醲也商州刺史聞而致之幕刺史解詩能飲而刺
史客錢卓人詩尤工三人居甚懽頃之刺史家隸慢卓人卓人怒

去大亦慷慨辭歸賦詩數章以見志焉大之歸於三原益漠然無所向獨與城東劉七善七雖不勝杯杓而精於詩故大喜從七大來七具飲大獨酌七操筆其旁爲詩以酬方大從七七卽鍵戶唯大與七聚他人不預也雍正八年正月十七日大卒年三十子二曰渭曰清俱幼大卒時七爲經紀其喪所爲詩多散軼七收其半而藏之

劉七者名紹錡字繼信爲三原望族少機警七歲就傅受禮記春秋七曰讀此何爲傅曰學爲人耳期月通三經授時文七曰此又何爲傅曰取科名七曰科名何爲傅曰求爲官七曰求爲官不幾忘向之學爲人乎一日詣昌黎荅崔立之書喟然歎曰唐以詩賦

尚類能優世之時文乃至假其聲音笑貌是真佻優矣遂盡棄時
文不應試其兄迫之始就童子試卽冠其曹補博士弟子弟子員
例以時文第優劣七與諸生試輒優而性不嗜時文獨好爲詩又
鮮同志獨與其兄紹攸相應和後乃得會稽金大三人者慶不孤
顧大與七喜曠達而紹攸好言理亦講時文大與七每日爲迂爲
拘故大與七尤密云雍正十一年王公信芳以名儒督學關中試
七詩署其尾曰始假道於溫李終排闥於韓蘇廬山高今見匹敵
矣深器之期與其學而七病初七與紹攸金大善及七死攸遊西
安七鬱鬱不自得唯作詩積三千首卒以成病病篤家人環之泣
七自數其齒曰不死嗚呼七竟死矣在雍正十三年四月初四日

年二十三先是紹攷從西安歸見七作字自署浴花主人攷嘆曰
花可浴乎其屈子餐英義耶知七年之不永矣未幾驗

九畹子曰二子負絕才抱畸情以游塵埃之外非所謂遺世獨立
者與願皆促其年而七尤促天之不欲老其材何哉追觀其詩詞
清絕迥非人間語嗚呼大之詩待七而傳七之詩將誰待與

右合傳劉紹攷撰

三十一

黃鼎

當代以畫名者五人武進得惲壽平格太倉得吳敝山歷王麓臺
原祁常熟得王石谷畫最後得吾友黃尊古鼎五人中麓臺第進
士官侍郎顯名最易四人逸老布衣而名與之齊覺四人較難然
壽平敝山石谷得錢宗伯牧齋吳祭酒梅村王司寇阮亭諸公前
後道揚宜其名流播遠邇而尊古當諸公徂謝推挽無人竟以筆
墨見重人世尤爲難中之難也生平好遊覽嘗之齊魯登岱歷燕
韓趙魏入秦登太行終南太華諸山又出塞垣數千里經于闐近
身毒國至蹤跡俱斷乃還後巢黃山上匡廬羅浮九疑陟嵩衡升
我眉巔攀岷山窮長江之源後乃入天台雁蕩武林諸勝杖履所

到凡詭奇殊絕之狀一一寄之於畫前人粉本中未嘗有也吳中
評畫者謂石谷看盡古今名畫下筆俱有成處得稱大家尊古看
盡九州山水下筆俱有生氣並稱大家兩人皆虞山人故同論云
尊古性伉爽不受纏縛在京師時有故相欲招致其家尊古約曰
能不限出入惟命及至諸門下希鞬鞠踞尊古獨長揖言辭侃侃
故相敬禮逾厚然見故相權重任久傾軋者多恐將及難堅辭去
及故相罹禍時尊古在粵中經六千餘里入都相與哭別旋南還
晚歲有制府係舊識具書幣招往秦中既至聞制府縱恣無節曰
安有繆盩如此而令終者遂策馬還竟不往見途中惟寫終南雲
氣武功太白諸圖以壯行色聞者高之性孝友葬大父母不諉之

世父後葬父母不諉之弟後世父未葬者葬之弟之子貧無歸分
己產給之餘如養姊妹之寡者卹嫗族之乏者周故人之單寒者
歲以爲常客至燕飲嘯歌日夕不厭四方餽遺費盡爲度不畱後
日毫髮計少時學畫從邱高士嶼雪入都後師麓臺侍郎然每與
人言淵源所自曰我邱先生弟子也既老寓吳有以畫請業考講
貫不少休嘗言畫品超逸過於沈著然不沈著不能超逸又言吾
所指授者乃馳轡古人之途若骨相丰采精神氣韻隨其人性情
學問變化之母沾沾面目爲也前此吳中久無畫師沈文唐仇風
流遼邈得尊古提唱而陶鑄之南宗正傳或仍在後賢繼續中而
尊古沒迄今無聞尊古號曠亭又號獨往客晚又號淨垢老人世

居常熟之唐墅鎮以雍正八年四月二十五日卒距生順治十七年二月初九日春秋七十有一配倪碩人事上接下動中禮節使尊古走萬里外無內顧憂者碩人力也子理常熟縣國學生孫大年歲乙卯某月某日將卜兆於吳縣某原請銘憶丙午歲尊古嘗飲予以酒謂他日得子志我墓是吾願也而今果然銘曰

畫師心心師天歸自然神理全急奔義避權貴散榮利身無累行萬里憑孤筇歸去來藏幽宮人云亡粉墨在煙雲中永不壞

右墓誌銘沈德潛撰

黃鼎字尊古號獨往客常熟人山水受學於王少司農兼得石谷意筆墨蒼勁其臨摹古人咄咄逼真而於黃鶴山樵法爲尤長嘗

客漫堂第故梁宋聞其遺蹟獨多

右 國朝畫徵錄張庚撰

獨往山人與予同客武林幕府朝夕觀其作畫其正處精神多於
側處渲染近處位置又從遠處視貼濃不傷癡淡不嫌寂氣韻蓬
勃百世一時 辭雪一瓢齋詩話

右 國朝畫識馮金伯錄

黃慎傳

黃山人慎僑居揚八年矣余假還嘗就醫此地與交焉詩畫皆有物外趣慎幼讀父書長侍母無以爲生遂學畫母含淚語曰兒爲是良非得已然吾聞此事非薰習詩書有士夫氣韻一畫工伎倆耳詎足親賢達慰汝父九泉慎愈益自愛方十八九歲寄蕭寺晝爲晝夜無所得燭從佛光明燈讀書其下母聞喜當是時慎雖少與遊者多聞人慎晝旣擅國能復工詩善草書出游豫章歷吳越維揚人爭客之母垂老不欲遠離乃偕以來雍正五年也又三年

復歸閩

王已山文集

黃慎字恭懋號瘦瓢七閩老畫師也詩云愛看古廟破苔痕慣寫

荒崖亂樹根畫到情神飄沒處更無真相有真魂鄭板橋集

右 國朝畫識馮金伯錄

傅雯

傅雯字凱亭閬陽布衣工指頭畫法高且園先生鄭板橋詩云長作諸王座上賓依然委巷一窮民年年賣畫春風冷凍手胭脂染不勻古檀詩話

右 國朝畫識馮金伯錄

湯之昱

從孫然
杜曙

湯之昱字南溪號實齋睢州人善山水

今畫偶錄

南溪名之昱文正公斌孫監丞公沆子能詩好畫山水出入董源子久兩家筆極秀穎以余為孤竹老馬常持業商之虛懷好學略可見矣

畫徵錄序

右 國朝畫識馮金伯錄

湯然

湯然字岷南睢州人文正公嫡元孫明經雲麓公之長子也辛酉舉於鄉計偕游列乙榜注選教諭天才奇敏文筆開朗無纖塵萬舌嗟賞如一召動日下書法秀逸畫尤蕭閒淡遠故承雲麓公家

學又座主嘉定張南華宮詹指說六法直駁駁參駕古人焉桑菽
甫集

右 國朝畫識馮金伯錄

杜曙

杜曙字旭初杞縣人鄉飲大賓善水墨花草灑落自適有徐天池
風名聞梁宋間兼長山水偶寫白衣大士亦雅秀性孤高猶癖善
飲醉後落墨不肯休遇他客則趨避掩面臥一顧不可得客率索
然去年八十餘飲啖如少壯所養有得矣

右 國朝畫徵錄張庚撰

萬伯安

列子敘九方歎相馬索之牝牡驪黃之外而世多索之牝牡驪黃無惑乎驚蹇且盈廐而寢疑八駿之雅不如驚蹇也康熙辛酉子年十有七入會城見茂才伯安萬君手虎頭猿臂表詞輒奇之既而伯安貢成均旅京輦駢語韻語蜚聲藝苑江南曲海棠賦尤楮貴鄣季野萬先生有人倫鑒時指語座客曰此予宗千里駒也晚而遊金城平西頌詞出秦隴人士駭未曾有巡撫石公亟幣聘命子肅師之此真駿軼士匪牝牡驪黃埒也伯安爲司訓古齋先生之六世孫大宗伯文恭公之五世孫茂才野亭公之伯子華閣素少標映江左今書其雅克勵行檢者曰事野亭公暨母吳孺人罔

少嘗禮也曰俾弟茂才君有後也曰肇造三世祖耕隱公祠也曰
造古齋先生城西專祠也曰修文恭公書院也曰殫力營畫野亭
公祠於宅東一吟軒之前且旁植蓮卉也曰蘄建始祖默庵公寢
室也曰蘄復建文恭公鬢宮前綽楔也曰蘄復祖顧庵公城西宅
也曰宗女卒於畏而堅卻其夫家朱提百兩也曰力全從姪茂才
君妻蔣節也曰肅誨子暨孫且俾讀文選漢魏古文詞也此黨邑
所胥挹而未可以爲牝牡驪黃而輒涉之也公孫龍子曰堅白石
三可乎曰無堅得白其舉也二無白得堅其舉也二而之石也匪
三也夫堅且白者心也心其眞也石則其迹也乃世不蘄其果克
堅且白者而好執匪三之石以律人於是乎曠土滋熾而舉其二

之克真者反用此摧挫駢黜而不復振伯安試場屋十有一胥報
罷己卯府尹試昆陵黃功錢君力薦之慈溪西溟姜先生激賞不
置定中式上卷洎書榜爲借典司者潛易去伯安感西溟先生知
己日省視其韻院不少倦而科舉文業亦繇此寢輟矣洎齒七十
復走數千里作臯蘭可寒遊以武徐文長吳子魚阮太冲諸名彥
荒徼孤埃清吟叢編之學殖人且重用爲天道疑迺輟譽四馳祉
祐亦寢集而伯安君克勵行檢暨其才峭出而不諧附於稠眾者
之涯略遂日以融朗此所謂天定者勝人也伯安子三先卒者景
僑國子監生其長也次松齡出嗣弟雍正己酉中府尹式第四乾
隆丁巳考 授內閣中書舍人試博學鴻詞第一卽 授翰林院

檢討供奉 武英殿校勘經史才譽焯著又次椿齡上舍生孫三
秋期汝馨汝飴秋期上舍生校釐三禮例竣銓敘曾孫二之鼎之
環女三長倩尹必達籍校次潘輔龍比卒嘗籍於校篤學工文士
也次史鷺序孫女五伯安卒於雍正十一年癸丑夏四月十有八
日年七十有七卒後四年 覃恩例得貤贈如松齡官松齡等將
以某年月日竊於項豆之阡來蕪誌銘予爰譔誌以徵士之雅克
堅且白者訖非牝牡驪黃所獲掩若夫世系暨配冢介婦暨孫女
字某氏之詳載松齡行狀不繁列銘曰

魏公子牟醅辭云無意則心同無指則皆至又云髮引千鈞勢至
等也而後知伯安君之尤嗜文藝克啟厥緒者蓋匪一縷之垂而

直千鈞之繫此之謂駁軼磊犖士也

右墓誌銘儲大文撰

林企俊

天之生材今不必異於古而後世常乏材則所以用之者隘也用之隘而以不用爲用則今大府以下至於牧長之賓客是已周禮六官六軍並有佐屬大則命於朝其次皆自辟除故足以盡天下之材漢時佐治者有除拜有府版若范滂岑暕各盡其材其太守反不遇坐嘯主畫諾而吏治之隆莫尙焉隋初罷辟署令史吏治始衰然唐時節度觀察團練防禦諸使幕職猶得奏請辟署其未有官者皆謂之攝則用人之塗猶廣也宋元以來微員皆命於朝而山林遺逸之材乃始散爲封疆守土者之賓客不用之用雖亦足以爲功於世而其人有功而名不彰長可惋惜若松江林君其

尤賢者也我 國家旁求俊乂野無遺賢 世宗皇帝始命督撫
諸大臣舉幕中賢士而林君已謝壯游歸老於家以子貴 敕封
翰林編修矣君諱企俊字宮升以試不售題其室曰蓬軒人稱蓬
軒先生先世居上海復遷郡城四傳至景暘由翰林仕至太僕寺
卿爲有明名臣太僕生有麟仕至四川龍安知府龍安生希顥選
貢生明亡不仕省郡志三世皆有傳選貢生子威爲名諸生君考
也君生而穎異師處士吳騏爲有用之學以第一人冠郡庠屢試
於鄉不舉願學益闋富涵演朝章國典河漕鹽屯兵食大計無不
悉其利弊坐言可起行相國武定李文襄公爲君考執友聞君外
艱服闋致書相招文襄以經濟名天下君有助焉嗣是督撫聘幣

相望於道輟跡徧四方故相國沁州吳文端公雲貴總督巴公今
尙書螭園徐公皆一時名臣並參其幕府孟子謂觀遠臣以其所
主君所主若是可以知其所抱負所設施矣以視范孟博岑公孝
爲功於一郡者不啻什伯倍蓰而天下莫能指而目之則彼職雖
功曹實身治官事而今之大吏賓友深藏密覆卽姓字莫可窺其
實能用材者人之材卽其材主不必掠美賓不必讓美也君所主
皆大賢固不爲掠美而君性謹厚遠謨碩畫未嘗一以語人章疏
皆論絕不存彙晦其才又可以知其德矣所著惟蓮軒詩文集六
卷四體雜式四卷並藏於家生平事親篤孝勇於爲義建家廟復
太僕公義田助族黨婚葬不遺餘力善行多不能悉書也生順治

癸巳三月朔卒雍正甲寅九月八日壽八十有二娶章氏有婦德
先卒子二長令愉國學生亦先卒次令旭翰林院編修嘗請假歸
省 世宗賜君松花石硯一方人澆二斤內府甯綢二匹異數也
嗚呼君之學既大行矣名不自己出可也況乎受清華之封蒙
尙方之賜雖使遇於時亦豈必加於茲乎又以知天之不負材而
國恩之無不被也今旭來請文表君隧道書其實俾來者知自奮
患非材不患其不顯也

右墓表李紱撰

邊連寶

邊連寶直隸任邱人諸生學使刑部侍郎錢陳羣拔之貢成均
廷試時禮部尙書任蘭枝與侍郎李紱司校閱署第一發視相賀
旋應乾隆元年博學鴻詞科不中選十四年復薦經學連寶辭不
赴時友人戈濤亦在舉中勸之行荅曰吾自審未能如漢伏勝董
仲舒安敢矯誣以倖取哉自是無意進取益肆力於古學其爲詩
直達胷臆才力縱恣出入韓愈孟郊白居易盧仝之間所著隨園
集鉛山蔣士銓爲之序他著有古文病餘草續草長語

右 國史館本傳

君諱連寶字趙珍改學吟別號隨園姓邊氏世爲任邱望族君爲

贈奉政大夫諱汝元公季子生稟宿慧六齡隨父入塾侍食既私
懷一餽既歸獻於母曰兒今日聽懷橘事願倣之既長博聞強記
爲帖括文恥雷同學大士大力康熙己亥補博士弟子員辛丑餼
於庠雍正乙卯受知學使錢公陳羣充拔貢生明年乾隆改元開
博學鴻詞科錢公舉君應 召試不中越十五年 朝廷徵經學
之儒錢公再舉之是時天下共舉三十九人君獨以疾辭不赴其
學子登科第列仕宦者數十人而君歷鄉試十三次凡五薦而罷
遂絕意進取益肆力於古學所著古體文隨園詩病餘草病餘續
草絕筆草各若干卷其評選手定者則有五言正味集杜律啟蒙
管子腋考訂蘇詩施注等帙君身如癭鶴眉目疏秀鬢離離若可

數頷禿而無髭性簡介不喜見俗士論事侃侃持義理不移少嗜
酒四十頭童如髡隨身一茶鐺晚號茗禪居士空齋晏坐宛然一
老僧然不好釋氏書與河閒戈濤最友善君詩出入昌黎東野香
山玉川閒才力縱恣雄起北地凡燕齊千里內宗漁洋修飾描畫
家見君皆震懾不敢抗濤爲人負才尙氣立朝矯矯自許於詩文
憤許可願心折於公嘗爲公撰生傳傾倒駁邁爲時傳誦濤旣死
君屏交遊惟與兄竹巖詩酒唱酬而已竹巖名中寶君同懷第四
兄也由鄉貢四任學博廉謹端恪性和粹與君忼爽異然白頭友
愛如髫鬣時竹巖子廷掄起家兵部出守徐州歷常鎮道轉兩淮
鹽運使竹巖就養江南偕君往遊窮大江南北名勝篋輿畫舫中

一老歌吟弗輟旗亭僧壁傳寫殆徧君詩益奇橫跌宕自喜編南
遊墟篋集歸一載卒壽七十四歲前一夕尙作詩有銜杯直到蓋
棺後搜句不忘屬續時句又口占寄別竹巖有百年終有限一面
已無期句逸情至性可慨也聞君五十餘隨兩兄奉母時爲孺子
戲歲除日母例以錢數十緡散兒孫君持錢搖之鏘鏘然或與孩
穉輩戲易多寡佯爲哂笑以博親歡又看鏡忽大笑曰吾有白髮
可以入詩矣其天真爛漫類如此子廷徵邑庠生亦有文能守君
遺經云

太史氏曰詩人以功業行實光明於時者豈少哉然不得志闡釋
優游以自見其抑塞磊落者又何叢叢也夫甘節之士生於承平

苟搜富貴將失其真矣徵君雖以韋布老而文詞斑然耀於世安可謂之不幸也夫嗚呼

右傳蔣士銓撰

摩眇爲直隸總督彭城李公所薦研辨經史篤學不倦北方學者未能或之先也

右詞科掌錄杭世駿撰

--	--	--	--	--	--	--	--	--	--

182

周思仁

君諱思仁字恕三訥庵其號也生而穎慧甫襁褓解承順能言授以書輒解悟韶龢能屬文其言曰根本忠孝發爲文章無非至情流露此聖學之淵源也邑中先達大驚異之君之學殆有宿根焉十齡遊泮十二齡食餼旋登拔萃科時值督撫藩憲月課拔其卷皆第一蓋自巾角時見器於郡守徐公逮成名後學使夏醴谷先生及督撫方伯莫不重加獎異而訥庵文名課兩湖矣幼失恃隨父事祖父母祖歿父官江西德安令內用刑部主事迨告養旋禾抵家而祖母故君身肩大事一切如禮家故清貧以書承父歡逮事繼母無間言翼仲季俾成立析產時擇膏腴畀仲季人咸多之

治家嚴肅自奉菲約禁子弟紈袴習惟以敦本業延詩書澤爲要務堂中伯叔子婦老且病者廢者孤者貧不能葬者爲周恤經畫俾得其安初不矜德色焉訂庵負其所學無意經時足不輕履公庭居一室左右圖書問字者屢常滿必先教以正心術品行後及文藝蓋訂庵所以教卽平日之所以學宜從遊之士卓然多所成就也主濂溪書院講席郡守重其文行聘修邑志其好學老且益勤所著有四書貼講詩話類長楚詞帖舊聞新話杜詩編年刪詩後待梓問世其子孫亦多有能讀祖父書者

右傳黃崇光撰

按周先生邵陽人選拔係雍正乙卯科

姚世鈺 王豫

通經學古之士天每以阨窮加之或曰所以玉之於成也其信然乎則所謂阨窮者不過槁項黃馘三旬九食以畢其生亦已足矣而乃重之以疾病甚之以患難終之以孤榮如是而曰玉之於成莫之信也天而無意於斯人乎何故而於孤根薄植之中屈沆瀣之精以篤其材天而有意於斯人也而所以玉之者適足摧殘戕賊之以至於死則司命者之權衡不知安在歸安姚蕙田長興王敬所皆今世僅有之材也二人者爲郎舅其讀書能冥搜神會眞見古聖賢之心其爲詩古文詞清雋高潔平視千古一時推爲國器然而皆一貧如洗不克自贍其生蕙田尤疲嵐長年委頓藥裏

不去手寒暑風雨時若有鬼伯抗之敬所遭奇禍逮繫西曹者五
載薨田以其姊故益在多凶多懼之中終日涕洟敬所解網而歸
不數年而死薨田隻輪孤翼漠然無所向痼疾益甚沈縣又十年
竟死二人者皆無子嗚呼其可悲也薨田之操行其視敬所爲更
醇敬所死予銘其墓不諱其生平疵類薨田垂淚讀之已而相向
嗷然以哭至失聲長興令鮑辛浦在座亦汎瀾而起今吾銘薨田
之墓辛浦之死且三年矣誰其讀吾文者薨田姓姚氏諱世鉅字
玉裁曾祖某江蘇按察使司祖某明經父某諸生娶某氏薨田之
爲諸生也王提學蘭生唐太守紹祖皆知之欲爲之道地然竟不
果未幾薨田亦病廢更無意於人世矣晚年益刊落枝葉所得粹

然授徒江都遂卒焉吾友馬曰瑄曰璐張四科爲之料理其身後
周恤其家又爲之收拾其遺文將開雕焉可謂行古之道者也生
於某年月日卒於某年月日得年五十有五從子某爲之後葬於
某鄉之某原所著有蓮花莊集四卷莊故松雪王孫之居也其銘
曰

慧田之學私淑義門義門之徒莫之或先人亦有言墨守太堅慧
田不信禦侮兀然每逢異幟互有爭端焦唇傲頰各尊所聞而今
已矣宿草陳根悽愴哀詞以當招魂

右墳誌銘全祖望撰

王豫

立甫姓王氏諱豫字敬所浙之長興縣人娶姚氏吾友慧田之姊
壻也立甫生負異稟其骨相臞臞就婚於姚慧田與立甫爲同歲
其才相埒唱酬時相覓而慧田之姊於十七史皆能背誦亦頗欲
鍼砭夫壻立甫出則遇敵手入則懼爲其婦所窘益沈酣於學大
放厥辭古文初學柳州繼而歸於半山詩則醉乎唐音也顧立甫
有膏肓之疾莫甚於好名以其好名故不慎於擇交而傳染之禍
至逮入京師立甫故孱瘦神魂魄力不足以當大難況家貧甚銀
鏹就道一無所資長繫五年其妻以望夫而死追事解得出而芒
角已摧困殆盡不可復振矣癸丑之夏買舟南下過予臥榻中悵
然言曰吾一往消索不敢復與諸公爭宋虢之長但願繼今以往

寂坐深山窮經治史稍於學有所得東隅之失或可藉手以見予
予曰諾乃至任邱故人爲之宿留猶貽書於予謂志氣奄奄幾不
可收東寄聲吾友願得良規以箴心疾則成我者也未幾抵家遂
不通問慧田以札來謂其山居頗適不料其死之遽也立甫銳意
著書其出獄也杭墓浦方過予而立甫至墓浦問曰患難之中所
著多少立甫曰無有也墓浦愠曰古人遭患難正可立言何忽忽
耶立甫謝之嗚呼豈知立甫雄心已爲荼毒所盡竟不能待五稔
也立甫初哭其妻謂予曰吾之負吾婦者不可挽矣慧田自當有
文以傳其姊然吾尙欲子之文以張之予逡巡未及踐約而今乃
以志立甫者及其妻豈不恫哉遺文有孔堂小藥長興令鮑辛浦

爲梓以行世立甫最善徵文獻王子余將赴秋試前一夕立甫來
視予偶與談張尙書冰槎集中考證傾耳聽之神味津津火盡取
所儲闌中樺燭焚之雞三號童僕盡起席間鐙火尙熒然立甫乃
曰吾過矣子得無入闈而困耶立甫生於某年月日卒於某年月
日其年四十有一曾祖某祖某父某無子葬於某山之某原銘曰
蘭而摧玉而折欲問天其何說若溪水共嗚咽此文儻不滅

右塘詩銘全祖望撰

劉度 余尚焜

劉度字叔憲錢塘人山水師藍瑛人譽謂真能過藍者 無聲詩史

劉度深得瑛筆後更變其法師大小李將軍界劃樓臺約縮人物細入毫髮而形像宛然然亦聞及他家沒後遺墨卽寸縑片紙人皆奉以爲寶 錢塘縣志

劉度山水摹北宋得法於李營邱居多 國繪寶鑑續纂

右 國朝畫識馮金伯錄

余尚焜

余尚焜字晴江號青樵一號晚多浙江仁和人其畫山水於閒遠中寓沈著痛快之致非世之貌似雲林者其族弟松巖學博曾出

畫冊見示予愛玩不能釋因記其冊後自跋云凡人中年以往久坐久立俱非所宜況勞慮乎惟作畫則起坐不常而非勞經營滿幅而非慮心有所囿而不馳意有所向而甚適所謂煙雲供養全是活潑生機宜其得壽耳予慕游多載投老歸來一切嗜好俱捐惟作小畫以自娛深愧從前浪擲歲月今耳目昏廢徒耗紙筆亡羊補牢祇堪一笑晚多年至八十外卒於城東草廬

右墨香居畫識馮金伯撰

董正國

先師董子諱正國字次歐別著南岡浙之甯波府鄞縣人也明翰
林改補四川監司樾之元孫諸生光臨之曾孫高士非能先生士
相之孫湖上社老曉山先生劍鐔之從子徙山先生德鏞之子非
能先生於國難後父子兄弟互以遺民之節相束修詳見予所作
曉山墓文中先生家世舊德讀書有端緒顧不事經生業其父友
錢侍郎退山宗徵君正庵舒學博后村皆契之謂其詩古文詞可
以名世年二十見儕輩有作制舉文者請於父曰兒亦可從事於
斯乎父笑答曰姑試爲之先生援筆成文浩汗四五千言其中有
若檀弓者有若莊列者有若屈騷者蕩然不諳格律而筆力高絕

京人一室見之皆驚乃取世之所爲制舉文者而習之則稍稍就繩墨遂以此雄於世然先生精力所注不在焉故終身於場屋不利古文高處似韓公次之不失歐陽少師籬落詩則風格臞臞鉛華洗盡而其治經之所長尤在六書蓋成於苦心孤詣深造自得而非世俗之學也而窮老於諸生講席所至戶屢恆滿然不過以經生業授受無能發先生之光氣者於是頽然自放著述亦日以散漫不復收拾晚年尤困悴雍正某年某月某日卒於家春秋七十有二董氏與吾家世好先官詹公於翰林重之以婚姻先生欲以女妻子期有日矣會子沈疾不果未幾遂侍講席予少無羈檢酒後放言四出多見罪於長者先生最持崖岸然予輒妄前爭論

經史先生獨優容之曰吾門俊人也惜吾老矣不及見其大成也
先生之所以愛予者如此今歿二十年矣門戶衰落諸孤輒弱遺
文僅存百一當日後堂絳帳更誰在彭宣盧植之間而予奔走風
塵無以報陶鑄之恩愧何如矣先生娶某氏再娶某氏子三葬於
某鄉之某原

右墓版文全祖望撰

正德元年八月

丁未

日

羅牧

羅牧字飯牛甯都人僑居南昌工山水筆意在董黃之間林壑森秀墨氣滄然誠爲妙品江淮間亦有祖之者世所稱江西派是也牧敦古道重友誼與徐徵君世溥善徵君贈詩云彩筆常懸夢裏思十年古道見鬢眉雲山本是無常主更寫雲山賣與誰巡撫宋牧仲高其人作二牧說贈之牧能詩善飲楷法亦工又善製茶卒年八十餘

右 國朝畫徵錄張庚撰

--	--	--	--	--	--	--	--	--	--	--

鄭蘭 韓李思

鄭蘭字國芳芷江人善畫竹埒名於鐵笛翁劉珩而別有心得橫枝側葉以秃管揮之若不經意睇視生氣盎然閒作山水出入於叔明子久之間書亦有擊法晚號鹿溪居士

沅州府志

右 國朝畫識馮金伯錄

韓李思

韓李思號憺齋芷江人貌豐偉性骯髒睥睨一切尤嗜酒無時不醉衣履多質酒家長於畫潑墨作游龍煙雲擊攪滿紙具生動狀偶寫山水樹石則皴染工緻平遠濃秀各得其致所得畫資率緣手散去嘗爲僧寫佛像得錢三萬逾月僧促之輒碎其紙典衣以

償僧錢其傲誕如此無妻子晚寄居僧院故態依然能詩興到即作

右傳李元度撰

謝元陽

余交同邑之士資以磨礪學行者得四人焉爲侯君秉衡陳君亦韓汪君西京謝君憲南而憲南與余訂交在髫歲視諸君爲最先憲南之學問文章余視之如蒲捎駛騃追風逐電不足當其後塵憲南顧不鄙余而深交之有不知其所以然者而今死矣悲夫憲南姓謝氏諱元陽別自號曰用九自幼若發穎豎甫入塾卽目準準神諤諤不肖安帖學徒中長而傑然自命於世少可年弱冠以長洲籍應童子試受知於韓城張公試牘已傳誦人口嗣後督學使者至輒第其文甚高而侯官鄭公以科試取君卷寘第一激賞尤至時方拔郡邑高才生貢太學君遂與焉明年癸卯舉京兆試

出武進陳先生秋田之門先生瓌望碩儒負人倫鑒其薦君卷蓋
度眾取之也而五策博瞻尤嘖嘖冠場云越七年成進士既釋褐
例當受知縣以試用發往河南會河南有通志之役當事素知君
博學通古今遂以編纂相屬與錫山顧君震滄同事居二年以艱
歸服闋就選行有日矣不幸疾沒時丙辰八月初六日也年五十
有六君生平無他嗜好獨於書癖焉淫焉無所不讀蓋亦無所不
記而尤精熟於左班二家能背誦如流爲文濤涌雲驅千言立就
而奇思芽甲新語懋長具有光芒爛然透出紙外見者愕眙歎未
曾有顧往往騁其才氣驅染煙墨不留餘瀋余常以好畫歸之君
亦不以爲忤也君嘗有吳郡十子橐之選其書風行江左旣又念

虞山多才不遇而死者甚夥乃廣搜博採撰成虞山人文前後兩集其書亦風行如十子彙也方欲推而廣之以及於他處之有才而不遇者君沒而此事便廢卽君之遺文紙札相壓叢殘篋中亦誰爲選之刻之以編次於虞山人文之內而傳君於不朽乎斯其可哀者也余家在郊外距縣治四十里入城必先訪君以次而及秉衡諸子自去歲秉衡沒君與余相見言及必爲泣然不意歲次在辰而君亦有起起之告遂與秉衡相繼奄忽也君所居草堂在北山之麓嵐光樹色如眉臨目翠染几案余每過之輒移日忘去君沒而爲西州路矣遂哀之以辭曰
惟君才之剽銳兮如新淬之劍鋒惟君學之富贍兮如兼收之藜

寵胡彼蒼之不弔兮一朝而遽殞夫厥躬劍鋒爲之頓挫兮藥籠
因而忽空窮愁可以著書兮而未安乎一畝之宮經術可以飾治
兮而未結乎半通之銅處與出兩無成兮空埋玉樹於土中含石
闕而不語兮恨絲絲其奚窮嗟鍾期之永逝兮欲接席而無從輟
瑤琴而不撫兮徒淚灑乎秋風

右哀辭王應奎撰

鄧勝達 朱菘

鄧勝達字達九原名之樑字庭維新化人以子長信官 贈鉅野
知縣有松堂詩集

贈君爲湘皋詩老顯鶴之祖雍乾朝名諸生教授資益閒居益陽
最久門下多通經績古之士其行實見於鄒漢勳叔績所作松堂
詩存跋厥後孫曾仍世舉貢登仕版而文章行誼皆卓然可傳從
刻彙錄入茲編者凡數家卽贈君之畱貽可知矣

右湖南文徵羅汝懷錄

朱菘

朱菘字芝堂邵陽人乾隆朝諸生

157333
文林閣藏書

信草書月庚香不類
卷四三十一

四

寶慶府志孫幼聰穎有奇氣於書無不讀出語輒驚其長老稍長
受業攸縣陳夢元夢元絕器之與兄英杰弟衡齊名時稱四朱學
使姚頤張姚成皆待以國士

右湖南文徵羅汝懷錄

182-644



21101000157945